



Catechismus Oder Kinderpredig.

<https://hdl.handle.net/1874/432074>

Catechismus
v. Der
Kinder predig



Dieser Catechismus / oder Kinder predig / ist nicht vmb der Pfarhern oder Prediger willen geschrieben. Dann man fast wol wais / das der maiste theil aus ihnen souil Christlichs verstands wol hat / Gott hab lob / das sie solche leer selbst / zimlich vnd nutzlich konten handeln. Sonder vmb der jungen kinder willen / ist er aus grosser nott also verfast vnd zusamen gebracht. Sinteinmal das die teglich erfahrung gibt / das / wer kinder leren wil / der mus inen nicht zu viel auff ein mal fûrgen / vnd das ihenig / das er in fûrgibt / offt vnd dick / ymmerdar in ainerlay weys vnd worten wieder fûrtragen. Dann wann man in ytzo diß / ytzo ihenes / ytzo mit diesen / ytzo mit andern worten fûrsagt / so behalten sie nicht allein nichts daruon / sonder werden auch nur vngeschickter / vnd vnachtsamer zu lernen dann sie vor warn.

Dieweil dann wol zu besorgen gewest / es wûrd nicht ein yeder Pfarherr oder Prediger die mûhe auff sich nemen / den Catechismon also zu fassen / das er in ain mal wie das ander leret / Darzu nicht vonnöten / ein yeden in sonderhait mit solcher arbeit zu beladen / Auch da mit es an einem ort / wie am andern gehalten wurde / welches bey dem gemainen man / viel ergernus fûrhûtet / So ist inen / hie mit dieser arbeit gedienet. Auff das die kinder / den anfang Christlicher leer / von vns dester leichter mögen begreifen / vnd behalten / Dann wann das geschicht / werden sie nicht allein alle andre leer dester bafs verstehn / sonder auch feine / fromme / Christliche / geschickte vnd weyse leut / zu allerlay Christlichen stenden vnd ambtern werden / Darzu billich vatter vnd mutter / pfarherr vnd prediger / vnd alle Christliche Obrigkeit fleissig fûrdern vnd helfen sollen / Da geb Gott sein gnad zu / Amen.

Catechismus oder Kinder predig.

Von den Zehen gebotten.

Gemainer anfang zu allen Predigen.

Gnad / fried vnd barmhertzigkeit / sey mit euch
allen / von Gott dem Vater / vnd von seinem aingepornen
Son / Ihesu Christo / vnserm **DEAN** / Amen. Etwas nützlichs
vom Wort Gottis zu reden vnd zu lernen / begert gnad / vnd
sprecht ein Vater vnser.

*Gemainer anfang / nach dem Gepet / zu allen
Predigen von den Zehen gepotten.*

Weine liebe Kindlein / es spricht der
Prophet David: Kompt her jr Kindlein / vnd Psal. 34
hört mir zu / Ich wil euch die furcht des **DEAN**
AN lernen. Wer ist / der guts lebens begert /
vnd gern gute tage hett? Der behüt sein Zungen
vor bösem / vnd sein Leben / das sie nicht falsch reden. Las vom
bösen / vnd thue guts / such fried, vnd sage ihm nach.

Nun weis ich wol / meine liebe Kindlein / das jr gern gute tag
hett / vnd gern feine Leut würdet / Darumb solt jr dem Propheten
David folgen / vnd mit allem fleis / weil jr noch jung seit / die furcht
des **DEAN** lernen / Dann was man in der jugent nicht lernt /
das lernt man im alter noch schwerlicher. Darumb spricht auch
der Prophet David / Kompt her jr Kindlein / das die Kindlein ge
schickter sein zum lernen / dann die alten.

So lernt nun mit allem fleis die furcht des **DEAN** / meine
liebe Kindlein / so wert jr feine Leut werden / vnd gute tag vber
kommen / Dann gute tag kommen nicht vom gewalt oder Rei
chtumb

chtumb / sonder von der furcht des **HEERN**. Wer aber den
HEERN fürchtet / als ein Allmechtigen Gott vnd **HEERN** /
der den frommen als guts thut / vnd die bösen ernstlich strafft /
der wirt sich gewislich mit allem fleis hüten / das er nichts wider
sein Göttlichen willen thue / sonder wirdt from sein / vnd die gepot
Gottis fleissig halten / so viel im immer möglich ist. Das wer-
den dann feine geschickte Leut / die andern Leuten auch nütz sein /
Psal. iii. vnd viel guts thun können / wie David spricht / Der anfang aller
weishait / ist die furcht des **HEERN**.

Wann jr nun Gott fürchtet / vnd wolt gern from sein / vnd
thun was im wolgefelt / so lernet die heilige zehen gebot / die Gott
der **HEER** selbs durch Mosen von Nimel herab hat geben / vnd
vns darin gelert / was im wol oder vbel gefall / das ist / was recht
oder vnrecht sey / so habt jr warlich den anfang aller weishait.
Dann gedencckt doch mit fleis meine liebe Kindlein / ob nicht das
eine grosse weishait sey / wann die jungen Kindlein / fein wissen /
was recht oder vnrecht ist / was man thun oder lassen sollt? Es ist
ye ein grosse weisheit / welche wol auch viel alte Leut nicht wissen.
Nun lernet man aber solchs in den zehen geboten / vnd ist dannoch
nur der anfang der weishait / Dann im heiligen Christlichen Glau-
ben lernet man noch grössere vnd höhere weishait / welche kain Un-
glaubiger nie gefunden oder begriffen hat / sonder Gott gibts al-
lain vom Nimel herab / denen / die in fürchten / vnd seinem heil-
gen Wort glauben.

Darumb lernet ytzo mit fleis den anfang der weisheit / das
ist / die heiligen zehen gebot / vnd spricht mir dieselbigen / fein ge-
mach vnd haimlich nach / auff das irs mercken / vnd daheim auch
fein nachsagen können.

**Folgen die zehen gebot / wie die alweg den
Kindern vorgesagt / vnd von ihn
haimlich nachgesprochen
sollen werden.**

Das

Das sein die heiligen zehen gebott Gottis Herrn.

Das Erst.

Ich bin der HERR/dein Gott / Du solt nicht
andere Götter neben mir haben.

Das Ander.

Du solt den Namen des HERRN / deines
Gottis / nicht vergeblich führen. Dann der
HERR wirdt den nicht unschuldig halten / der
seinen Namen vergeblich füret.

Das Dritt.

Gedenck des Sabbathis / das du ihn heiligst.

Das Viert.

Du solt dein Vater vnd dein Mutter ehren/
auff das du lang lebest / im Land / das dir der
HERR dein Gott geben wirdt.

Das Fünfft.

Du solt nicht tödten.

Das Sechst.

Du solt nicht Ehebrechen.

Das Siebendt.

Du solt nicht stelen.

Das Achte.

Du solt kein falsch zeugnis geben / wider deinen
Nechsten.

en/als Gott vnsern **DEXXEN**. Noch viel weniger sollen wir/
die Creatur/so hertzlich lieb haben / als Gott vnsern **DEXXN**.
Dann wann wir irgen ein Creatur / im Dimel oder auff Erden/
also fürchteten/oder jr also vertraweten / oder sie also lieb hetten/
so hielten wirs für vnsern Gott / vnd machten also ein andern/
frembdē/falschen Abgott daraus/das were dann ein grosse/greuz
liche/vnd erschreckliche Sünd/wider das Erst gebot Gottis/die
der **DEXX** / der der recht war Gott ist / on zweifel nicht vnges
strafft lies. Dann er spricht / Ich bin der **DEXX** / das ist mein
Nam/mein ehr wil ich keinem andern geben / Das ist / Er wil
nicht leiden/das man etwas anders/für ein Gott halt / oder dem
selbigen Göttliche ehr erzaig/weder im hertzen/ noch in worten/
noch in wercken.

Nun möcht jr Kindlein also gedenccken / Wie können wir an
dere Götter neben dem **DEXXN** haben / ist doch sonst kein Gott
mehr vberal/dann nur allein der einig Gott vnd **DEXX** / der Di
mel vnd Erden erschaffen hat. Antwort / Ja freilich ist sonst kein
ander Gott/dann nur der **DEXX** allein / das glaubt nur festig
klich/meine liebe Kindlein / vnd zweifelt nicht daran. Aber nichts
bester minder / halten ye zu zeiten die vnuerstendigen / vngottsfür
chtigen Leut etwas für ein Gott / das doch an jm selbs kein Gott
ist / noch sein kan/wie wol sie / solchen iren irthumb / selbs nicht ver
stehen / noch mercken können. Dann gleich wie man offt ein Wen
schen für from helt / der doch nicht from ist / oder für reich / der
doch nicht reich ist / oder für Edel der doch nicht Edel ist. Also helt
man auch offt ein ding für ein Gott / das doch nicht Gott ist / vnd
dasselbig geht also zu.

Zum Ersten / wann ein mensch etwas anders / dann Gott den
DEXXN / also vbel fürchtet / das er gedencckt / wenn mir das wi
derwertig vnd feind ist / oder wann ich dem nicht entfliehen kan/
so ist es alles verlorn mit mir / so wais ich nicht wo ich bleiben sol/
so kan mir niemandt helffen / vnd der gleichen / So helt er ge
wislich dasselbig für ein Gott in seinem hertzen / wann ers gleich
mit dem mund nicht also nennet / Ja wann ers gleich selbs nicht
bedenckt oder verstehet. Es sol aber nicht sein / Sonder wir sol
ten also gedenccken/Wollan / wann mir gleich / dis oder das wi
derwertig vnd feind ist / oder wann ich diesem oder ihenem vn
glück schon nicht entrinnen kan / ich will darumb nicht verza
gen / oder von fürcht wegen vnrecht thun / Ist es doch kein
Gott / vnd kan mich nicht verdammen / Ja es kan mir auch nicht
ein har von meinem haubt nemen / on den willen des **DEXXN** der
der einig recht vnd war Gott ist / Derselbig ist auch mein Gott / den
wil ich fürchten mehr / dann die Creatur / vnd wil recht thun. Mus
ich etwas vmb der gerechtigkeit willen / oder vmb vnschuld lei
den/

den / so wirdt er mich wol erretten / ja er kan mich auch wol behü-
ten / das es darzu nicht kompt.

Zum andern wann ein Mensch sein vertrauen / auff etwas
andere dann auff Gott den **HEXEN** / also gar setzt / das er ge-
denckt / wann ich / das hab / oder wann mir das wol wil / so hat es
kein not / mehr vmb mich / so darff ich nichts mehr / so bin ich reich
vnd selig / vnd dergleichen. So helt er gewislich dasselbig für ein
Gott in seinem hertzen / wann ers gleich mit dem mund nicht also
nennet / Ja wenn ers / gleich selbs nicht versteht. Das sol aber auch
nicht sein / Sonder wir sollen also gedencken / Wolan / wann
mir das gleich wol wil / oder wann ich gleich dis vnd das vber-
kommen hab / so ist mir darumb noch nicht geholffen / Ist es doch
kein Gott / kan mich auch nicht selig machen / noch aus Gottis
zorn erretten / Sonder der **HEXEN** allein ist Gott / wann ich den er
zürn / so kan er mirs wol wider nemen vnd entziehen / oder kan
sonst wol machen / das es mir nichts nützlich ist / sonder nur schaden
bringt / Darumb sol man Gott den **HEXEN** fürchten / vnd auff
in allein vertrauen.

Zum Dritten / wann ein Mensch etwas anders / dann Gott
den **HEXEN** also hertzlich lieb hat / das er vmb desselbigen wil-
len / alles gern vnd williglich thut / was er nur thun kan / Gott
geb es sey recht oder vnrecht / So helt er gewislich dasselbig auch
für ein Gott / wann ers gleich mit dem mund nicht also nennet.
Das sol aber auch nicht sein / sonder wir sollen also gedencken / Ey
warumb wolt ich vmb des dings willen vnrecht thun? Ist es
doch kein Gott / hat mich auch nicht erschaffen / kan mich auch
nicht selig machen / oder von keinerley vnglück erretten / Darumb
wil ich Gott mehr lieb haben / vnd auff seinen Göttlichen willen
allein sehen / vnd im gehorsam sein.

Da sehet jr nun sein / meine liebe Kindlein / wie man auff diese
drey weys / nemlich / mit fürchten / vertrauen / vnd lieben / ein
ding für ein Gott helt / vnd zu einem falschen Abgott macht / das
doch an im selbs kein Gott ist / Das ist aber ein grosse / schwere /
vnd greuliche Sünd / wider dis erst Gebott des **HEXEN** / das
solt jr mit allem fleis mercken / vnd euch darvor hüten / Vnd da-
mit jrs dester das verstehn könt / wil ich euch auch etliche Exem-
pel darzu geben.

Etliche Menschen fürchten das Gestirn so sehr / wann sie be-
düncet / oder wann sie von andern Leuten hören / es zaig oder troe
ein künfftig vnglück / so haben sie kein hoffnung / das sie Gott dar-
vor behüte vnd erretten werd / sein so verzagt / das sie nicht wissen /
was sie thun sollen Etlich halten dafür / wann die Son / oder der
Mond

Wonn oder einander Planet / in diesem oder ihenem zaichen ist / so soll man dis oder das nicht anfahen / es sey vnglückhafft / fahen nichts newes an / dan sie glaubē / es werde nicht wol hinaus gehn / Vnd ist solchs Aberglaubens viel vnter den Leuten / Diese Leut halten alle / das Gestirn / vnd die zaichen am Dimel für Götter / gleich wie vorzeiten die Waiden auch theten. Aber der heilig Prophet Jeremias / der warnet vns daruor / vnd verpeuts vns / dann er spricht / Ir solt euch vor des Dimels zaichen nicht furchten / wie die Waiden sich furchten / dann der Waiden Götter sein lauter nichts.

Desgleichen furchten sich etliche so vbel vor den Tyrannen / das sie vmb iren willen / Gottis Wort / vnd die warheit nicht bekennen / sonder verlaugnen vnd verlestern dieselbigen. Solche leut halten die Tyrannen für ire Götter / dann sie mainen / wann sie ir gonst haben / so stehe ir sacht vberal recht. Aber David warnet vns daruor / vnd spricht. Verlast euch nicht auff Fürsten / auff ein menschen kind / er kan doch nicht helfen / dann sein gaist mus ausfarn / vnd er wider zu seiner erden komen / als dann sein verlorn alle sein anschleg.

Etliche Menschen die setzen all ir vertrauen auff gut vnd gelt / vnd mainen / wann sie reich seyen / so haben sie alles was sie bedürffen / Darumb werden sie geitzig / reysen vnd kratzen / schinden vnd schaben / wo sie können vnd mögen. Solche Leut halten das Gelt für iren Gott. Der heilig Paulus aber warnet vns daruor / vnd spricht / Wir sollen den geitz abthun / dann es sey ein Abgötterey.

Desgleichen setzen etliche Menschen all ir vertrauen / auff ire aigne werck / vnd mainen / sie wöllen ir Sund mit bezalen / Gottis zorn versönen / from / gerecht / heylig / vnd selig dardurch werden. Solche Leut halten ire aigne werck für iren Gott. Das ist aber die gröst Abgötterey auff Erden / vnd ein verlaugnung des glaubens an Christum / wie ir dann hernach vom Glauben sein werd hören vnd lernen.

Etliche Menschen haben iren Pauch so lieb / das sie fressen vnd sauffen / vnd alles das dem Leib wolthut / für die größten seligkeyt halten / also das sie vmb desselben willen / Gott verachten / vnd sein gar vergessen. Solche Leut halten den Pauch für iren Gott / wie der heilig Paulus sagt / von denen / die das Euangelion / vmb ires nutz willen vnrecht predigten. Dann er spricht / Der Pauch ist ir Gott / vnd ir ehr wirdt zu schanden.

Aus diesen Exempeln könt ir nun sein verstehen / vnd mercken /
meine

meine liebe kindlein wie man mit fürchten / vertrauen / vnd lieben ein ding für ein Gott helt / das doch in der warheit kein Gott ist / sonder man macht ein falschen abgott daraus / vnd sündigt also schwerlich wieder das erst gebot / daruor sollen wir vnns fleissig hüten.

Aber vber das alles / ist noch ein weis / da man auch aus dem rechten warn Gott ein falschen abgott macht / das geschicht / wann wir Gott anderst in vnser hertz bilden / dann er ist / Oder anderst von im halten / dann wie er vns durch sein wort gelert / vnd beuolhen hat. Als wann wir glauben / er mach ein menschen in der kütten lieber selig / dann in einem andern erbarn Kleid / oder / lass ihm den gotts dienst wolgefallen / den er doch selbst nicht gehaissen noch beuolhen hat / solcher abeglaub oder falscher won / mache auch aus dem rechten Gott ein abgott / vnd ist auch ein greuliche sündt wieder dis erst gebot / daruon aber werd ihr in andern predigen zu seiner zeit mehr hören.

Darumb meine liebe kindlein / hüt euch mit allem fleis / das ic kein andern Gott in ewrem hertzen habe / sonder last den Herrn ewern Gott sein / dan er wils auch gern thun. Darumb spricht er Ich bin der Herr dein Gott / das ist / Ich bin ewer Herr / vnd ewer Vater / vnd wils auch gern sein / vnd wil euch alles guts thun allein fürchtet mich als ein Herr / vnd seit mir gehorsam / vertrauwet mir / vnd rufft mich an / vnd habt mich lieb als ein Vater.

Vnd wir solten zwar den Herren von hertzen fleissig darumb bitten / das er vnser Gott sein wolt. So ist er so gnedig vnd freunde lieb / das er vns vor kompt / eh wir in darumb bitten / vnd spricht Sibe / ich bin dein Gott / vnd wils auch gern sein / halt mich nur dafür. Wan er aber spricht / Ich bin dein Gott / So ist es eben so viel gesagt / als sprech er / Ich wil dir alles guts thun / was dir an ligt / das klag mir / so wil ich dir helffen / Vnd was du bedarffst / das bit vnd beger von mir / so wil ich dirs geben. Das solt ihr kindlein mit allem fleis mercken / vnd in das hertz bilden / so wert ihr Gott den Herrn vber alle ding fürchten / lieb haben / vnd im vertrauen. Dann das ist die maynung vnd der recht verstand dises ersten gebots / Das man Gott den Herrn vber alle ding sol fürchten vnd liebhaben / vnd im vertrauen.

Darumb mein liebe kindlein merckts mit fleis / vnd wan man euch fraget. Wie verstehstu das erst gebott?

So solt jr also antworten.

Wir sollen Gott den Herrn vber alle ding fürchten vnd liebhaben / vnd im vertrauen.

Beschlus

Beschluß.

Also habt ihr / meine liebe kindlein / den rechten / gemainen / ainfeltigen verstand / dieses ersten (oder andern / oder dritten / oder welches daffur aufgelegt ist worden) gebots / den sollt ihr mit allem fleis mercken / vnd Gott den Herrn von hertzen fürchten / das ihr disß gebot nicht vbertrettet / Dann was er gebet / das ist recht / gut / vnd heilig / Was er aber verbiet / das ist vnrecht / sünd vnd schand. Er wil aber ernstlich / das man seine gebot halt / vnd nicht veracht / dann er spricht / Ich der Herr dein Gott / bin ein starcker eyferiger Gott / der vber die / so mich hassen die sünd der Väter hainsucht an den kindern / biss ins dritt vnd vierde gelide / Aber denen / so mich lieben / vnd meine gebot halten / thue ich wol in tausent gelide. Das ist / Gott troet zu straffen alle die diese gebot vbertreten. Darumb sollen wir vns fürchten vor seinem zorn / vnd nicht wieder solche gebot thun. Er verhaist aber genad vnd alles guts / allen / die solche gebot halten. Darumb sollen wir in auch lieben / vnd im vertrauen / vnd gern thun nach seinen geboten.

Exo. 20.

Darumb meine liebe kindlein / sollt ihr Gott fürchten / vnd seine gebot mit fleis halten / vnd in vmb gnad vnd hilff bitten / das irs auch thun könt. Dann die fürcht des Herrn / ist ein anfang aller weisheit / vnd macht fromme geschickte leut / die Gott wolgefallen / vnd andern leuten auch nutz sein können. Daraus volget dann frid vnd ruhe / ehr vnd gut / vnd gute tag / wie ihr am anfang gehört habt. Vnd wann wir also in Gottes gehorsam vnd rechtem glauben verharren biss an das end / so gibt vns Gott das ewig leben darzu / Das verleyhe vns Gott allen / Amen.

Dieser obgeschribner gemainer beschluß sol zu einer jede predig in sonderheit / nach der Frag vnd Antwort am end gelesen werden / so lang man von den zehen geboten predigt.

Vnd wie die erst predig von den zehen geboten angefangen vnd beschloffen ist / also sollen die andern auch angefangen vnd beschloffen werden.

Die ander

Die ander Predig.

Auslegung des Andern gebots.

Un habt jr am nechsten gehört / wie jr das Erst gebot verstehn solt / darinnen wir lernen / wie vnser hertz gegen Gott stehn sol. Darumb folget yetzt hernach das Ander gebot / das lautet also.

Du solt den namendes **HEXXN** / deines Gottis nicht vergeblich füren / dann der **HEXXN** wird den nicht vnschuldig halten / der seinen Namen vergeblich füret.

Und das Gebot / meine liebe Kindelein das lehret vns / wie wir vns mit den worten gegen Gott halten sollen / nemlich also / das wir den Namen des **HEXXN** vnd alles was man von Gott guts sagt / nicht vergeblich / oder zu vnnutzen dingen brauchen sollen / sondern allein / wann es Gott zu lob vnd ehr / vnd vnserm Nechsten zu nutz kombt / auff das yederman an vnsern worten merck / das wir Gott in vnserm hertzen / herrlich vnd gros halten / fürchten vnd lieb haben / dann dardurch werden ander Leut auch geraitzt / den namen Gottes zu ehren. Wann wir aber leichtfertiglich mit dem namen Gottis vmbgehn / so ergern sich ander Leut darab / lernens von vns / vnd werden auch böß / so sein wir dann an irer Sund schuldig. Nun spricht Christus im E-
uangelio / es wer besser / das ein mensch ertrenckt wurde. dann das er ergernus gibt / darum meine liebe Kindelein / nembts zu hertzen / merckts / vnd misbraucht den namen Gottis nicht. Mat. 18.

Es heist aber nicht allein / das der Name Gottis / wenn man Gott / den Vater / oder den **HEXXN** Christum / nennet / sonder alles das / was man von Gott guts sagt / vnd sagen sol. Gleich wie man sonst in der gemain zu reden pflegt / vnd spricht / Der man hat einen guten Namen / das ist / man sagt viel guts von jm / oder / Der hat einen bößen Namen / das ist / es geht ein böß geschrey vber in. Also auch / haist das Gottis namen / was man von ihm guts sagt / als das er gerecht / warhafftig / barmhertzig / vnd gütig sey.

Nun merck mit fleis meine liebe Kindelein / das der **HEXXN**
b nicht

nicht spricht / Du solt den namen des **DEXX** heines Gottis gantz vnd gar nicht fürn/gebrauchen oder nennen / Sonder er spricht allein / du solt in nicht vergeblich fürn / dann der **DEXX** kans wol leyden/ vnd sichs gern/ das wir seinen namen fürn vnd nennen. Wann es nur nicht vnnützlich vnd vergeblich geschicht/ sonder Gott zu ehren/vnd vns oder vnsern Nächsten zu gut kombt.

Darumb solt jr auch fleissig lernen/vnd mercken / in welchem stucken man Gottis namen vergeblich füret / auff das jr euch könt darvor hüten / vnd nicht sündiget . Es wirdt aber der nam Gottis in viel stucken vnnützlich vnd vergeblich genennet.

Zum Ersten/wann man etwas ein Gott nennet / oder wie ein Gott ehret/lobet vnd preiset/das doch nicht Gott ist/als die Waiden vor zeiten gethon haben/die da die Sonnen/den Monn vnd die Stern /auch etliche menschen/als König vnd Tyrannen Götter nenneten. Auch wie die Juden theten/ die das gülden Kalp anbeteten/ vnd sprachen/ Das ist der Gott/der vns aus dem Eyp-
Exo. 32. ten land gefürt hat. Vnd das ist meine liebe Kindlein ein solche grosse Sund/das Gott der **DEXX** im Alten Testament geboten hat/wann es ein mensch thu/so sol man in erwürgen / vnd wans
Deut. 17. ein gantze Stat thu/so sol mans zerstörn/ verbrennen / vnd alles vmbbringen was darinnen ist . Darumb sollen wir vns auch fleissig vor dieser Sund hüten/ es wirdt vns sonst Gott gewislich an leib vnd Seel hertigklich straffen.

Zum Andern/nennet man Gottis namen vnnützlich vnd vergeblich/wann man bey seinem namen vnrecht vnd falsch schwert/ es sey gleich vor Gericht/oder in teglichen geschefften. Auch wann die Oberkeit vnnötige vnd leichtfertige Aid auffleget/der man wol geraten könt. Darumb solt jr euch fleissig darvor hüten / vnd für euch selbs aus böser gewonheit nichts schweren / sonder ihr solt thun/wie vns der **DEXX** Christus lehret. Dann er spricht/*Matth. 5.* Er red sey ja ja/ nain nain. Wann jr aber ye schweren müßt / das euchs die Oberkeit aufflegt/ so schwert nicht vnrecht / sonder sagt die warheit/vnd halt trewlich / was jr zugesagt vnd geschworen habt. Vnd ob jr ins Regiment kombt / wann jr alt weret / so gebt nicht vrsach / das man leichtfertige vnd vnnötige Aid schweren mus/dann was man mit vnnötigen Aid schweren sündiget / das sündigt die Oberkeyt die es auffleget / vnd nicht die Untertanen/
Roma. 13. die aus not müssen gehorsam sein / vmb des gewissens willen.

Zum Dritten / nennet man den namen Gottis vnnützlich vnd vergeb-

Zum Dritten nennet man den Namen Gottis vnnützlich / vnd
vergeblich / wann man damit fluchet / welches Laster zu dieser
zeit sehr vberhand hat genomen. Also das yetzo nicht allein die
Menner / vnd jungen Gesellen / sonder auch die Weiber / vnd Jung
frawen / ja auch die jungen Kinder / auff's aller greulichst fluchen /
nicht allein wann sie zornen / sonder auch wann sie guter ding sein /
so fluchen sie / on alle not / gleich als were es eine tugent vnd
wolstand / So es doch ein solche grosse Sünd vor Gott / vnd ein
solche schand vor der welt ist / das es niemand / genug sagen kan.
Dann der heilige Paulus spricht / Es biegen sich im Namen des philip. 2.
HERRN alle kne / die Himlischen / jrdischen / vnd Dellischen.
Das ist / es ehren nicht allein die Engel / vnd die menschen / vnsern
HERRN vnd Gott Ihesum Christum / Sonder auch die Teuffel in
der Welle / erschrecken ab seinem Namen / vnd müssen im ehr erpie-
ten / vnd sich gegen im naigen / wann sie in hören nennen.

So bedenckt nun meine liebe Kindlein / ob nicht die Leut / die
so greulich fluchen / erger vnd verstockter seyen / dann der Teuffel
selbs / dieweil sie dem namen Gottis kein ehr thun / nicht darnor er
schrecken / ire kne nicht biegen / Sonder fluchen bey Gottis na-
men / bey seinem leyden / bey seiner marter / bey seinen wunden / bey
seiner krafft / vnd andere grosse greuliche fluch / die ein Christ auch
nicht nennen sol. Vnd wünschen darzu irem Nechsten / in solchem
fluchen alles vnglück das sie erdencken können / so sie doch den Ne-
chsten solten lieb haben als sich selbs. Darzu ist das auch vberaus
vnrchristlich / das der nam Gottis sol zum fluchen misbraucht
werden / so man doch alleindarmit segenen / vnd ye einer dem an-
dern alles guts darmit wünschen sol.

Darumb solt jr nicht zweifeln / wann ihr ein menschen also
höret fluchen / vnd den namen Gottis so lesterlich misbrauchen /
Er ist im selben fal / blinder vnd erger / dann der Teuffel selbs /
dann der Teuffel / fürcht sich vor dem namen Gottis / vnd naiget
sich / vnd thar selbs nicht also toben / vnd fluchen mit dem namen
Gottis. Darumb hat auch David von solchen Leuten recht psal. 5.
vnd wol gesagt / Ir schlund ist ein offens Grab. Dann gleich wie
der todten stanck / aus einem offnen Grab / zeugnis gibt / das ein
stinkends Als darinnen ligt / also geben die greulichen fluch / die
aus des menschen rachen gehn / auch zeugnis / das ein todte Gott
lose Seele darinnen steckt.

Darumb meine liebe Kindlein / hütet euch mit allem fleis / das
jr nicht fluchen lernet / vnd gewonet / Ja wann jr ander leut hört
fluchen so fluchet darvon / vnd denckt / ich möcht des fluchens
auch gewonen / wann ich zuhöret / so wer ich dann auch erger
dann der Teuffel.

Zum Vierten/nennet man Gottis namen vnnützlich vnd vergeblich/wann man vnnütze / leichtfertige / lecherliche fabel vnd Merlein von Gott / vnd von Göttlichen dingen schwätzet/vnd die wort Gottis darzu misbraucht / vnd ein lecherlichen schertz / vnd gespot daraus macht/dann es wirdt Gott dardurch geunehret / vnd kombt sein wort in verachtung / das bringt dann erger nus/vnd schaden am glauben.

Zum Fünfften/nennet man Gottis namen vnnützlich vnd vergeblich/wann man zauberey darmit treiben wil. Vnd das ist nicht allein ein Sund/sonder auch ein grosse mechtige thorheit/Dann das solt jr Kindlein für gewis halten / das es nichts mit der zauberey ist/sonder ist eitel betrug vnd lügen / von bösen Zauben erdacht / die einfeltigen Leut / zu nerren vnd zueffen / wie das viel Leut mit irem schaden erfarn haben. Darumb hüt euch darvor/glaubet nicht daran/lernets nicht / vñ fürchtet euch nichts darvor/es ist nichts/dann das der Teuffel dardurche grosse Sund anricht/das man Gottis namen misbraucht / in mancherley Aberglauben felt/vnd eins dem andern verdecktig wirdt / Daraus dann feindschafft/zorn/neid/bass/affterred/vnd alles vbel entsteht/das gefelt dann dem Teuffel wol. Aber Gott hat es verboten/vnd gesprochen/man sol die Zauberer nicht leben lassen.

Exo. 22.

So fürchtet nun den **YHWH** / meine liebe Kindlein / vnd misbraucht seinen heiligen Göttlichen namen nicht / treibt nicht Abgötterey / schweret nicht felschlich / schelt vnd flucht nicht / schwätzt nicht leichtfertiglich von Göttlichen dingen / treibet kein zauberey / Dann Gott der **YHWH** hat bey dem Gebot sonderlich getroet / er wöls nicht vngestraft lassen. Darumb hat Moses hin zu gesetzt / Der **YHWH** wirdt den nicht vnschuldig halten/der seinen namen vergeblich füret/das solt jr Kindlein nicht verachten / Ir solt auch nicht gedencen/ey es schadet nicht / es sein nur wort / es ist mein ernst nicht / es gehet nicht von hertzen / vnd dergleichen. Nain bey leib gedenc nicht also / Sonder hütet euch mit fleis/das jr den namen Gottis nicht vnnützlich brauchet / weder in schimpff noch in ernst/dann er ist heilig / vnd sol auffs aller ehrlichst vnd heiligst gehalten werden. Wers aber nicht thut / den wil der **YHWH** nicht vnschuldig halten / oder sein lassen / sonder er wil in ernstlich straffen. Wann aber der **YHWH** strafft / so schickt er Franckheyt / sterben / tewrung / armut / krieg / böse schedliche wilde Thier / rauberey vnd morderey / vnd der gleichen / darmit bezalt er vnser Sund. Darumb sollen wir sein zorn fürchten / vnd sein namen nicht misbrauchen.

Wir mügen aber seinen namen wol gebrauchen / zum guten /
wir

wir seins auch schuldig zuthun / das solt jr meine liebe Kindlein fleissig mercken. Es wirdt aber sein name furnemlich in dreien stucken wol gebraucht / Nemlich im anruffen / bekennen / vnd danck sagen. Darumb sein wir auch schuldig / den namen Gottis in diesen dreyen stucken immerdar zugebrauchen.

Zum Ersten / sollen wir in anruffen in allerley not / vnd anligen / vnd vnser zuflucht nicht haben zur zauberey / vnd andern vnderordenlichen dingen. Dann es spricht der **DEUX** / Ruff mich an zur zeit der not / so wil ich dich erhören / vnd du wirst meinen namen preisen. Da hört jr Kindlein / das es Gott der **DEUX** von vns wil haben / das wir in anruffen sollen / vnd sonst niemand / vnd sollen das thun in der zeit der not / wann es vns übel geht. Darumb sol auch niemand verzagen / oder verzweiffeln / es gehe jm als übel als es immer wöl / Sonder sol den **DEUX** anrufen / der kan vnd wil jm helffen / es sey die not als gros sie immer wöl / darumb spricht er auch / ich wil dich erhören. Psal. 50.

Vnd da solt jr Kindlein fleissig mercken / das ihr schuldig seit zu beten / vnd thut Sund / wann jr nicht betet. Darumb solt jr das Vater vnser lernen / vnd teglich beten. Dann das Gebot / lehret vnd treibet vns zu beten / dieweil es befielhet / man soll Gottis namen nicht vnnützlich / sonder nützlich brauchen. Es wirdt aber der name Gottis nirgen nutzlicher gebraucht / dann wann man betet. Darumb wer nichts betet / der helt das ander Gebot nicht / das wirdt dann der **DEUX** nicht vngestraft lassen.

Zum Andern / sollen wir den namen Gottis bekennen / das ist / wir sollen vnsern Glauben / vnd alles was wir von Gott / vnd vnserm **DEUX** Ihesu Christo guts wissen / frey bekennen / vnd nicht verlaugnen / wann man vns schon darumb feind wirdt / vnd verfolgen wil. Dann es hat vns Christus im Euangelio getröst / vnd gesprochen / Fürchtet die nicht die den leib können tödten / vnd die Seel nicht. Vnd abermals spricht er / Es wirt nicht ein har von ewerm haubt fallen / on den willen ewers Vaters im Himel. Darumb sollen wir feck sein / vnd vns nicht erschrecken lassen / sonder Gottis wort vnd vnsern Glauben bekennen / vnd ander Leut auch vnterrichten vnd lehren / ein yeder nach seinem beruff / auff das alle menschen zu erkantnus der warheit kommen. Vnd wann wirs nicht thun / so thun wir Sund / vnd werden darumb verdambt werden. Dann der **DEUX** Christus spricht / Wer mich bekennet vor den menschen / den wil ich auch bekennen vor meinem Vater im Himel. Wer sich aber mein schemet vor den menschen / des wil ich mich auch schemen / vor meinem Vater im Himel. Matth. 104
Luce 21.
Mar. 8.
Luce 12.

Zum Dritten/sollen wir den namen Gottis preisen vnd ihm
für alle wolthat/die er vns erzeiget hat / vnd noch teglich erzeiget/
lob vnd danck sagen. Wie der **DEXX** spricht/Ruff mich an in der
zeit der not/so wil ich dich erhören/vnd so wirstu dann meinen na-
men preisen. Da höret jr meine liebe Kindlein/das vnser **DEXX**
vns darumb erhöret / vnd alles guts thut / das wir in darumb
loben vnd preisen sollen. Darumb wann wir beten wollen / sol-
len wir Gott auch dancken/vnd in loben vnd preisen / für die gu-
ter/die er vns vor hat geben / so erhört er vns dester lieber / vnd
wirdt auch vnser Glaub gesterckt / wann wir bedencken / wie vns
Gott vor offi erhört vnd geholffen hab / das wir nicht zweifeln er
wert vns yetze auch erhören. Darumb spricht David/ Ich wil den
DEXX anruffen mit loben/ so wird er mich von meinen feinden er-
lösen. Das solt nun jr meine liebe Kindlein auch lernen / vnd ge-
wonen/das jr Gott zum ersten lob vnd preis sagt / für alle seine
wolthat / vnd darnach betet/vnd Gott anruft in ewerm anligen/
so wirdt Gott dester williger zu erhören / vnd ewer Glaub dester
stærcker. Dann wer beten wil / der sol glauben / das sein Gebet er-
hört werd.

Psal. 15.

Also solt jr nun dis Gebot verstehen / das ihr den namen des
DEXX nicht vergeblich furet/das ist das jr in nicht zur Abgöt-
terey brauchet/nicht schweret/nicht fluchet / nicht vnnütze Sabel
von Gott schwetzet/nicht zauberey treibet/dann Gott lasts war-
lich nicht vngestraft / Sonder jr solt den namen des **DEXX**
nützlich brauchen/zu der ehr Gottis /vnd besserung des nechsten/
mit anruffen/bekennen / vnd preisen. Dann das ist die meinung/
vnd der recht verstand / dieses andern Gebots / das wir Gott den
DEXX über alle ding sollen fürchten vnd lieben / das wir mit
seinem Namen nicht Abgötterey treiben / noch schweren/fluchen/
spotten/zaubern / oder liegen vnd triegen / sonder denselbigen in
allen nöten anruffen/bitten/bekennen/loben vnd dancken.

Darumb meine liebe Kindlein/ merckts mit fleis / vnd wann
man euch fraget.

Wie verstehestu das Ander gebot?

So solt jr also antworten.

Wir sollen Gott den **DEXX** / über alle ding fürchten / vnd
lieben / das wir mit seinem Namen nicht Abgötterey treiben / noch
schweren / fluchen / spotten / zaubern / oder liegen vnd triegen / son-
der denselben in allen nöten anruffen / bitten / bekennen / loben vnd
dancken.

Die drit

Die dritt Predig.

Auslegung des Dritten gebots.

In habt jr am negsten gehört / wie ihr das Ander gebot verstehen solt / darin wir lernen / wie wir vns mit den worten gegen Gott sollen halten. Darumb folget yetzo hernach das Dritt gebot / das lautet also.

Gedenck des Sabbathis das du in heiligst.

Vnd das Gebot / meine liebe Kindlein lehret vns / wie wir vns gegen Gott sollen halten / mit den wercken. Nemlich also / das wann wir Gott wollen dienen / vnd im / als vnserm rechten **DEIN** / den aller besten gehorsam erzeigen / So sollen wir weder dis noch das eusserlich werck furnemen / sonder ein Feiertag halten / vnd denselbigen heiligen / das ist zu eitel heiligen wercken / vnd Götlichen sachen brauchen.

Vnd da solt jr Kindlein mit fleis mercken / das den Juden im Alt en Testament geboten ist gewesen / das sie allweg am siebenden tag / musten halten ein Sabbath / das ist ein Feiertag / darumb man noch heutigs tags / den selben tag / Sabbathis tag / oder Sambats tag nennet. Aber wir Christen im Newen Testament / sein solchen geboten / von vnterscheid / der zeit vnd speis / vnd was mehr der gleichen ist / nicht vnterworffen / sonder sein frey / mögen feirn / welchen tag wir wollen / allein das man den Feiertag recht vnd wol brauch. Darumb das solche Christlich freiheit / bezeugt / vnd erhalten werd / feiren wir nicht mehr den Sambstag / wie die Juden / sonder nur den Sonntag / vnd etliche tag mehr / wie es die Oberkeit fur nutz vnd gut ansihet / der sol man hierin folgen.

Auff das jr aber das Gebot recht vnd wol verstehet / So merckt mit fleis meine liebe Kindlein / wie ein wunderlich gebot es ist. Dann wann wir einen menschen zu einem Derrn haben / vnd sollen im dienen / so schafft er vns mancherley werck die wir im zu nutz vnd zu gefallen thun sollē. Unser Dergott aber thut im nicht also / Dann er heist vns weder dis noch das werck thun / er heist vns nicht opffern / nicht lichtlein anzunden / nicht bilder schmückē / nicht wallen gehen / noch andere solche heuchlerische werck / vnd falschen Gottesdienst treiben / wie man vns vorzeiten bered vnd verführet hat / Ja er heist vns gar nichts thun / wann wir im dienen
b iij wöl

wöllen/sonder spricht nur / wir sollen feiern. Ist nicht das ein freundlicher vnd wunderbarer DEXX / der seinen Knechten die im dienen wöllen / kein andere arbeit furgibt / dann das sie im ein Feiertag sollen halten / vnd denselben heiligen.

Es sein aber wol viel guter werck / darmit man dem Nächsten dienen kan vnd sol / als regirn / schützen vnd schirmen / predigen / lehren / Almosen geben / vnd dergleichen mehr / die gefallen alle Gott dem DEXX sehr wol / wann sie dem nächsten zu gut / aus Christlicher lieb geschehen. Darumb solt jr meine liebe Kindlin nicht gedencen / das man solche gute werck vnterwegen sol lassen / wann jr von dem feirn sagen höret / Dann Gott der DEXX hat vns solche gute werck auch gepoten / vnd wil sie ernstlich von vns haben. Aber dennoch wann wirs gleich thun / so dienen wir doch nur dem Nächsten / mit denselben wercken / vmb des DEXX willen / wann wir aber im selbs dienen wöllen / mit einem solchen guten werck / das den Nächsten nicht angehe / sonder Gott den DEXX allein zugehöre / so sollen wir / wie jr gehört habt / kein eufferlich werck furnemen / sonder nur ein Feiertag halten vnd denselben heiligen / Dann das begert er allein von vns / in diesem Gebot.

Nun höret aber auch die vrsach / meine liebe Kindlein / warum im Gott also thut / dann das ist die vrsach. Er ist so ein reicher mechtiger Gott / das er vnserer dienst vnd gutthat fur sich selbs nichts bedarff / Vnd ist darzu so freundlich vnd gnedig / das er yederman selbs gern guts thut / auff das er darumb gelobt vnd gepreist werd / darumb wer im dienen wil / der feire / vnd halt stil / vnd las im vnsern Herrgott guts thun / vnd sag im lob vnd danck darumb / das ist dann der best vnd höchst Gottisdienst / den wir in diesem leben thun können.

Es ist aber nicht genug / das wir feirn / Sonder der DEXX spricht / wir sollen die feire auch heiligen / das ist / wir sollen am Feiertag mit eitel heiligen Himelischen vnd Göttlichen dingen vmb gehn / wann wir aber mit solchen heiligen dingen vmb gehn / so dienen wir nicht vnserm Herrgott / wann man eigentlich darvon wil reden / sonder er dienet vns / das wil ich euch sein erkleren.

Zum Ersten / wenn wir den Feiertag wöllen heiligen / das ist / mit heiligen Göttlichen sachen zubringen / so können wir nichts heiligers thun / dann das wir zur predig gehen / hörn Gottis wort / vnd lernen was wir thun / vnd glauben sollen. Oder gehn zum heiligen Sacrament empfaben trost vnd sterckung vnser Gewissens vnd Glaubens. Oder beten andechtiglich / das vns Gott wöl geben was wir böiffen / vnd von allem übel erlösen / so erhört vns Gott.

Nun

Nunhoff ich jr Kindlein solt so klug sein / das jr das wol ver-
stehet / wann vns vnser lieber Derrgott / durch seine Diener sein
wort lest predigen / vnd die heiligen Sacrament reichen / vnd er-
hört vnser Gebet / das er vns dienet / vnd guts thut / vnd nicht wir
im. Darumb ist die mainung / dieses Gebots gleich so viel / als
wenn Gott sprech / Wolan lieben Kindlein / wolt jr mir dienen /
vnd thun / was mir wolgefelt / so last alle arbeit ligen / dann ich
darff ewer arbeit vnd ewer werck nicht / vnd kombt her zu mir / ich
wil euch lehren / was jr thun vnd glauben solt / ich wil euch mit
den heiligen Sacramenten trösten / vnd wil ewer Gebet erhören /
jr könt mir kein grössern dienst thun / dann das jr zu mir kombt /
vnd last euch guts thun / auff das jr erkent / das ich ewer gnediger
Vater bin / vnd jr mir vertrauet / vnd mich lieb gewinnet / wie die
Kinder ein Vater lieb haben sollen / Vnd daruon werdt jr hernach
im glauben mehr hören.

Zum Andern / ist das auch eine grosse wolthat / darmit vns
Gott dienet / dieweil wir vmb der narung willen hart arbeiten müs-
sen / das vns vnser Derrgott dannoch auch Feiertage gibt / daran
wir mögen ruhen / vnd vnser Knecht vnd Megd / vnd Diene auch
ruhen lassen. Dann darmit zeigt er an / wann wir schon nicht im-
merdar so hart arbeiten / das er vns dannoch erneret / vnd genug
geben wil / wann wir vns nur seins willen fleissen / vnd nach dem
Himmelreich fragen. Darumb spricht der **HEILIG** Christus im **E-^{Matth. 6}**
uangelio / Suchet zum ersten das Reich Gottes / so wirdt euch das
ander alles zufallen.

So bedenckt nun meine liebe Kindlein / wie ein grosse Sund
es ist / wann man den Feiertag nicht heiligt / sonder vnheiligt. Der
Feiertag aber wirdt verunheiligt / wann man vnheilige Sundli-
che werck daran thut / vnd treibt / Als wann man nicht zur Predig
geht / nichts betet / sonder schlefft lang geht darnach spatzirn / tan-
zet / spielet / trinckt sich vol / treibet vnzucht / hadert / schilt vnnd
schlecht einander.

Dann darumb zürnet Gott / vnd straffet vns / das vns nicht
wolgeht zu der narung / vnd werden die Lent arm / müssen tag
vnd nacht arbeiten / verderben dannoch darbey. Vnd geschicht im
recht / dann wann in Gott ein Feiertag gibt / so heiligen sie in nicht /
gehn nicht zur Predig / beten nichts / verachten Gott / vnd allen
Gottesdienst / treiben eitel Sund vnd laster am Feiertag / Mit fref-
sen / sauffen / tantzen / spielen / hurn / hadern / fluchen / vnd schla-
gen / So strafft sie dann Gott / das sie so arm werden / das sie
vor armut nicht feiren können / Dann sie sein keins Feiertags
wert / dieweil sie in so übel anlegen. Etliche aber strafft Gott nicht
in dem leben / sonder spart ins / bis sie sterben / so werden sie dann
verdambt ewiglich.

Darumb

Darumb hüt euch vor solchen lastern / meine liebe Kindlein / heiligt den Feiertag / geht zur predig / betet / vnd lobet Gott / so werd jr Gott wol gefallen / vnd er wirdt euch glück vnd heil geben / das euch wolgehe / vnd genug habet / auff das jr wol vnd recht feirn mögt / dann vnser **DEXX** Gott / vergönnet vns die Feiertag wol / wann wirs nur heiligen vnd recht anlegen.

Es. 55. Man sol aber nicht allein mit dem leib feirn / sonder auch mit dem hertzen / das geschicht / wann wir vnsern aigen willen vnd alle böse begird hin legen / vnd lassen vns Gottis willen wol gefallen / also / das wir von gantzem hertzen mögen sprechen / Dein wil geschech als im Dimel / auch auff Erden. Dann also spricht Gott der **DEXX** durch den Propheten Jesaia / Wann du nicht thust / was dir gefelt / so wirts ein lustiger Sabbath heissen / den **DEXX** zu preissen / Das ist / wann wir vnser aigen willen lassen farn / vnd vns Gottis willen vnd alle seine werck lassen wolgefallen / so können wir recht feirn / vnd Gott den **DEXX** loben vnd preisen damit. Dann das ist nicht fein gefeiret / wann der leib ruhet / vnd das hertz dieweil tichtet / wie es die Leut betriegen / allerley wollust vberkommen / vnd sich an sein feinden rechen wöl / Dader wann das hertz sonst vnwillig ist / vnd lest im nichts gefallen / wie es Gott macht / sonder mainet es wolts besser machen. Nun kan ye ein solch hertz nicht feirn / noch Gott ernstlich loben vnd preissen. Darumb sollen wir lernen / auch von bösen gedanken feiren / aber das ist euch Kindlein noch zu hoch / vnd wir haben vnser leben lang genug daran zu lernen.

So mercket nun mit fleis meine liebe Kindlein / das man vnsern lieben **DEXX** / nicht mit eusserlichen wercken dienet / sonder wann man mit leib vnd gemüt feiret / vnd höret Gottis wort / gebraucht seiner heiligē Sacrament / vnd rufft in an / damit er vns lehret / vermanet / tröstet / stercket / erhöret / vnd hülfft / vnd sagt im darnach lob / danck / vnd preis darumb.

Vnd das ist die mainung / vnd der recht verstand dieses dritten Gebots / Das man Gott den **DEXX** / vber alle ding sol fürchten vnd lieben / das wir die Predig / vnd sein Wort nicht verachten / sonder das selbig heilig halten / gern hören / vnd fleissig lernen.

Darumb meine liebe Kindlein / merckts mit fleis / vnd wann man euch fraget.

Wie verstehestu das dritt Gebot?

So solt jr also antworten.

Wir sollen Gott den **DEXX** vber alle ding fürchten / vnd lieben / das wir die Predig / vnd sein wort nicht verachten / sonder dasselbig heilig halten / gern hören vnd fleissig lernen.

Die vierd

Die vierdt Predig.

Auslegung des Vierdten gebots.

In habt jr am nechsten gehört / wie jr das
Drit gepot verstehen solt / darin wir lernen / wie wir vns ge-
gen Gott sollen halten in den wercken / Darumb folget yetzo her-
nach das Vierdt gebot / das lautet also.

Du solt dein Vater vnd dein Mutter ehren/
auff das du lang lebest / im Land / das dir der
HERR dein Gott geben wirdt.

Und das ist / meine liebe Kindlein / das föderst gebot in der
andern Tafeln / die vns lehret / wie wir vns gegen den men-
schen sollen halten. Es betrifft auch die fürnembsten Leut
auff Erden / nemlich Vater vnd Mutter / vnd alle Oberkeit / vnd
lehret vns / wie wir vns gegen in halten sollen / nemlich / wir sollen
sie ehren.

Nun ist es nicht so ein schlecht Gebot / als die ainfeltigen man-
nen / sonder betrifft hohe ding / vnd gibt grosse weisheit / denen
die es recht verstehen . Darumb meine liebe Kindlein mercket mit
fleis darauff / das jrs recht verstehn lernet.

Vnd zum Ersten / bedenckt eben / das Gott der HERR / seine
Gebot darumb geben hat / das wir daraus sollen lernen / was im
wolgefal / darumb ist gewis / das wir nichts thon können auff
Erden / das im bas gefal / dann das wir seine Gebot halten. Vnd
sein das törichte Leut / die vnserm HERRN dienen wollen / mit
wercken / die er nicht hat geboten / dann er spricht man dien im ver-
geblich darmit. Derwiderumb ist gewis / das es im wolgefelt /
wann wir Vater vnd Mutter ehren / vnd inen gehorsam sein. Dar-
umb gefallen im auch alle vnser werck wol / die vns Vater vnd
Mutter heissen / vnd wann es gleich wer nur ein Stub keren / oder
ein wasser holen. Das ist nun ein grosser vnd freudenreicher trost /
das wir gewis sein / das solche schlechte werck / Gott gefallen al-
lein darumb / das wir Vater vnd Mutter darin gehorsam sein. Das
gegen gefallen im die werck nichts / die man on sein befehl thut /
wann sie gleich ein gros ansehen haben / vnd vor der Welt hoch
gelobt werden / das solt jr Kindlein mit allem fleis mercken / Dann
der befehl Gottis / macht vnser werck gut / vnd sonst nichts.

Nun

Nun beſilbet / vnd gepent vns Gott / wir ſollen Vater vnd Mutter Ehren / das iſt / wir ſollen ſie fürchten / in gehorſam ſein / ſie lieb haben / vnd alles guts erzaigen / dann ſolchs alles vermag eigentlich das wörtlein / ehren / Vnd wir ſein es ſchuldig zuthun / darumb das ſie Gott der **HEILIG** / vns gegeben vnd ſurgesetzt hat / das ſie vnſer Herr / Pfleger / vnd Oberkeit ſein ſollen an ſeiner ſtat / vnd er thut vns durch ſie / die aller größten wolthat / die wir nach den wolthaten Chriſti empfahen / Darumb ſollen wir ſie ehren / vnd nicht verachten noch verſchmehen.

Wann wir aber ſie nicht fürchten / vnd fragen nichts darnach / wann ſie gleich mit vns zürnen / ſo verachten wir ſie / das iſt aber ein groſe Sund / dann wir ſollen ſie nicht verachten / ſonder ehren / vnd ein fleißig auffſehen haben / das wir ſie nicht erzürnen / noch belaidigen.

Vnd wann wir in nicht gern gehorſam ſein / ſo verachten wir ſie auch / dann wer Vater vnd Mutter nicht folget / der leſt ſich düncken / er ſey weiſer dann ſie / das iſt dann auch eine groſſe verachtung vnd Sund. Darumb ſolt jr Kindlein Vater vnd Mutter nicht alſo verachten / ſonder ehren / vnd in willigklich vnterthenig vnd gehorſam ſein.

Desgleichen / wann wir Vater vnd Mutter nicht lieb haben / ſo können wir ſie nicht von hertzen ehren. Darumb wollen wir Vater vnd Mutter von hertzen ehren / ſo ſollen wir ſie auch von hertzen lieb haben. Sonderlich darumb / das vns Gott ſo viel guts durch ſie thut / wie wir bald hernach hören werden.

Wir ſind auch ſchuldig / inen alles guts zuthun / was wir nur können / viel ehrlicher dann ander Leuten. Dann wann wir ander Leuten guts thun / ſo laſſen wir vns bedüncken / ſie ſeyen vns ſchuldig zu dancken. Aber alſo ſol man nicht gegen den Eltern thun / ſonder man ſol ſie mit der wolthat ehren / das iſt / man ſol ſich eben halten / wie man ſich ſonſt gegen groſſen Herrn helt / wann man in etwas zu gefallen thut / oder etwas ſchencket / dann daſelbſt gedencken wir nicht / das wir ein groſſen danck verdient haben / ſonder demütigen vns / vnd bitten / ſie wollen für gut nemen / wir wollen gern beſſers thun / wann wir können / vnd begern ſie wollen vns in befolhen laſſen ſein / das heiſt dann ein verehrung / oder ehrerpietung. Alſo ſollen wir aller ding gegen vnſern Eltern auch thun. Wo wir in nur etwas guts thun können / da ſollen wir ſie damit verehren / vnd bitten / das ſie für gut nemen / dann wir können in nimmermehr ſo viel guts thun / das wir in möchten vergleichen vnd bezahlen / ire gutthat / die ſie vns gethan haben.

Alſo

Also meine liebe Kindlein / merckts mit fleis / das das wörte
lein Ehren / eben so viel ist / als fürchten vnd gehorsam sein / lieb
haben vnd alles guts thun / vnd dennoch kein danck fodern / son
der in dancken / vnd bitten / das sie für gut nemen.

Dann sie sein warlich vnser Herr / Pfleger vnd Oberkeit /
von Gott gesetzt / vnd wir sein in söchs alles zuthun schuldig /
vnd wann wirs nicht thun / so zürnet Gott mit vns / auff's aller
heftigst.

Darumb hat er auch im Alten Testament geboten / Wann ye
mand ein eigenwilligen vngehorsamen Son hat / der seiner Vater
vnd Mutter stimm nicht gehorhet / so sollen sie in ergreifen / vnd
zu den Eltisten der Stat führen / vnd sagen. Dieser vnser Son ist ei
genwillig / vnd vngehorsam / vnd gehorhet vns nicht / vnd ist ein Deut. 21
Schwelger / vnd truncken Pold. So sollen in alle Leut verstein
gen / das er sterbe / vnd sol also das böß abgethon werden / das es
das gantz Volk hör / vnd sich fürchte.

Da höret ir nun / meine liebe Kindlein / wie übel es Gott ge
felt / wann man Vater vnd Mutter nicht folget / dieweil er be
fihet / man sol die Kindlein tödten / die nicht gehorsam sein wöl
ten.

Nun höret aber auch die ursach / warumb Gott so ernstlich
Bepent Vater vnd Mutter zu ehren. Dann das ist die ursach / Vn
ser lieber Herrgott thut vns so viel guts / durch vnser Vater vnd
Mutter / das niemand aussprechen kan / dann er gebraucht sie zu
einem werckzeug / dardurch er vns leib vnd leben gibt / vnd die n
rung darzu. Darumb sollen wir sie / als Gottis werckzeug ehren /
vnd dieweil wir Gott nicht können sehen vnd hören / so stellet er vn
ser Vater vnd Mutter an sein stat / das sie mit vns sollen reden /
vns lehren vnd gepieten / was wir thun sollen / Gleich wie ein
Schuelmeyster / wann er aus der Schuel geht / so befihet er einem
andern dieweil auff die Kindlein zusehen / den sol man dann auch
nicht verachten / sonder gehorsam sein / als dem Schulmeister
selbs / vnd welches Kindlein das nicht thut / das strafft der Schul
meister wann er kombt. Also wirdt vnser Herrgott / die Kindlein
auch straffen / die Vater vnd Mutter nicht gehorsam gewest sein /
dann er hat Vater vnd Mutter befolhen / sie sollen die Kindlein re
girn vnd ziehen / an seiner stat.

So ist nun Gott der **DEUX** / der recht Werckmeyster / vnd
Zuchtmeyster / Vater vnd Mutter aber sein der werckzeug / dar
6 durch

durch es Gott alles ausricht. Dann wann Gott ein menschen erschaffen wil / vnd im leib vnd Seel geben / so nimpt er nicht einen Laimpatzen darzu / wie er zum ersten mal hat gethon / da er den Adam beschuff / Sonder nimpt Vater vnd Mutter darzu / vnd lest sie ein Kindlein gepern. Darumb ist das die erste wolthat / das vns Gott durch vnser Vater vnd Mutter / Leib vnd Seel gibt.

Darnach wann wir geboren sein / wil vns Gott erneren / so gibt er vns nicht speis vom Himel herab / sonder gibt der Mutter Milch in die Brüst / das sie jr Kindlein seuge / vnd gibt dem Vater ein narung das er sein Kind auffziehen / vnd kleiden kan. Dann wir sehen das die Kindlein ein lange zeit da ligen / das sie in selbs nicht helffen können / vnd wann vns Gott durch Vater vnd Mutter nicht erhielt vnd erneret / so mussten wir alle in der Kindheit verderben vnd sterben. Vnd das ist die ander wolthat / die vns Gott durch vnser Vater vnd Mutter erzeigt / das wir bey dem leben erhalten werden.

Weil er dann / das wir Christen sein / vnd im rechten glauben auffgezogen werden sollen / so gibt er vns Christen zu Vater vnd Mutter / die lassen vns dann tauffen / das wir auch Christen vnd Gottis Kinder werden / Dann wann vnser Eltern nicht Christen weren / so sehe man vns nicht an / das man vns tauffet / bis wir gros würden / vnd selbs darumb beten. Dann jr sehet wol / das man keines Juden Kindlein tauffet / wann wir aber vnglaubige Vater vnd Mutter hetten / vnd vngetaufft stürben / so weren wir ewiglich verloren. Vnd wann wir gleich nicht bald stürben / so machten sie doch / das wir auch vnglaubig blieben / vnd dem rechten Glauben feind würden / wie wir bey den Juden wol sehen / Die alle vnserm glauben feind werden / vnd lest sich vnter zehen hundert tausenten kaum einer tauffen. So ist nun das die dritt wolthat / das vns vnser Herrgott / durch vnser Vater vnd Mutter bald zu der Tauff / vnd in die Christenheit bringt / vnd vns ein lieb zum Christlichen glauben durch sie in vnser hertz pflanzt / das wir gern Christen sein / wir möchten sonst im alter vielleicht nimmer mehr Christen werden.

Wann wir dann auffwachsen / vnd zeit ist / das wir Gottis Wort lernen sollen / so lehret vns Gott / am aller ersten / die aller besten vnd köstlichsten lehre durch Vater vnd Mutter / nemlich die Zehen gebotten Glauben / vnd das Vater vnser / vnd wann es gleich ander Leut thun / so geschicht es doch aus irem befehl / vnd durch jr belonung. Darumb ist nun das die vierdt wolthat / das vns Gott der **VLXX** sein heiligs wort / durch vnser Vater vnd Mutter lehret.

Auch

Auch lehren vns Vater vnd Mutter weltliche zucht/das wir
feine friedliche/Burgerliche Leut werden/das man vns leiden
kan/Sie lehren vns auch handtwerck/gewerb/handel/vnd aller-
ley feine künst/darmit wir vns erhehren/wir haben von in das
Vaterland/Burgerrecht/vnd das Erbe/vnd wer kan es alles er-
zelen? Es haben Vater vnd Mutter so viel mit den Kindern zu
thun/das sie es selbs nicht alles ausrichten können/wiewol sie es
gern theten/wann es nur möglich wer. Darumb müssen sie ander
Leut durch gelt/vnd bit/durch Ordnung vnd Gesetz/zu hülff ne-
men/bis doch die Kinder solche wolthat/alle überkommen/die
vns Gott durch Vater vnd Mutter geben wil.

Das sein die fürnemsten vrsach/meine liebe Kindlein/Dar-
umb vns Gott der DEXX geboten hat/das wir sollen Vater vnd
Mutter ehren. Vnd es müssen warlich böse Kinder sein/die es
nicht thun/dieweil sie so viel guts von Vater vnd Mutter em-
pfangen haben/vnd dennoch vndanckbar sein. Sie weren war-
lich wol wert/das man sie versteiniget/wie Gott im Alten Te-
stament geboten hat. Darumb meine liebe Kindlein/nembt
es zu hertzen/vnd seit nicht böß/vngehorsam/vnd vndanck-
bar/sonder ehret Vater vnd Mutter.

Ir solt aber nicht darfür halten meine liebe Kindlein/das
ir solchen gehorsam/vnd ehr/allein ewern leiblichen Vater vnd
Mutter schuldig seit/sonder ir seits schuldig allen denen/die ewer
Vater vnd Mutter zu hülff nemen/durch die sie ir Ambt gegen
euch ausrichten/als da sein/Vormünd/Schulmeister/Haus-
herrn/Prediger/Pfarrherr/vnd weltliche Oberkeit/dann dise al-
le/nennet die heilige Schrift auch Veter. Darumb wann Gott
der DEXX spricht/Du solt Vater vnd Mutter ehren/so maint
er die vorgenanten Leut alle/vnd das geschicht darumb.

Wann einem jungen Kind seine Eltern sterben/so bestellen sie
in irem Testament/feine fromme Leut/zu den sie sich guts verse-
hen/übergeben in iren gewalt/den sie von Gott haben über die
Kindlein/vnd machen sie zu Vormündern/solchen Vormündern
sollen nun die Kindlein auch gehorsam sein/vnd sie ehren. Dann
sie sein an Vater vnd Mutter stat gestellet/versorgen die Kind-
lein/das sie erzogen werden/vnd etwas lernen/vnd müssen vor
Gott vnd der Welt für sie rechnung geben.

Desgleichen/wann Vater vnd Mutter nicht geschickt sein/
oder

oder nicht die weil haben/das sie die Kindlein lehren / so befehlen
sie es den Schulmeistern/den Predigern / vnd Seelsorgern / vnd
ybergeben in/in dem fall auch iren gewalt/darumb sollen sie die
2. Timo. 5. Kindlein auch ehren/vnd in gehorsam sein. Dann Paulus spricht/
Die Eltisten oder Priester die wol furstehen / sein zwifacher ehren
wert. Vnd Sanct Petrus spricht / Seit gehorsam ewern furste-
1. pet. 5. hern/dann sie wachen fur euch/ als die rechnung fur ewer See-
len geben müssen.

Es geschicht auch oft / das Vater vnd Mutter ire Kinder zu
frembden leuten verdingen / aintweder das sie die Kinder nicht
wol ernerren / oder aber kein handtwerck vnd gewerb selbs lehren
können/ oder aus andern guten vrsachen. Wann nun das ge-
schicht/so sollen die Kinder/die also verschickt/ oder verdingt wer-
den/ire Herrschafft auch ehren wie Vater vnd Mutter / vnd in
gehorsam sein/ dann Vater vnd Mutter haben ihn ihren gewalt
auch ybergeben/vnd befolhen. Darumb spricht Paulus / Die
Knecht sollen ire Herrn aller ehren wert halten / vnd in dienen/
Eph. 6. als dem **HERRN**/darumb/das es also der will Gottis ist.

Wann aber nun die Kinder gros werden / vnd wollen weder
den Eltern/noch den Schulmeistern/noch den Hausheeren/noch
den Seelsorgern folgen / Sonder werden böß/frech / mutwil-
lig/vnd thun andern Leuten schaden / so sol sie die Oberkeit straf-
fen/Dann Vater vnd Mutter haben die Oberkeit gewolet / vnd
eingesetzt/vnd haben in iren gewalt auch übergeben / das sie die
bößen Kinder an ir statt straffen / vnd ziehen sollen. Darumb sol
man die weltliche Oberkeit auch ehren / wie Vater vnd Mutter/
Dann durch sie haben wir schutz vnd schirm / fried vnd recht / in
der Stat/vnd auff dem Land. Wir sollen auch gern dazu geben/
steuer/gelt/rendt vnd zins / darmit sie es erhalten können. Wie
Paulus zu den Römern am dreizehenden lehret.

So mercket nun mit allem fleis / meine liebe Kindlein / das
Vater vnd Mutter heissen nicht allein / die Leut / die vns geboren
haben/sonder auch die / die ihn helfen vns lehren vnd ziehen/
als da sein / Vormünd / Schulmeister / Hausheeren / Seelsor-
ger/vnd weltliche Oberkeit. So heist auch ehren nicht schlech-
te eusserliche zucht/ Sonder es haist / fürchten / gehorsam sein/
lieb haben / vnd alles guts thun / vnd sich dannoch des alles
nicht vbernehmen/Sonder sich demutigen / vnd sie bitten / das sie
mit vns fur gut nemen/wir weren wol mehr schuldig.

Vnd

Vnd das ist / meine liebe Kindelein / die furnembste weisheit
im zeitlichen vnd weltlichen leben / das wir erkennen / das wir die-
sen Leuten gehorsam schuldig sein / vnd das es Gott dem **WEL-**
KEN so hertzlich wolgefelt / wann wirs thun / vnd das er vns wi-
derumb so viel guts durch dieselbigen Leut mittheilet.

Darumb wolt jr from sein / vnd Gott wolgefallen / so hal-
tet dieses Gebot / seit Vater vnd Mutter / vnd aller Oberkeit ge-
horsam / halt sie in ehren / folgt in was sie euch heissen / Ausge-
nommen / wann sie euch etwas wolten gebieten / das Gott verbo-
ten hat / So solt jr nicht folgen / sonder sprechen / wie **S. Pet.** Act. 5
trus / Man mus Gott mehr gehorsam sein / dann den Men-
schen.

Jr solt auch ewere Vater vnd Mutter / darumb nicht verach-
ten / das es einfeltige / arme / schwache / oder sonst gebrechliche
Leut sein / Dann sie seien gleich wie sie wollen / so hat euch dan
noch Gott / durch sie das leben geben / vnd sie über euch zu Wer-
ren gesetzt / darzu gibt er euch / die vorgemelten güter alle durch
sie. Darumb solt jr sie / Gott zugefallen ehren / vnd in gehorsam
sein / gern lernen / vnd thun was sie euch befehlen / vnd fleissig
meiden / was sie euch verbieten / dann das gefelt Gott dem **WEL-**
KEN wol. Vnd solt euch hüten / das jr euch aus irem gehor-
sam / wider iren willen nicht entziehet / noch von in / oder aus den
diensten / darein sie euch verdingen / hinlaufft / dann es ist ein groß-
se Sünd die Gott gewislich nicht vngestraftt laßt.

Sonderlich solt jr euch hüten / vor dem schentlichen vngehor-
sam der yetzo gemain ist / das jr euch nicht / on ewer Eltern wil-
len vnd wissen verheyrat / dann jr thut nicht allein vnrecht / son-
der auch törllich / dieweil es so ein geferlich / langweilig / vnd mühe-
selig ding vmb den Ehlichen stand ist / wann er nicht wol gerett /
dann da müßt jr ewer leben lang geplaget sein / vnd vnglück ha-
ben / daraus euch niemand helffen kan dann d er tod. Vnd ist zube-
sorgen / wann man Vater vnd Mutter veracht / vnd on iren willen
vnd wissen heyrat / vnd also den Ehlichen stand mit Sunden anfa-
het / es werd Gott weder glück noch hail darzu geben. Was jr aber
Gottis Gebot hielt / vnd Vater vnd Mutter folget / so würde euch
Gott lieb haben vnd sein Segen / vnd alles guts zum Ehlichen
stand geben.

Wolan / meine liebe Kindelein / jr höret / was ihr thun solt /
c 111 dar

darumb merckts / vnd thuts / Dann dieses gebot ist ein treffenlich
feines gebot. Darumb spricht der heilige Paulus / Es sey das
erst / vnd fürnembste gebot / das ein zusagen hab. Es ist auch war.
Dann vnser herrgot spricht / Du solt dein Vater vnd dein Mutter
ehren / auff das du lang lebst im land das dir der Herr dein Gott
geben wirdt.

Damit sagt er vns zu / das wer Vater vnd Mutter ehret / der
sol lang leben / vnd in seinem vaterland bleiben / wers aber nicht
thut / der sol aus dem land vertrieben werden / vnd bald sterben.
Vnd ihr sehetz zwar sein / das es also gehet / dann wann die Kind-
lein bößs sein / Vater vnd Mutter nicht volgen / den schulmeistern
vngheorsam sein / ihren herren nicht treulich dienen / Gottis wort
vnd die prediger verachten / vnd sein der obrigkeit nicht gehorsam
vnd vnterthenig / so strafft sie Gott / das da eins ein bein ausfelt /
das ander ein arm abpricht / eins ein aug austicht / vber das laufft
ein pferdt / das felt in ein wasser / vnd ertrinckt / die jungen gesellen
werden auff der gassen / oder ob dem spiel / oder im krieg erwürgt /
Wann man dann haus sol halten / so verdirbt man das man von
schuldt wegen / in das glait mus fliehen / oder kombt dahin / das
man leugt / vnd stilt / so wirdt man dann erhangen / oder mus
aus dem landt lauffen / vnter die frembden / da man niemands
kennet / da in auch niemant trawet / niemant hilfft / niemant
beystehet / das ist dann die rechte straff / darumb das sie in der
jugent nicht gevolgt haben.

Darumb meine lieben Kindlein / seit Vater vnd Mutter vnd
aller herschafft gehorsam / so werdt ihr lange leben / weise vnd
flug werden / vnd andern lewtē auch nütz sein / vnd viel guts thun /
Ihr werdt auch in ewerm land bleiben / bey ewern eltern / schwe-
stern / brüdern / freunden / vnd gutten gesellen / vnd allerley freund-
schafft lieb vnd trew von in gewarten / vnd entpfangen. Ihr dürfft
auch nicht sorgen / das ihr von armut wegen / oder aus andern
bößen vrsachen / müßt aus dem landt entlauffen / vnd werden euch
die feind auch nicht daraus vertreiben / wie sonst den bößen vnghe-
orsamen lewtē geschicht. Solchen grossen lon / hat vns vnser
lieber Herr verheissen / vnd wirdt vns den gewislich geben / wie
wirs offenbarlich am tage sehen / das ers thut / wann wir Vater
vnd Mutter / vnd aller obrigkeit gehorsam sein / vnd lassen vns
leeren / vnd ziehen / zu vnserm grossen nutz vnd ehren / vnd zu
Gottis wolgefallen.

Das ist nun die mainung vnd der recht verstandt dieses vier-
den

den Gebots / das man Gott den **HEEREN** über alle ding soll fürchten vnd lieben / das wir vmb seinen willen vnser Etern vnd Herren nicht verachten / noch erzürnen / sonder sie in ehren halten / vnd in dienen / gehorsam sein / vnd alle lieb vnd trew erzeigen.

Darumb meine liebe Kindlein merckts mit fleis / vnd wann man euch fraget.

Wie verstehstu das vierdt Gebot ?

So solt jr also antworten.

Wir sollen Gott den **HEEREN** über alle ding fürchten vnd lieben / das wir vmb seinen willen / vnser Etern vnd Herren nicht verachten noch erzürnen / sonder sie in ehren halten / vnd inen dienen / gehorsam sein / vnd alle lieb vnd trew erzeigen.

Diefünfft

[Faint, illegible text, likely bleed-through from the reverse side of the page.]

[Faint, illegible text, likely bleed-through from the reverse side of the page.]

[Faint, illegible text, likely bleed-through from the reverse side of the page.]

Die funfft Predig.

Auslegung des Fünfften gebots.

In habt ihr am nechsten gehört / wie jr das Vierdt gebot verstehē solt / darin wir lernen / wie wir vns gegen Vater vnd Mutter / vnd gegen aller Oberkeit sollen halten / Darumb folget nun hernach / das Fünfft gebot / das lautet also

Du solt nicht tödten.

Und das Gebot meine liebe Kindlein / das lehret vns / wie wir vns sollen halten gegen vnsern nechsten aigne Person / Nemlich das wir jm kein schaden zu fügen sollen / weder an seinem leib noch an seinem leben / Dann der Mensch hat vnter allen zeitlichen zergenglichen gütern nichts liebers / dann sein eigen leib vnd leben. Darumb hat auch vnser lieber Herrgott / vor allen andern scheden / darmit wir vnsern Nechsten belaidigen mögen / am aller ersten verboten / das wir nicht sollen tödten.

Roma. 7. Es ist aber nicht genug meine liebe Kindlein / wann wir vns schon im eusserlichen werck enthalten / das wir niemand erwürgen / sonder wir sollen auch / weder mit gedanken / Worten oder wercken / kein vrsach darzu geben / das vnser Nechster vmb sein leib vnd leben kom. Dann die gebott Gottis sein Geistlich / vnd erfordern nicht allein das werck / sonder auch den willen vnd das hertz / Vnd ist für war eine grosse weisheit / wo man solchs recht verstehet. Darumb hats vnser lieber Herr Christus im Euangelio selbs ausgelegt / auff das wir vns ja nicht sollen irren / vnd dis Gebot vnrecht verstehen / wie die Juden. Dann die Juden maineten / wann sie nur niemand mit der hand / oder mit der that erwürgeten / so hetten sie das Gebot schon gehalten / vnd erfüllet. Wann sie aber sonst mit Worten vnd wercken vrsach darzu gaben / so achteten sie desselben nicht / gleich als were es kein Sünd / Vnd ihre Schriftgelerte vnd Phariseer / lehren sie auch also / vnd wustens nicht besser.

Matth. 5. Darumb spricht der Herr Christus im Euangelio. Ich sag euch / Es sey dann ewer gerechtigkeit besser / dann der Schriftgelehrten / vnd Phariseer / so werdt jr nicht in das Himelreich kommen.

men. Ihr habt gehört/ das zu den alten gesagt ist/ du solt nicht tödten/ Wer aber tödtet/ der soll des gerichtts schuldig sein. Ich aber (spricht der Herr Christus) sage euch/ Wer mit seinem bruder zürnet/ der ist des gerichtts schuldig Da höret ihr/ meine liebe Kindlein/ das vnser Herr Christus/ das zürnen/ eben so hoch wil verpoten haben/ als das tödten/ vnd ist auch recht/ Dann wer da zürnet/ der tödtet den nechsten mit dem hertzen/ vnd mit den gedancken.

Nun stehet aber Gottis gebot da/ vnd spricht/ du solt nicht tödten. Vnd das solt ihr/ meine liebe Kindlein/ fleissig mercken/ das er nicht spricht/ dein hand soll nicht tödten/ oder dein schwert sol nicht tödten/ oder dein spies vnd buchsen sollen nicht tödten/ Sonder er spricht/ Du solt nicht tödten/ das ist/ du selbs/ als gros du bist/ mit all deinen gliedern inwendig vnd auswendig/ mit alle dein gedancken vnd anschlegen/ mit all deinem thun vnd lassen/ soltu nicht tödten.

Nun möcht yemandt gedenccken/ wann dann yemandt stilt/ oder raubet/ oder mordet/ oder andere grosse vnd vnleidenliche übel thut/ sol man in dann nicht tödten? Antwort/ ja/ er sol getödtet werden. Aber Gott spricht/ Du solt nicht tödten/ haltu fried/ Deut. 32. vnd las es einen andern thun. Wer sol es aber thun? Vnser Herr Gott spricht/ Las mir die Rach/ ich wils vergelten/ das ist/ Gott Roma. 12. der Herr wils selber thun. Darumb hat er auch weltliche Oberkeit vnd Ambtleut eingesetzt/ vnd in das Schwert geben/ vnd befolhen/ sie sollen die Vbeltheter straffen. Vnd wann sie es thun/ so thun sie Gott ein gefallen daran/ vnd sind seine diener/ Wie Sanct Paulus spricht. Die Oberkeit tregt das Schwert Roma. 13. nicht vmb sonst/ sie ist Gottis dienerin/ vnd ein racherin/ zur raff über den der böses thut. Darumb wann die Oberkeit ein Vbeltheter/ mit recht vnd vrteil tödtet/ so ist es eben als viel/ als het in Gott selbs getödt/ dann sie thuns aus Gottis befehl vnd ordnung/ Wie Sanct Paulus/ zun Römern am dreyzehenden capitel lehret.

Darumb meine liebe Kindlein/ wann euch schon yemandt gewalt/ vnd vnrecht thut/ so leidets gedultiglich/ tödtet niemand/ schlägt niemand/ zürnet mit niemand/ hadert vnd zancket mit niemand/ sonder befehlhets Gott dem Herrn/ der hat gesprochen. Las mir die Rach/ ich wils vergelten/ du solt nicht tödten.

Vnd wie ihr vor gehört habt/ solt ihr weder mit gedancken noch Worten/ noch wercken tödten/ dann man kan ein menschen in mancherley weis tödten/ als wann man ihn mit der that er-
d würet/

würget/wie die Mörder im wald/ oder wann ander Leut ein erwürgen wollen/ vnd wir könten im helfen/vnnd wöllens nicht thun/oder wann man es gepeut oder reth/das yemand erwürgt werden sol/oder wann man etwas von einem andern sagt/das er darumb erwürgt wirdt/oder wann man yemand mit worten erretten könt/das er nicht erwürgt würde/vnd schweiget doch still darzu/oder wann ein mensch sonst sterben wil/vnd wir helfen im nicht/sonder lassen in erhungern/erfrieren/ertrincken/oder verbrinnen/oder wann wir mit einem zürnen/vnd im feind werden/das wir im nichts guts gönnen/sonder gönnen/vnd wünschen im böses/also/das/wann es im war wird/er auch sterben müß. Sehet da meine liebe Kindlein/das alles heist getödtet/dann dardurch wirdt ein mensch schuldig an seines Nechsten todt.

Vnd auff das irs ja wol verstehet/so mercket mit allem fleis/wo zorn/neid/vnd hasß ist/da ist auch das tödten/tödtet man mit der hand nicht/so tödtet man aber mit den bösen worten/vnd tödtet man mit den worten nicht/so tödtet man aber mit den gedancken im hertzen. Dann wo zorn/neid/oder hasß im hertzen ist/daselbst ist gewislich auch das tödten/Dann gleich wie das Feuer schaden thut/wo es angeht/vnd leßt im nicht mehr leichtlich weren. Also auch neid/hasß/vnd zorn/wann sie bewegt/vnd angezündt werden/thun sie offft größern schaden/dann der mensch im Synn gehabt hat. Ja sie bewegen auch wol einen menschen/das er ein übel thut/das er vor sein leben lang nie im Synn gehabt hat/vnd im darnach von hertzen laid ist/vnd kombt also/alles tödten aus neid/hasß/vnd zorn Darumb spricht der heilig Johannes in seiner Epistel/Wer seinen Bruder hasset/der ist ein Todtschleger.

Also könt jr nun/meine liebe Kindlein/sein verstehen/wie Christus dis Gebot auslegt/dann er spricht/Wer mit seinem Bruder zürnet/der ist des Gerichts schuldig. Dann zürnen/ist nichts anders/dann tödten mit dem hertzen/Nun spricht aber Gots tis gepot/Du solt nicht tödten.

Weiter spricht Christus/Wer zu seinem bruder sagt Racha/das ist/wer zornigklich gegen im murret/das mans an seiner stim/vnd an seinen geberden merckt/das er mit im zürnet/der ist schuldig des rhats/Wer aber sagt/du narr/der ist des hellischen feuers schuldig. Vnd in diesen worten/leeret vns vnser lieber Herr Christus/das man den nechsten auch mit worten tödtet/wann man so zornigklich mit im redet/das man wol merckē kan/das man im von hertzen feind ist/Vnd noch viel mer/wann man in schendet
vnd

vnd schmehet / vnd macht darmit / das in ander lewt auch verach-
ten / vnd ime feind werden. Auch leeret er vns den zorn Gottes /
vnd die ernstlichen straff erkennen / die hie zeitlich / vnd dort ewigk-
lich vber vns gehn sollen / wann wir dis gebot verachten / vnd ni-
cht halten. Dann er spricht nicht allein / der da tödtet / sonder auch
der da nur zürnet / der ist des gerichtts schuldig / das ist / er thut ein
solche sünd / darumb man in fur gericht solt füren / vnnnd ein straff
vber in gehn lassen.

Welcher aber mit seinem zorn heraus fert / vnd murret / der ist
des rahts schuldig / das ist / er thut ein solche sünd / darüber man
nicht erst am gericht forschen sol / ob sie zu straffen sey oder nicht /
dann es ist offenbar / das vnrecht vnnnd strefflich ist / sonder man
solte flugs zu rahte gehn / vnd bedencken / wie hart man sie straffen
solt.

Welcher aber mit seinem zorn dem nechsten schaden thut / vnd
in an seinen ehren beleidigt / heist in ein narren / oder schelmen / oder
was andere der gleichen schelt wort sein / der ist des hellischen feu-
ers schuldig / das ist / er thut ein solche grosse sünd / die hie zeitlich /
vnnnd dort ewigklich / solt gestrafft werden / wann sie nicht gebüst /
vnd durchs leiden Christi vergeben wurde.

Noch viel mehr / wirt der todschlag / hie vnd dort gestrafft wer-
den / Wie Gott der Herr / nach der sundflus zum Noa gesprochen Gene. 9.
hat / Ich wil ewer blut / von allen thieren erfordern / vnd wil des
menschen seel / fordern von des menschen henden / Wer menschen
blut vergeust / des blut sol auch durch menschen vergossen werden /
vñ darzu ist die obrigkeit von Gott eingesetzt / wie ihr gehört habt.

Vnnnd wann man gleich der obrigkeit entrinnet / oder sie selbs
nachlessig vnd seumig ist / das sie nicht strafft / so lest es doch Gott
der Herr nicht vngerochen / sonder strafft hie vnd dort / wie er ge-
sprochen hat / er wöll vnser blut / vnd vnser seel erfordern. Wie man Gen. 4.
sein sicht am Cayn / der seinen bruder Abel erschlug / Dann Gott
der Herr straffet in selbs darumb / hie zeitlich / das er must ein
böfs / blöd / verzagts / vnruwigs gewissen haben / sich fürchten /
vnd zittern / vnd aus dem land fliehen / vnd kein bleibende stat ha-
ben. Er strafft in auch dort in ihener welt ewigklich / dann er ist
verflucht vnd verdambt. 2. Joh. 7.

Ein solche ernstliche straff / meine liebe kindlein / sol vns billich
alle bewegen / das wir dis gebot fleissig mercken / vnd gern halten
sollen / Also das wir niemandt tödten / weder mit wercken / noch
mit worten / noch mit gedancken / wie vns Christus der Herr
d h leeret /

leeret / sonder man sol geduldig sein / vnnnd leiden / wann vns ge-
Matth. 5. walt vnd vnrecht geschicht / Dann er spricht / Selig sein / die vmb
der gerechtigkeit willen verfolgung leiden / dann das himmelreich
ist ihr.

Wir sollen auch nicht zürnen / sonder vnser feind liebhaben /
Wir sollen nicht vbel nach reden / sonder segnen die vns flü-
chen / Wir sollen vns auch nicht rechen / sonder wer vns ein streich
an ein backen gibt / dem sollen wir den andern auch dar halten /
Vnd wer vns den rock wil nemen / dem sollen wir auch den mantel
lassen / Wer vns zwinget ein meil wegs mit im zu gehn / mit dem
sollen wir zwo gehn / Wir sollen guts thun / den / die vns hassen /
Vnd bitten für die / die vns beleidigen / auff das wir rechte kinder
seyen / vnser Vaters im himel / dann solchs alles hat vns Christus
gelert / vnd beuolen.

Vnd wann wir jemand beleidigt / vnd erzürnet haben / so sol-
len wir fleis ankeren / das wir vns auff das aller erst wieder mit im
Matth. 5. versöhen. Dann Christus spricht / Wann du dein gab auff dem
altar wilt opffern / vnnnd wirst alda ingedechtig / das dein nechster
etwas wieder dich hat / so lass dein gab vor dem altar / vnnnd gehe
hin / vnd versüne dich vor mit deinem bruder. Es war zwar im al-
ten Testament ein feiner Gottes dienst / wenn man opfferet / dann
Gott der Herr het es selbs beuolen / Aber vnser lieber Herr Chri-
stus lehret vns da / das der aller best / vnd nötigst Gottes dienst sey
das man Gottes gebot halt / vnnnd sich mit dem nechsten versöhe /
das solt ihr meine liebe kindlein / fleissig mercken.

Darzu dienet es auch / zu zeitlicher rwe / zu glück vnnnd heil /
wann man Gottes gebot fleissig helt / Vnnnd wann man es nicht
thut / so dienet es nur zu schand / zu schaden / vnnnd zu verderben.
Matth. 5. Dann Christus spricht / Wir sollen mit vnserm widersacher vns
bald vertragen / das ist / wir sollen mit niemand zürnen / zanken /
haddern / oder rechten / sonder vertrag vnnnd fried suchen / wie wir
können / sonst möchten wir in den kercker geworffen werden / vnnnd
nicht heraus kommen / bis wir auch bey einem heller bezaleten.
Dann es kan wol geschehen / wann wir gleich ein gerechte sach
haben / das wir dannoch das vrteil verlieren / Vnd ob wirs schon
gewinnen / so gehn oft mehr kost vnd scheden dar uff / dann die
sach wert ist / Darumb ist nichts bessers / dann überall fried su-
chen.

Vnd gleich wie wir mit yederman sollen fried halten / also sol-
len wir auch fleis ankeren / wo ander leut vnains sein / das wir sie
Matth. 5. wider zu freunden machen. Dann Christus spricht / Selig sein
die

die fridfertigen / oder frid machen / dann sie werden Gottes Kinder
heissen.

Darumb meine liebe kindlein / nemet es zu hertzen / das Gott
geboden hat / Du solt nicht tödten / vnd das man vnserm Herrgot
nicht das dienen kan / dann wañ man seine gebot fleissig helt. Vnd
seit gedultig / rechet euch selbs nicht / last vnsern Herrgott rechen /
der wirts wol bezalen / zürnt mit niemand / neidet niemand / hasset
niemand / redet den leuten nicht vbel / thut niemand kein leid / seit
fridsam / vnd helfft andern leuten auch zum frid / vertedingt / ver-
trägt / vnd versönet die leut mit einander wo ihr könt / vermeidet al-
le vrsach des zorns / als da ist mutwillen / gespot / trutzen / spilen /
trincken / vnd was der gleichen ist.

Des gleichen habt jederman lieb / günnet vñnd thut jederman
guts / redet jederman freundlich vnd wol / helfft dem nechsten sein
leben retten / mit schützen vnd schirmen / mit hilff vñnd raht / mit
leeren / vnd warnen / mit leihen / borgen / vnd geben / mit essen vnd
trincken / mit kleiden vnd herbergen / mit trösten / vñnd artzneyen /
vnd wie ihr nur könt / Dann das alles hat vns Gott geboten / da er
spricht / Du solt nicht tödten.

Vnd das ist die meinung / vnd recht verstand dieses fünfften ge-
bots / Das man den Herrn / vber alle ding sol fürchten vnd lieben /
das wir vmb seinen willen / vnserm nechsten an seinem leibe kein
schaden / noch leid thun / sonder im helfen vnd fürdern / in allen
leibs nöten.

Darumb meine liebe kindlein / merckts mit fleis / vñnd wann
man euch fraget.

Wie verstehstu das fünfft gebot?

So solt ihr also antworten.

Wir sollen Gott den Herrn / vber alle ding fürchten vñnd lie-
ben / das wir vmb seinen willen / vnserm nechsten an seinem leibe
kein schaden / noch leid thun / sonder im helfen vnd fürdern / in al-
len leibs nöten.

D III Die sechste

Die sechste Predig.

Auslegung des Sechsten gebots.

In habt jr am negsten gehört / wie ihr das fünfft gebot verstehn solt / darin wir lernen / wie wir vns gegen vnfers nechsten aigne Person halten sollen / das wir im an seinem leib vnd leben kein laid thun sollen / weder mit wercken Worten / oder gedancken. Nun hat aber der mensch / nach seinem eigenem leib nichts liebers / dann sein eigen ehelich Gemahel / wann es anders Christlich vnd recht zu gehet. Darumb folget her nach das Sechst gebot / das lautet also.

Du solt nicht ehebrechen.

Das lehret vns nun fein / wie wir vns gegen vnfern / vnd vnfers nechsten Ehegemahel sollen halten / Nämlich also / das wir vnser Ehegemahel / nicht sollen verachten / noch von in weichen / oder brüchig an in werden / sonder sollen sie lieb haben / Desgleichen sollen wir auch keines andern Ehegemahel verführen / oder die ehe mit ihr prechen / sonder helffen vnd raten das ihr zucht / vnd ehr bewart werd.

Gene. 2. Dann das solt jr kindlein wissen / vnd mit fleis in das hertz pilden / das Gott der **DEUX** den Ehelichen stand selbs geordnet / vnd gesegnet hat / darumb gefelt er im wol / vnd wil / das man in vnerrückt halt. Dann da Gott den menschen geschaffen hat / sprach er / Es ist nicht gutt das der mensch allein sey / ich wil im ein gehülffen machen / vnd lies in entschlaffen / vnd nam ein Rip aus seiner seiten / vñ machet im ein weib daraus / Da sprach der mensch das ist ein mal pain von meinen pain / vnd flaisch von meinem flaische. Darumb wirdt ein Man seinen Vater vnd Mutter verlassen / vnd an seinem Weibe hangen / vnd werden sie zwey ein flaisch sein. Vnd Gott der **DEUX** segnet sie / vnd sprach zu in / Seit fruchtbar / vnd mehret euch / vnd erfüllet die erden / vnd bringet sie vnter euch.

Hebre. 3. Da höret jr meine liebe kindlein / das Gott der **DEUX** / den Ehelichen stand segnet / darumb darff es keines zweiffels / er gefelt im wol / vnd ist ein edler köstlicher stand / Wie auch der Apostel zum **Hebre. 3.** Nebreern anzeigt / vnd spricht / Die Ehe sol ehrlich gehalten werden bey yederman / vnd das Ehe bette vnbesleckt / Die Durer aber vnd die Ehebrecher / wirdt Gott richten.

Weiter spricht der Herr / Seit fruchtbar vnd mehret euch / vnd zeigt

zeigt vns darmit an / das die frucht des ehelichen standes / nemlich die kinder / eine gab Gottes sein / dann wann ers nicht geheissen / vnd geschafft het / so konten die ehe leut nicht kinder mit einander zeugen / Darumb solt ihr mercken / das es ein grosser vnterscheit ist zwischen dem ehelichen leben / vnd dem buben leben Das ehelich leben ist nicht sünd / dann Gott hats geordnet / vnd gefelt ihm wol / Aber das huren vnd buben leben ist sünd / Gott hats verboten / vnd gefelt im vbel darzu hat er dem ehelichen stand beuolen / er sol die welt meren / Dem vnzüchtigen buben leben aber hat ers nicht beuolen / sonder verboten. Die ehelichen kindlein gefallen Gott wol / vnd segnet sie / Aber die vnehelichen kindlein / haben wenig glück vnd segens von Gott / vnd sein auch vor der welt gemeinlich zu allerley ehrlichen stenden vntüchtig.

Darumb ist gar viel am ehelichen stand gelegen / als / aus dem alle fromme / erbare / weyse / gelerte / vnd herrliche leut müssen her kommen / vnd wo man den ehelichen stand sein helt / da werden die kinder wol gezogen / vñ wechst eine feine geschickte junge welt hernach. Wo aber das huren lebē vberhand nimbt / da geht es vbel zu / sehen / hören / vnd lernen die kinder nichts guts / wechst ein böses vnartigs / vnd vngeschlachtet volck auff / das in allen sünden vnd lastern lebt / So kompt dann Gott vnd strafft / mit teurung / krieg / vnd sterben / bis ers alles vmbkeret.

Auch solt ihr das wol mercken / das der Herr spricht / erfüllet die erden / vnd bringt sie vnter euch / dan viel leut kommen darumb nicht in ehelichen stand / das sie sorgen / sie konnen sich nicht erneren. Darumb zeigt Gott der Herr hie an / das er die ehelent erneren / vnd reichlich versorgen wil / wann sie im nur trawen / vnd arbeiten. Dann er spricht / Bringt die erden vnter euch / das ist / was gutes auff dem erdboden ist / vnd wechst / allerley thier / visch / vögel / vnd frucht / die hab ich vmb ewern willen geschaffen / vnd euch geben / arbeitet nur darnach / das ihrs redlich / vnd auffrichtig gewint / vnd in ewrn gewalt bringt. Vnd das saget Gott den ehelenten / die sollen den erdboden vnter sich bringen. Aber hurn vnd buben / sollen nichts haben / wie mans auch sein sicht / das sie gemeiniglich verderben / wie reich sie sein.

Vnd zu solchem ehelichen feinen leben / sein alle menschen / die zu ihrem alter komen / beschaffen vnd geordnet. Darumb solt ihr meine liebe kindlein nicht gedenccken / das es in ewrn freyen willen stehe / ob ihr ehelich wolt werden oder nicht. Vnd das sag ich darumb / das ihr deffer fleissiger / vnd bey zeit lernet / wie ihr euch ehrlich erneren / wol haushalten / vnd ewere kindlein fein auffziehen wolt. Dan Gott hats geboten / das wir alle ehelich werden
d iij sollen

Gen. 1.

Sollen / Aufgenommen dreyerley leut / die hat der Herr Christus im
Euangelio außgezogen / das sie nicht dürffen ehelich werden. Die
ersten sein die / die da von Mutter leib her / zum ehelichen leben vn-
züchtig sein. / Die andern sein die / die da von menschen verschnit-
ten / oder sonst durch krankheit verderbt sein. Die dritten sein die /
den Gott der Herr / aus sonderer gnade verlihen hat / das sie rein
vnd keusch mögen leben / auff das sie dem reich Gottes / vnd dem
heiligen Euangelio / dester fleissiger mögen dienen / vnd aufwar-
ten. Vnd wer diese hohe gab von Gott hat / der sol Gott dancken /
vnd mag des ehelichen stands wol müffig gehn. Dann Christus
der Herr vermanet vns darzu / vnd spricht / Es ist nicht einem jeden
gegeben / wers ergreiffen kan / der ergreiffe es.

Matt. 19.
1. Cor. 7.

Den andern allen / ist geboten / das sie sollen ehelich werden /
dann Gott spricht / Seit fruchtbar / vnd mehret euch. Vnd der hei-
lig Paulus sagt / Wer sich nicht enthelt / der sol heyraten / dann es
sey besser heyraten / dann prinnen. Vnd abermals spricht er / Vmb
der hurerey willen / hab ein jedlicher sein eigen weib / vnd ein jedli-
che ihren eigen man.

Diessell dann der ehelich stand / ein solcher feiner stand ist / vnd
so viel dran gelegen ist / Auff das ye die leut / gern ehelich werden /
vnd seine fromme kinder auffziehen / damit es alles ordenlich vñ
wöl zugehe / so hat Gott der Herr das gebot geben / Du solt nicht
ehbrechen.

Matt. 5.

Vnd damit wirs ye recht verstehn / wie es Gott der Herr ge-
meint hab / vnd auch fleissig vnd trewlich halten / so hat es vnser lie-
ber Herr im Euangelio selbs fein außgelegt / vnd spricht also /
Ihr habt gehört / das zu den alten gesagt ist / Du solt nicht ehe-
brechen. Ich aber sage euch / Wer ein weib ansieht / ihr zu bege-
ren / der hat schon mit ihr die ehe gebrochen in seinem hertzen.

Matt. 5.

Das ist nun gut / vnd leicht zu verstehen / aus der außlegung
des vorigen gebots. Dann Christus vnser Herr leeret vns da /
das es nicht genag sey / wann man schon den ehebruch vermeidet /
im eusserlichen werck / sonder man sol auch alle vnzüchtige / schant-
bare wort / geberd / vnd gedancken / vermeiden. Darumb spricht
er / Welcher ein weib nur ansieht / ihr zu begern / der hat schon die
ehe mit ihr gebrochen in seinem hertzen.

So merckts nun mit allem fleis / meine liebe kindlein / das
Gott der Herr verboten hat / man sol nicht ehebrechen. Vnd ist
sein meinung / man sol weder mit wercken / noch mit worten / noch
mit weis vnd geberden / auch nicht mit den gedancken im hertzen /
ehbrechen / Sonder man sol züchtig / rein / vnd keusch leben /
aintwe

entweder im junckfraw stand / oder im ehelichen stand / oder aber
in wittibe stand / dann diese stend alle drey / sein reine keusche stend /
wann man sie recht helt. Man sol auch niemand helffen / oder ra-
ten / noch vrsach / stat / oder raum darzu geben / das er sein ehe-
brech / sonder man sol darvor sein / mit warnen / vnd vermanen /
mit verhindern / vnd mit straffen / wie man immer kan.

Ihr solt auch nicht gedencken / meine liebe kindlein / das allein
der ehebruch verboten sey / vnd die ander hurerey nicht / dann man
findet etliche gotlose tolle leut / die da meinen / dieweil vnser lieber
Dergott / in den zehen geboten allein den ehebruch nennet / vnnnd
verbeut / es sol in die ander hurerey erlaubt sein. Aber also solt ihr
nicht gedencken / meine liebe kindlein / sonder solt festiglich glau-
ben / das alle hurerey / alle vnkeuscheit / vnd alle vnreinigkeit / wie
mans immer mer erdencken kan / alles sünd ist / vnnnd Gott dem
Derrn auffs höchst misfelt / außgenommen den ehelichen stand.
Dann Moses spricht im alten Testament also / Es sol kein hur sein
vnter den töchtern Israel / Vnd kein hurer / vnter den sönen Israel. Deut. 23.

So spricht der heilig Paulus im newen Testament also / Dure-
rey vnd alle vnreinigkeit last nicht von euch gesagt werden / des ^{1. Cor. 5.}
gleichen schandbare wort / vnd narren teyding auch nicht. Dann
das solt ihr wissen / das kein hurer / noch vnreiner / erbe hat in dem
reich Christi vnd Gottes / Last euch niemand verführen mit vergeb-
lichen worten / den vmb dieser willen / kompt der zorn Gottes vber
die kinder des vnglaubens. Aus diesen worten kont ihr / meine lie-
be kindlein / wol mercken / wie hoch die hurerey von Gott verbo-
ten ist / vnd wie er sie so ernstlich strafft / darumb solt ihr euch mit
allem fleis darvor hüten.

Dann Gott der Herr hat alle hurerey / vnd vnreinigkeit / mit
einander verboten. Da er spricht / Du solt nicht ehebrechen / dann
wer hurerey treibt / ist vor dem ehebruch auch nicht sicher. Vnnnd
wer den ehebruch von hertzen meidet / der mus alle hurerey auch
meyden / das wert ihr zu seiner zeit sein lernen verstehn / yetzo ist es
euch noch zu schwer / vnd zu hoch.

So gedenckt nun meine liebe kindlein / das ihrs fleissig merckt
vnd tieff in ewer hertz bildet / das ihr dis gebot Gottes / trewlich
halt / Zum ersten / das ihr nicht hurerey / vnnnd ehebruch treibet
mit den wetcken / Sonder halt euch keusch vñ rein / bis jr mit Got-
tes hilff / vnd ewrer eltern / vnd guten freund / willen vñ wissen / in
den ehelichen stand kommet Vñ als dan / so haltet ewrm ehelichen
Gema-

1. Co. 7.

gemahel/ ewer trew/ die ihr im zugesagt habt / precht die ehe nicht / mit andern personen / vnd haltet euch gegen ewrn ehegenossen / wie es sich geburt. Dann der heilig Paulus spricht / Das weib ist ihrs leibs nicht mechtig / sonder der man / Desselbigen gleichen auch der man / ist seins leibs nicht mechtig / sonder das weib. Es sol auch keins / ohn redlich vrsach / vnnnd ohn des andern willen hinlauffen / vnd das ander in der gefar sitzen lassen / wie die bösen leichtfertigen leut viel vnd offft thun / dann es ist auch sünd vnd vnrecht / wann sie gleich beide from bleiben / vnnnd ihr keins sein ehe bricht.

Zum andern solt ihr hurerey vnnnd ehebruch meiden / in den worten / das ist / man sol niemand vnzüchtig anreden / niemand nichts vnehrlichs anmuten / nicht vnzüchtige / schandbare wort reden / oder liedlein singen / dardurch ander leut zur vnkeusheit / vnd ehebruch möchten gereitzt werden. Des gleichen sol man auch meiden alle vnzüchtige weifs vnd geberd / vnd vnordenlichen schmuck / mit kleidern / vnd andern sachen / darmit man andern leuten begert wol zu gefallen / vnnnd sie dardurch zur vnzucht gereitzt werden.

Matt. 5.

Zum dritten solt ihr / hurerey / vnd ehebruch meiden / auch im hertzen / vnnnd in gedancken. Dann obs wol die welt nicht weis / vnd nicht strafft / wann ihr etwas böß gedencket / So sihets aber vnser Herr Gott im himel / vnnnd strafftts. Darumb spricht Christus / wer ein weib nur ansihet ihr zubegern / der hat die eye schon gebrochen in seinem hertzen.

Matt. 6.

Ihr solt auch alle vrsach / fleissig meiden / daraus diese laster entspringen / als vbrigs essen vnd trincken / müßig gehn / tantzen / vnd was der gleichen ist. Darumb spricht Christus der Herr / eben von dem ehebruch / Ergert dich dein rechts aug / so reisse es aus / dann es ist dir besser / das eins deiner glieder verderb / dann der gantz leib in die Well geworffen werd. Das ist / wann dir dein rechtes aug vrsach wolt geben zum ehebruch / oder zu andern sünden / so wer dir nützer / du hettest es nicht / Wie viel mer / was dir essen vff trincken / tantzen / vnd spatziern / vrsach gibt zu sünden / soltu es von dir werffen / vnd vnterwegen lassen / auff das du nicht werdest in die Welle geworffen.

Zum letzten / solt ihr nicht allein / für euch selbs züchtig vnnnd keusch sein / sonder auch keinem andern menschen / zur vnkeusheit vrsach geben / nicht darzu rhaten / oder helfen / nicht hausen oder herbergen. Sonder allen fleis ankeren / so viel mit Gott immer möglich ist / das yderman / from / züchtig / vn keusch bleib / auff dz
der

der ehelich stand / der Gott so wol gefelt / vnnnd der gantzen welt /
so viel daran gelegen ist / recht gehalten werdt.

Also solt ihr nun dis gebot verstehen / das ihr alle hurerey / vnd
ehebrecherrey meydet / in wercken / Worten / vnd gedancken / vnnnd
alle vrsach / die darzu beweget / furkummet / bey euch vnd andern
lewten / auff das wir alle / ein feins / reins / züchtigs / keusch leben
füren / damit der eheliche stand vnzerrüt bleib / vnd die welt mit fei
nen frummen / wolgezogenen kindern erfüllet werde zu der ehr
Gottis / vnd zu nutz dem nechsten.

Dann das ist die meinung / vnd der recht verstand dieses sech
sten gebots / das man Gott den Herren / vber alle ding sol fürch
ten vnd lieben / das wir vmb seinen willen keusch vnd züchtig leben
in Worten / wercken / vnd gedancken / vnd ein yedlicher sein gema
hel lieben vnd ehren.

Darumb meine liebe kindlein / merckts mit fleis / vnnnd wann
man euch fraget.

Wie verstehstu das sechst gebot?

So solt ihr also antworten.

Wir sollen Gott den Herren / vber alle ding fürchten vñ lieben
das wir vmb seinen willen / keusch vnnnd züchtig leben / in Worten /
wercken / vnd gedancken / vnnnd ein yedlicher / sein gemahel lieben
vnd ehren.

Die

Die sibend Predig.

Auslegung des Sibenden gebots.

In habt jr am negsten gehört / wie ihr das Sechst gebot verstehen solt / darin wir lernen / wie wir vns gegen vnsern / vnd vnsern Nechsten Ehegemahel sollen halten / das wir / weder mit wercken / Worten / oder gedancken / die Ehe brechen / oder Nurerey treiben / sonder yedermans zucht vnd Keuscheit / helffen bewaren.

Nun ist aber dem Menschen von nöten / wann sein Leib vnd leben versichert / vnd sein Ehlicher stand verwaret ist / das er auch zeitliche güter hab / darmit er sich / sein Weib vnd Kind / vnd das gantze Hausgesind ernehre / Darumb folget hernach das Sibende gebot / das lautet also.

Du solt nicht stelen.

As lehret nun sein / wie wir vns gegen vnsern Nechsten hab vnd gut / vnd all seiner narung sollen halten / das wir im nicht mit vnrecht etwas entziehen / verderben / oder verwarlosen / Sonder mit allem fleis behüten / verwaren / vnd mehrer helffen / wie wir begern / das ander Leut vns auch thun sollen.

Vnd das solt jr Kindlein mit fleis mercken / vnd wol in das hertz bilden / das das wörtlein stelen baide vor Gott nach der heiligen Schrift / vnd vor der Welt / nach dem Keyserlichen Rechten / heist nicht allein / wann man dem Nechsten sein gut / heimlich vnd verborgen hintregt / Sonder auch / wann mans mit gewalt raubet / oder mit listen vnd vnrecht / zu sich zeucht / vnd brauchet / on sein wissen oder willen / wann die sach gleich ein guteschein hat. Vnd damit jrs dester bas verstehet / meine liebe Kindlein / so hört / vnd vernemet desselben etliche Exempel / von allerley Stenden in der Welt / Vnd zum ersten von der Oberkeit.

Gott der **HE** hat vns geboten / wir sollen der Oberkeit / rent / zins / zol vnd stewer geben / das sie die bösen straffen / vnd die frommen beschützen / Wann nun die Oberkeit / die Vnterthanen zu hart beschweren / mehr fordern / dann sie zur rechten not / zu schützen vnd zu schirmen bedürffen / vnd also die Leut verderben /
die sie

die sie solten vor dem verderben behüten / So ist das selbig nicht allein ein tyranny / sonder auch ein rechter sündlicher diebstal vor Gott / dann sie nemen den vnterthanen das ihr / on recht / vnd on iren willen. Vnd wann sie das / das sie schon mit recht ein nemen / nicht darzu gebrauchen / darzu es verordnet vnd geben ist / als wann sie das gelt / das zu schützen / vnd schirmen gehört / verpancketiren verspilten / mit bracht / hoffart / vnd sündlichen wollusten an werden / so ist es ein rechter diebstal vor Gott / Des gleichen wann sie aus kargheit / vnd geitz / etwas vnterwegen lassen / das sie zuthun schuldig weren / Als wann man das Regiment / vnd Gericht / nicht mit frommen verstendigen leuten versorget / die Pfarr vnd Predig ambt / nicht mit Gottsförchtigen gelerten leuten versicht / Schulen / vnd andere nötige embter zergehen lest / nötige gemeine gebew / als kirchen / rathaus / statmaur / brucken / bronnen / vnd der gleichen zerfallen lest / allein darumb / das mans gelt spar / so wirt es den orten entzogen / dahin es gehört / vnd darzu es geben ist das ist dann auch ein rechter sündlicher diebstal vor Gott.

Eben also solt ihrs auch verstehn / von Bischoffen / pfarhern vnd predigern / dann wann dieselbigen vmb ihres nutz willen / die warheit schweigen / vnd lügen predigen / dar mit sie ander leut güter zusich bringen / wie dann mit vigilien / seelmessen / sarragen / ablas briuen / bruderschafften / walfarten / vnd andern solchen gauckel werck mer / lange zeit an allen orten geschien ist / vnnnd noch an vielen orten ohn auffhören geschicht / So ist es auch ein rechter sündlicher diebstal vor Gott / dann man betrugt den nechsten vmb sein gut / vnd zeuchts dahin / da ers nicht hin geben würde / wann er die warheit wüste.

Des gleichen wenn die Rechts gelerten / Advocaten / vnd Procuratores yemand vberreden / er hab ein gute sach / so sie doch böß ist / allein darumb / das sie etwas zuthun haben / vnnnd gelt vberkommen / Oder wann sie sich mit listen / vnnnd bößen stucken vnterstehn / ein gute sach böß / oder ein böße sach gut zu machen / darmit der richter betrogen werd / vnnnd ein vnrecht vrteil spreche / Oder wann der richter selbst mit wissen ein vnrecht vrteil gibt / in einer sachen / die gelt oder gut antrifft / so ist es auch ein rechter sündlicher diebstal vor Gott / dan sie entziehen dem rechten teil heimlich das sein / vnnnd gebens dem vnrechten teil. Es ist auch das nicht ein kleiner diebstal / wann die leut / der verstorbenen güter wollen erben / die in nicht gebüren / oder wann man falsche testament schreibet / oder die rechten testament verlaugnet / vnd vntertruckt.

Also auch solt ihrs verstehn / von Kauffleuten vnd hendlern / wann sie zu vberflüssigen vnd vnpillichen gewin nemen / Wann sie falsche war hin geben / oder falsch gewicht / falsch elen / vnd falsche mass

sche maß brauchen/oder wann sie mit falschen brieten vnd neuen
mehrnen/die leut vberreden/das sie ein wahr wolfeil hingeben/von
der sie heimlich wissen/das sie bald werd auffschlagen/Oder das
man in teur abkeuff / das sie wissen / das bald werd abschlagen/
Oder wann sie liegen vnd felschlich schweren / sie können ein ding
wolfeyler bey einem andern kauffen / vnd nöten also gleich die leut/
die in glauben / das mans in auch so wolfeil muß geben. Auch
wann sie die armen hantwercks leut / vnd stuckwercker an sich zie-
hen/das sie ihnen allein arbeiten / vnnnd darnach sich stellen/ als
dürffens der wahr nicht / bis sie die armen leut dringen / das sie
müssen wolfeiler geben / dann sie es können erschwingen. Auch
mann sie practicken/ gesellschaft / vnd monopolien anrichten/ da-
mit sie die leut dringen/das man in ihr wahr muß abkauffen/ als
thwer als sie wöllen. Das alles / vnd dergleichen / sein vor Gott ei-
tel lauter sundliche diebstal / das da wirt dem nechste sein gut heim-
lich entzogen / ohn recht / vnd wieder sein willen / welchs er wol
behielt/wann diese böse stuck nicht wern.

Des gleichen / wann die handtwercks leut/felschlich arbeiten/
vnd sich fleissen / das ihr arbeit besser schein / dann sie ist / Oder
wann sie mehr zu lohn fordern / dann sie verdienet haben / so ist es
auch ein rechter sundlicher diebstal vor Gott / dann dardurch wirt
dem nechsten sein gut auch heimlich entzogen / ohn recht / wieder
sein willen / das er gern behielt.

Also ist es auch vnter dem baur volck / welchen König / Für-
sten vnd Derrn / das land / vnnnd feld zugeteilet haben / das sie es
bawen / vnd land vnd leut erneren helffen sollen. Wann sie nun
vnfleissig bawen / faul vnd nachlessig sein / oder die frucht / die sie er-
bawet / vnd das vich / das sie erzogen haben / zu tewer wider hin-
geben / darmit sie die armen leut schinden vnnnd beschweren / dar-
nach stoltz / vnd hoffertig darzu werden / So sein sie auch rechte
schedliche dieb vor Gott. Dann die obrigkeit gibt keinem baurn/
das land oder feld gar zu eigen / sonder behelt ihr selbs alweg die
grösten gerechtigkeit benor / wie man sieht an lehen gütern / frey-
sen / vnd dergleichen. Vnd der baur ist nur ein knecht darauff ge-
setzt / das er land vnd leut seiner obrigkeit helff erneren / thut ers
nicht trewlich / oder gibts zu tewer / so ist es ein dieberey. Dann
wann ein baur also herr vber sein acker wer / das er möcht bawen
wann er wolt / oder hingeben / als tewr als er wolt / so vermöcht-
ten alle paurn in einem gantzen dorff so vil nicht / das sie den gering-
sten acker kauffen vnd bezalen möchten / vnnnd wir müsten zu letst
auch wol hungers bey ihnen sterben.

Des gleichen solt ihrs auch verstehn / von den ehehalten / das
ist / von meiden vñ knechten / von handtwercks gesellen / vnd taglö-
nern / dann diese alle werden darumb gedingt vnd bestellet / das sie
sollen arbeiten / vñ mit ihrer arbeit der herrschafft nutz schaffen / vñ
das

Das gut helffen erhalten / bessern vnd meren. Was sie nun vnfleißig vnd vntreulich dienen / vnd arbeiten / als wann sie faul vnd nachlässig sein oder des herrn gut / vnnützlich verthun / verderben oder verwarlosen / so entziehen sie irem herrn den nutz / den er von in sol haben. Des gleichen wann sie mer lons fordern / vnd nemen / dann sie können verdienen. Auch wann sie zu vnrechter zeit aus dem dienst lauffen / so thun sie der herrschafft schaden / schmeclern ihr gut vnd narung / vnd sein rechte schedliche dieb / vnd diebin / vnd sündigen schwerlich wieder Gottes gebot.

Also solt irs durch aus verstehn / meine liebe kindlein / das ein jeder / der ander leut gut mit vnrecht / heimlich / tückisch / oder ohn willen des rechten Herrn zu sich zeucht / oder einen andern schaden thut / an seiner narung vnd seinem gut / oder seinem nechsten den nutz vnd frommen nicht schafft / den er im schuldig ist / oder verdienten lon / oder verfallene schuld / aus geitz / ohn not / von eigens nutz wegen nicht bezalt / Oder nicht wider gibt / was man ihm zubehalten hat geben / oder was er gefunden hat / der ist vor Gott ein rechter dieb / ob er gleich vor der welt nicht darumb gestrafft wirdt.

Vnd darumb sehet ihr nun meine liebe kindlein / wie ein elend schendlich ding es in der welt ist / dann solcher heimlicher dieberey / ist die gantze welt vol / in allen stenden / von dem wenigsten / bis auff den meisten Nun ist es ye ein schendlicher name / wann man ein / ein dieb scheiten kan / darumb tödtet man sie auch mit dem aller schendlichsten tod / nemlich das man sie an galgen henckt. Vnd wann sie schon nicht gehenckt werden / so strafft sie doch vnser herr gott / das es in nicht erspreust / was sie also erschinden vnd erschaben / schicket in wieder leut / die in eben thun / wie sie andern leutest gethon haben / oder lest sie sonst verderben.

Darumb meine liebe kindlein / nemet Gottes gebott zu hertzen vnd hütet euch vor dem steelen / nemet niemand das sein / thut niemand kein schaden / sonder verhütet schaden wo ihr kont / vnd thut yederman / was ihr schuldig seit / ein yeder nach seinem stand. Vnd wann euch freindt gut vertrauet wirt / geht recht darmit vmb / dann ihr solt ja frömmere werden / dann die alte welt ist / dieweil vnser Herr Gott euch sein wort / vnd göttlichen willen / so fein anzeigen vnd vnterweisen lest / von welchem die alten nicht so viel gehört / vnd gelernet haben / Thut irs aber nicht / so wirt euch gewislich Gott hart straffen. Dann es spricht vnser lieber Herr im Euangelio / Wann ein knecht seines herrn willen weis / vnd thut Luc. 12 sein nicht / so wirdt er mit viel streichen geschlagen.

Vnd dieweil ihr gehört habt / das es ein diebstal sey / was man
e ij die leut

Matt. 10.

die leut vbernimpt / mit grossen gewinn / oder grossen lohn /
So solt ihr dennoch wissen / das es vnserm Herr Gott nicht vbel
gefelt / das ein yeder mit seiner arbeit / oder mit seinem handel /
wann er recht vnd treulich darmit vmbgeht / so viel gewinn / das er
sich vnd seine vnerzogene kinder erlernen kan. Dann es spricht der
Herr Christus im Euangelio / Es ist ein yeder arbeiters seins lons
wert. Vnd der lohn oder gewin / sol so gros sein / das er sich nicht al
lein darvon erlernen kan / weil er arbeiten mag / sonder auch was er
alt vnd krank worden ist / dennoch nicht betteln dorff. Das zeiget
Salomon in sprüchen am fünfften capittel / da er saget / Du solt
dein ehr (das ist / dein kunst vnd geschicklichkeit / oder dein arbeit /
darmit dich dein Gott begabet hat / das man dich darumb ehrlich
helt) die solt du keinem andern geben / das ist du solt dir / vnd dei
nen kindern / die dir Gott betuohlen hat / nutz machen. Vnd deine
jar / das ist / deine junge tag / darin du nutz schaffen kanst / soltu
nicht geben dem grausamen / das ist / dem vnbarhertzigen / der
dir nicht lohnt / sonder in der not / oder im alter betteln lest. Das
sich nicht frembde / von deinem vermügen settigen. Vnd dein ar
beit sey in eines andern haus / das ist / das nicht ander leut / den
nutz von deiner arbeit haben / vnd du zu einem betler darbey werst /
vnd mustest darnach seufftzen / wann du dein leib vnd gut verzeret
hast. Darumb spricht auch der heilig Paulus / Welcher seinem
eigen hauss nicht wol vorsteht / der ist erger dann ein vnglaubiger.

1. Tim. 4.

Auff das ihr nun meine liebe kindlein / das siebend gebot auch
recht versteht / so must ihr wissen / das vns darin verboten ist / das
wir nicht sollen stehlen / rauben / oder schaden thun / wieder mit
dem wercke / noch mit den Worten / noch mit den gedancken / wie
ihr in den vorigen geboten gehört vñ gelernet habt. Mit dem werck
sollen wir nicht schaden thun in keinem weg / wie vor angezeigt ist /
mit den Worten sollen wir nicht stehlen / das wir niemand das sein
abliegen / abschwatzen / oder ab sprechen / niemand sein arbeit /
oder sein wesen schenden / noch sonst etwas reden / dardurch dem
nechsten schaden geschehe. Mit den gedancken sollen wir nicht ste
len / das wir nicht durch geitz / frembdes guts begern / vnd durch
list vnd vnrecht zu vberkommen trachten. Sonder sollen yederman
geben was sein ist / yederman dienen / vnd thun was wir schuldig
sein / yedermans schaden wern / vor schaden warnen / vnd alles re
den / dardurch des nechsten gut vnd narung gefürdert / vnd geme
ret werd / yederman guts gönnen von hertzen / vnd niemand ney
den. Ja wir sollen auch von vnserm eigen gut / mildt vnd barin
hertzig sein / vnd den armen helffen vnd mitteilen / Wie vns Chri
stus gebeut / vnd spricht / Gebt almusen von dem / das euch vbrig
ist / so wirts euch alles rein sein Vnd abermal / Gib einem yeden der
dich bit. Dann Christus spricht / Was man dem aller geringsten
Christen vmb seinen willen zu gut thu / das hab man ihm selber
thun.

Luce. 11.

Luc. 6.

Matt. 25.

Dann

Dann das ist die meinung vnd der recht verstand dieses siebenden gebots / Das man Gott den Herrn vber alle ding sol fürchten vnd lieben / das wir vmb seinen willen / vnsers nechsten gelt oder gut nicht nemen / noch mit falscher war / oder bösem handel an vns bringen / sonder im sein gut vnd narung helfen bessern / vnd behüten.

Darumb meine liebe kindlein / merckts mit fleis / vnd wan man euch fraget.

Wie verstestu das siebend gebot?

So solt ihr also antworten.

Wir sollen Gott den Herrn / vber alle ding fürchten vnd lieben / das wir vmb seinet willen / vnsers nechsten gelt noch gut nicht nemen / noch mit falscher war / oder bösem handel an vns bringen / sonder im sein gut vnd narung helfen bessern vnd behüten.

e iij Die acht

Die achte Predig.

Auslegung des achten gebots.

Du hast iht am nechsten gehört / wie ihr das siebend gebot verstein solt / darin wir lernen / das wir vnsers nechsten gut in keinerley weg / oder weis / mit vnrecht zu vns ziehen solen / auch wann er vns aus gutem willen / oder aus not / daruber vertrawt / das wir nicht anderst / dann wie vns beuolen / darmit handeln sollen / sond er sollen allen müglichen fleis ankeren / das im sein gut bewaret / erhalten / gebessert / vnd gemert werde.

Nun ist aber dem menschen sein zeitliche narung nicht alweg am gut allein gelegen / sonder ligt im offft der maiste teil / oder aber gar / an seinem guten namen / oder gutem gerucht / vnd leumut / das ist / am glauben vnd trawen / vnd wann im gleich die narung nicht daran lege / so wil doch Gott sonst / das wir wol leben / vnnnd ein gut gerucht behalten / auff das wir niemand ergern / oder kein böß exempel geben / Darumb volget yetzo hernach das acht gebot / das lautet also.

Du solt kein falsch zeugnus geben / wieder deinen nechsten.

Das leret vns nun fein / wie wir vns gegen vnsers nechsten ehr vnd gutem namen sollen halten / das wir in nicht mit lügen / oder falschen zeugnus zu schanden machen / sonder mit allem fleis sein ehr / glauben / vnd trawen helfen erretten / bewarn / vnd mern / wie wir begern / das ander leut vns auch thun sollen.

Und da solt jr kindlein mit allem fleis mercken / vnd wol in das hertz bilden / wie ein gut köstlich vnnnd edel ding es ist / wann ein mensch ein guten namen / oder ein gut gerucht hat / das ist / wann yederman guts von im redet / vnd niemand mit der warheit / ichts arges von im sagen kan. Dann Salomon spricht / Das gerucht ist köstlicher dann gros reichthumb. Und so vnser lieber Herr Gott / so fleissig gebeut / das vns ander leut / vnsern guten namen nicht mit falschem zeugnis sollen vntertrucken. **D** wil er gewislich von vns haben / vnd gefelt im wol / das wir vns auch fleis ankeren / das wir ein guten namen / vnd ein gut gerucht / vnter den menschen vberkommen vnd behalten. Das geschicht aber / wann wir from vnd redlich sein / Gottes gebot fleissig halten / vnnnd alles vbel fliehen vnd meiden. Wie sanct Paulus leret / Wir sollen auch allen bößen schein meiden.

Pro. 22.

1. Thess. 5.

Dara

Darumb meine liebe kindlein / seit from / vnd züchtig / halt die gebot Gottes / vnd volget ewrn eltern / vnd obern / das jr ein guten namen vberkompt / dann das gefelt Gott woll / vnd ist euch nutz / zu ehr vnd zu gut / zu trawen / vnd zu glauben. Vnd thut nicht / wie etliche böse leut thun / die sich nichts schemen / vnd nichts darnach fragen / das yederman vbels von jn redet / darumb schemen sie sich auch keiner sünden / noch schanden. Aber Gott wirt sie gewislich straffen / vnd werden ein böß end nemen.

Dar gegen hütet euch auch mit allem fleis / meine liebe kindlein / das ihr kein falsch zeugnus gebt / wieder ewrn nechsten / das ist / das ihr andern leuten / ihr ehr vnd ihren guten namen nicht mit lügen nemet oder vnterdruckt. Dann zeugnus haist eigentlich / was man saget oder redet / in einer sachen / do zweien oder mehr strittig innen sein. Als wann einer saget / ich hab dem etwas gelihen / vnd der selbig laugnet / vnd spricht nain darzu. Wann nun ein ander köme / vnd geb ein falsche zeugnus / vnd sprech / Ich habs gesehen / das er jm das gelihen hat / So thut er seinem nechsten zwen scheden. Zum ersten machet er / das sein nechster müß wieder geben oder bezalen / das man jm doch nicht gelihen het. Zum andern machet er / das man ihn für ein lugner hielt / vnd jm nichts mer trawet / dann yederman würd gedencen / Sibe ist das so ein leichtfertiger verlogner man / der dafür laugnet / wann man ihm etwas leihet / wann man jn schon vberweisen kan / so wil ich nichts mehr von jm halten. Nun ist es aber viel ein grösserer schad / wann einer sein guten namen / das ist / glauben vnd trawen verleurt / dann wann er etwas mus bezalen / das er nicht schuldig ist / oder ein straff leiden / die er nicht verdienet hat. Darumb wirt vns in diesem gebot fürnemlich verboten / das wir vnsers nechsten ehr / vnd guten namen / mit lügen / oder falschem zeugnus nicht schmelern / oder vntertrucken sollen.

Es dienet auch ein warhafftigs zeugnus / offit darzu / das man zancß vnd hadder / zwischen den leuten / dardurch stillt vnd fried macht / es sey gleich vor gericht / oder an andern orten. Aber mit falschen zeugnus / macht man nur zancß vnd hader / neid vnd hasß / feindschafft vnd vnfried. Darumb wirt vns in diesem gebot auch verboten / das wir die leut / mit lügen nicht gegen einander verschwatzen / nicht zu zorn gegen einander raitzen / oder zancß vnd hadder mehrn sollen / Sonder sollen die warheit sagen vnd vberall wo wir kön / in fried vnd einigkeit machen / vñ die leut mit einander versönen / das gefelt Gott dem Herren sonderlich wol / vnd ist ein feine gungent. Darumb spricht Christus im Matth. 5 Euangelio / Selig sein die s. idfertigen / das ist / die gern fried machen / dann sie wern Gottes kinder genent werden.

Darumb meine liebe kindlein / hütet euch mit allem fleis / das
e iij ihr

ihr nicht lieget/ oder falsche zeugnis gebet/ auff das ihr niemand
sein ehr raubet/ oder vnfried vnd zorn anrichtet/ zu keiner zeit/ an
keinem ort. Am aller meisten aber hütet euch/ das ihr vor gericht/
wann ihr darzu gefordert wert/ kein falsch zeugnis gebet. Dann
Gott der Herr/ hat das gericht vnd die obrigkeit selbst geordnet/
vnd eingesetzt/ das sie die frommen schützen/ vnd die bösen straffen
sollen/ wir konten sonst kein fried noch rwe in dieser welt haben.
Vnd wer beschwert ist/ vnd vnrecht leidet/ dem sol das gericht
helffen/ wann ers anrufft. Darumb sol man recht richten vnd vr-
teilen/ dann es ist Gottes ordnung/ vnd der welt höchster trost vñ
schutz/ Vnd wer gericht vnd recht verkert/ der thut wieder Gottis
ordnung/ vnd wieder alle menschen. Nun kan aber niemand das
gericht leichter verführen/ dann ein falscher zeng/ Darumb ist es
ein vberaus grosse sünd/ ya es ist mehr dann ein sünd/ dann ein fal-
scher zenge schwert ein falschen eid/ wieder das ander gebot/
macht das gericht falsch/ das Gottes ordnung ist/ veracht sein
obrigkeit/ vnd verführt die selben/ beraubt sein nechsten seiner ehr/
vnd des guts darzu/ darumb er rechtet/ hindert den fried/ den
man mit dem gerechten vrtel sol machen/ Vnd richtet hadder vnd
zanck an/ macht neid vnd hass/ zorn/ argwon/ vnd feindschafft/
daraus oft todschleg/ vnd andere grosse vbel entstehn/ Das kan
dann Gott nicht vngerochen lassen/ sonder strafft es gewisslich
auffs aller ernstlichst/ Darumb sol sich yederman darvor hüten/
vnd kein falsche zeugnis geben.

Es ist vns auch in diesem gebot verboten/ aller böser argwon.
Argwon aber ist/ wan man von dem nechsten nichts guts ge-
denckt/ sonder legt im sein wort oder werck vbel aus/ so man doch
nicht gewis ist/ noch gewis sein kan/ das es also sey. Dann wer ein
solchen bösen argwon anrichtet/ der gibt auch falsche zeugnis/
vnd thut eben so grossen schaden/ als der sonst falsche zeugnis gibt
ya er thut noch grössern schaden. Dann wer öffentlich leugt/ oder
falsche zeugnis gibt/ den kan man für recht fordern vnd verklagen
Wer aber ein bösen argwon mit worten anricht/ vnd seinen nech-
sten vnbillicher weis verdecktig macht/ dem kan man nicht wern/
dann er redets also/ das ers doch nicht wil geredt haben/ vnd thut
gleich wol schaden/ das ist dann auch wieder dis gebot/ vnd ein
grosse sünd.

1. Cor. 13.
Darumb meine liebe kindlein/ hütet euch vor diesem laster
auch mit allem fleis/ vnd seit nicht argwönisch bey euch selbst/ son-
der leget alles zum besten aus/ was ihr von ewrm nechsten sehet/
vnd höret/ dann das ist der Christlichen liebe art/ vnd natur/ Wie
Paulus sagt/ die lieb gedenckt nicht arges.

Vnd damit ihr dis gebot ja recht versteht/ meine liebe kindlein/
so solt

so solt ihr wissen/ das vns Gott der Herr in diesem gebot verbeit/
alles böse geschwetz/ damit wir wieder die liebe handeln/ vnd vn-
serm nechsten schaden thun / dann es ist alles sünd vnd vnrecht/
was wieder die liebe geschwatzet wirdt/ wann es schon an im selbst
war ist. Darumb spricht vnser lieber Herr Christus im Euangelio Matt. 12.
Wir müssen rechenschafft geben/ von einem yeden vnnützen wort
das aus vnserm munde gehe.

So wir dann von den vnnützen Worten müssen rechenschafft
geben/ so müssen wir noch viel mehr rechenschafft geben/ von den
schedlichen vnd ergerlichen Worten. Darumb ist vns in diesem ge-
bot auch verboten/ das gemein/ gross/ vnd ergerlich laster des
affterredens/ da man des nechsten sünd vnd gebrechen ausschreit/
vnd außrichtet/ dann daraus kompt nichts guts/ sonder eitel scha-
den vñ ergernus. Dann wann man frembde sünde also ausschreiet/
so ergern sich viel leut daruon/ vnd gedenccken/ sihe/ thut der vnd
der das/ vnd ist so gemein/ so wil ichs auch thun. Vnd vmb des
willen/ hat der heilig Paulus zun Ephesern / am fünfften verbo-
ten/ Man sol hurerey/vnreynigkeit/vnd geitz/ auch nicht nennen
vnter den Christen/ das ist/ man sol nicht viel vnnötigs geschwetz
dar von treiben/ das man nicht den leuten vrsach darzu gebe/ die
es sonst nicht theten.

Nun spricht aber der Herr Christus im Euangelio / Es were Matt. 5.
dem der ergernus anrichtet / besser / das man ihm ein mühlstein an
hals henccket/ vnd in das tieffe meer versencket. So gar ein grosse
sünd ist es/ vnd so hefftig strafft es Gott der Herr/ wann man erger-
nus vnter den menschen anrichtet.

Weiter begibt es sich auch zu zeiten / wann man ein menschen
also ausschreiet / vnd vberal/ vor yederman zu schanden macht/
das er darob verrucht vnd vnuerschambt wirdt vnd fragt nichts
mer darnach/ bleibt also sein lebtag in sünden / so er sich sonst be-
keret vnd gebessert het.

Darumb sol man die leut nicht außrichten/ noch vbel nachre-
den/ wann es schon war ist/ was man von in sagen wolt. Sonder
man sol sich halten/ wie vns Christus der Herr im Euangelio ge- Matt. 17.
lert hat da er also spricht / Sündiget dein bruder an dir / so gehe
hin vnd straffe in zwischen dir vnd im allein/ höret er dich/ so hastu
dein bruder gewonnen/ Höret er dich nicht/ so nim noch ein oder
zwen zu dir/ auff das alle sach bestehe/ auff zweier oder dreier zeu-
gen munde. Höret er dich nicht/ so sage es der gemeine / Höret er
die gemeine nicht/ so halt in als ein Weiden.

Das ist/ meine liebe kindlein / die recht weiß/ von ander leut
sünden zu reden. Vnd wer in nicht also thun wil/ der sol stil schwei-
gen/ dan es bringt doch kein nutz/ sonder eitel ergernus vñ schaden.
Vnd

Vnd ist nicht genug / das wir vns / für vnser person also hal-
ten / sonder wir sollen auch andern leuten nicht vrsach darzu geben
das sie anderst handeln / dann wie ihr yetzo gehört habt / das ist /
wir sollen nicht darzu helffen / noch rahen / Wann es aber ya von
andern leuten geschicht / so sollen wir vns doch das selb nicht lassen
gefallen / sonder sollen saur dazu sehen / vnd sie freundlich vnd ernst-
lich darumb straffen.

Also solt ihr nun dis gebot verstehn / meine liebe kindlein / das
vns darin verboten sey / das wir mit allem fleis sollen meiden / al-
les liegen vnd triegen / vnd alle andere schedliche wort / darmit man
dem nechsten sein ehr abschneidet / oder zanck vnd hader anrichtet /
es sey gleich vor gericht oder an andern orten. Wir sollen auch
nicht argwonisch sein / das wir vnserm nechsten / sein wort vnnnd
werck vbel auslegen / oder sonst seine gebrechen / vnd feel ausbrei-
ten / vnd ausschreien / Sonder sollen die warheit zu der ehr Gottes
vnd nutz des nechsten alzeit reden vnd bekennen / vnd yederman al-
le ehr / vnd alles guts nach sagen / frid vnd einigkeit allenthalben
fürdern / alle ding zum besten auslegen / vnd des nechsten sund vñ
gebrechen / wann wirs nicht heilen können / zudecken vnd tragen.

Dann das ist die meinung vnd der recht verstand dieses achten
gebots / Das man Gott den Herrn vber alle ding sol fürchten vnd
lieben / das wir vmb seinen willen / vnsern nechsten nicht felschlich
beliegen / verraten / affterreden / oder bösen leumut machen / Son-
der ihn entschuldigen / guts von jm reden / vnnnd alles zum besten
keren.

Darumb meine liebe kindlein / merckts mit fleis / vnnnd wann
man euch fraget:

Wie verstest du das acht gebot?

So solt ihr also antworten.

Wir sollen Gott den Herrn / vber alle ding fürchten vnd liebē /
das wir vmb seinen willē. vnsern nechsten nicht felschlich beliegen /
verraten / affterreden / oder bösen leumut machen / sonder in ent-
schuldigen / vnd guts von jm reden / vnd alles zum besten keren.

Die

Die neundt Predig.

Auslegung des IX. vnd. X. gebots.

Vn habt ihr am nechsten gehört / wie ihr das acht gebot ver-
stehn solt / darin wir lernen / wie wir vns gegen vnsern nech-
sten ehr vnd glimpff sollen halten / das wir kein falsch zeugnis wi-
der in geben / noch sonst felsehlich / oder vnordenlich nachreden /
sonder guts von im sagen / in entschuldigen / vnd alles zum besten
auslegen sollen.

Nun ist es aber nicht genug / wann wir schon / die vorigen ge-
bot eusserlich im werck alle halten / vnd vnserm nechsten gleich /
wieder an seinem leib / noch an seinem gemabel / noch an seinem
gut / noch an seinen ehren kein schaden thun / sonder wir sein vnd
bleiben dannoch sündler / vnd müsten alle verdambt werden / wann
Gott nach seiner gerechtigkeit mit vns wolt handeln / vnd nicht
nach der barmhertzigkeit. Darumb / auff das wir solchs wol ver-
stehn lernen / so volgen nun die letzten zwey gebot / nemlich das
neundt vnd zehent / die lauten also.

Du solt dich nicht lassen gelusten deines nech-
sten hauss. Du solt dich nicht lassen gelusten
deines nechsten weibs / noch seines knechts / noch
seiner magd / noch seines oxsen / noch seines esels /
noch alles das dein nechster hat.

Vn diese zwey gebot lehren vns nun sein erkennen / das
nicht allein die eusserlichen bösen werck vnd wort sünd sein
sonder auch die inwendigen neigung / begird / vnd luste des
hertzen / der niemand ledig ist / sonder werden vns in mütter leib
angeboren.

Darumb solt ihr / meine liebe kindlein / das mit allem fleis mer-
cken / vnd wol in das hertz bilden / das gelusten sünd ist / vnd alle
menschen auff erden / auch die kindlein in mütter leib / sein nicht on-
lust / Darumb sein wir auch alle sündler / vnd niemand ist vnschul-
dig vor Gott / Wie Paulus spricht / Sie haben all gesündigt / vnd
mangeln des preis Gottes. Vnd David spricht auch / Sie sein alle
abgewichen / vnd alle sambt vntüchtig / da ist keiner der guts thu
auch nicht einer.

Rom. 3.
psal. 150

Dann

Dann das entpfinden vnd erfahren wir alle / das wir von natur voller bösen lust stecken / dann wir haben lust / zu allem dem / das dem fleisch wol thut / vnd fliehen alles das dem leib wee thut / Also / das man solche lust auch an den kindlein in der wiegen / ja auch in mutterleib spüret. Dann wann ein kindlein hart ligt / hungerrig oder dürstig ist / oder ist im zu kalt / oder zu heiss / so zappelt es / vnd windt sich hin vnd her / vnd weinet darumb. Des gleichen wann mans etwas schöns sehen lest / vnd nimpt ims bald wieder / Oder wann man ims nicht gibt wans daran gedenckt / so weinet es auch darumb / Das sein aber eitel grosse anzeigen / das auch die kindlein in der wiegen / vnnd in mutterleib / voller böser lust sein / Vnd sein also auch sündler / als wol / als die alten / Dann sie thun wieder diese gebot / Du solt dich nicht lassen gelusten.

Vnnd ihr meine liebe kindlein / solt das fleissig mercken / vnnd ewer sünd auch recht lernen erkennen / Vnd solt euch gar nicht daran keren / das etliche vnuerstendige leut sagen / Die jungen kindlein sein noch ohn sünd / rein / vnnd vnschuldig / dann es ist nicht war / vnd die solchs sagen / verführen sich selbst / vnnd ander leut mit in / Dann darumb taufft man die kindlein / das sie vergebung der sünd wol bedörffen / vnd durch die tauff die selbige yberkommen sollen.

Das ist aber gewisslich war / das solchs wenig leut verstehn / dann die vernunft begreiffit nicht / das die kindlein von der lust wegen / auch sündler sollen sein / Sonder sie meint / dieweil sie noch kein böss werck thun / so sein sie rein / vnnd vnschuldig. Wir aber sollen nicht nach der vernunft vrteilen / sonder nach dem wort Gottes / vnnd sollen wissen vnd bekennen / das das gelusten auch sünd sey. Dann wann wir recht from / rein / vnnd vnschuldig weren / so liessen wir vns nichts gelusten / oder wol gefallen / das vns oder vnserm leib / lieblich vnd angensem were / sonder allein / was vns Gott gebe / oder was im wolgefiele / das würde vns auch wol gefallen / vnd lieblich sein. Des gleichen wurden wir auch nichts hassen oder fliehen / das vns / oder vnserm leib wieder ist / vnd wee thut / Sonder allein was Gott misfelt / vnd vns von im verboten ist / das wurden wir hassen vn fliehen / Vnd wurden also lieber mangeln vnd leiden / wann es Gottes will were / dann das wir solten / fried / rwe / vnnd alles genug haben / wieder seinen willen. Wir thuns aber nicht / sonder lassen vns eins dings gelusten / eh wir wisse ob vns Gott dasselbig geben wol oder nicht / vnd wer den ye ein ding feind / eh wir wissen ob vns Gott des selbigen yberheben wil oder nicht. Ja wann wir sein willen schon wissen / so gelust vns dannoch ein anders / das ist dann ein grosse sünd / Dann sein will solt geschehen / vnnd nicht der vnser / wie wir im Vater vnser bitten.

Vnd

Vnd das ist nun ein seer grosse weisheit / das wir solchs ver-
stehn / dann es versteht nicht yederman. Also das auch der heylig
Paulus zun Römern sagt / Er het diese sündt nicht erkant / ohn ^{Rom. 7.}
durchs gesetz. Denn er spricht / Ich wuste nichts von der lust / das
sie sündt ist / wann das gesetz nicht het gesagt / Du solt dich nicht
lassen gelüsten. Darumb meine liebe kindlein merckts mit fleis / so
wert ihr Gottes forcht recht lernen / Dann wir sollen Gott den
Derrn / nicht allein fürchten / wann wir böse wort vnd werck trei-
ben / sonder auch / wann sich böse lust in vnserm hertzen erregen /
Ja wann sie sich schon ein zeitlang nicht regen / so sollen wir dan-
noch wissen / das sie in vnserm hertzen verborgen liegen / vnd sündt
sein / Dann wann sie Gott nicht in vns wüst / vnd erkennet / so het
er vns das gelüsten nicht dörfen verbieten / Wie Paulus bezeugt ^{1 Tim. 4.}
vnd spricht / Dem gerechten ist kein gesetz geben. Vnd diese forcht
Gottes ist ein anfang aller weisheit / wie ihr gehört habt. Dar-
umb wann ihr die zehen gebot fleissig lernt / recht vñ wol versteht
so wert ihr weise leut werden. Dann David spricht / Die gebot ^{Psal. 119.}
Gottes / machen die einfeltigen weis:

Diweil wir den nun wissen / meine liebe kindlein / das gelüsten
sündt ist / so sollen wir vns auch daruor hüten / so viel mit Gottis
gnad vñd hylff immer möglich ist / Sonderlich aber sollen wir
fleis ankeren / das wir keinem bösen lust nachuolgen / vnd nicht dar-
nach thun / Darumb / auff das ihrs dester bass meyden könt / so
merckt wie ihr diese zwey gebot verstehn solt.

Das neundt gebot laut also / Du solt dich nicht lassen gelü-
sten / deines nechsten haufs. Nun solt ihr aber durch das wörtlein
Haufs / nicht allein das geben verstehn / darin die leut wonen / son-
der das gantze hauffhalten / vnd alles was darzu gehört. Dann
im alten Testament / bey den Juden / hat man die Stette vnd dörf-
fer nach den geschlechtern aus geteilt / vñ wer nicht des geschlechts
war / das da selbst hin gehöret / der könt kein haus am selben ort /
vberkommen / Darumb mag man wol durch das wörtlein haus /
auch das geschlecht verstehn. Vnd ist nun das die mainung / wañ
vnser nechster / eins guten geschlechts ist / hat grosse güter geerbet /
hat ein feins hauffhalten / hat sein burger recht / ehr vnd würde /
ein ehrlichs ampt / vnd alles das zum hauffsuater gehört / oder bey
einem hauffsuater gefunden wirdt / So sollen wir vns seines hauffs
nicht lassen gelüsten / das ist / wir sollen keins wegs begern / das er
daruon oder darumb kommen solt / auff das wir an sein stat kom-
men möchten. Dann das gebot maint aigentlich das gantz wesen /
hauffhalten / vnd den stand vnfers nechsten. Vnd ist so viel gesagt
las dich nicht gelüsten / das du gern sein woltest / was dein nech-
ster ist / oder in dem stand sein / darin dein nechster ist / Sonder
f las dir

Las dir dein stand gefallen / darein dich Gott gesetzt / vnd geordnet hat.

So merckts nun mit fleis / meine liebe kindlein / vnd haltets auch / last euch nicht gelüsten eines andern vnd höhern geschlechts dann ihr seit / last euch nicht gelüsten eins andern / vnd reichern haushaltens dann ihr habt / last euch auch nicht gelüsten / eins andern vnd höhern standts oder ampts / dann darzu ihr beruffen seit / Sonder las im ein yeder seinen standt / das ist / sein haus / oder haushalten gefallen / vnd diene Gott darin auff's aller fleissigst / so sein wir gehorsame kinder Gottes / vnd erfüllen seinen Göttlichen willen.

Auch solt ihr das sonderlich mercken / das diese zwey gebot / vns weren / das wir vnsern nechsten haus oder güter / nicht an vns ziehen sollen / wann wirs gleich mit gutem schein vnd fug / oder mit recht / vor der welt thun können / Sonder sollens ihm lassen / vnd darzu helfen / das ers mög behalten. Dann vnser Herr Gott spricht nicht / stil deinem nechsten sein haus nicht / oder raub ihm nicht / oder betrug in nicht darumb / dann das alles hat er vor im sibenden gebot verboten / Sonder spricht / las dichs nicht gelüsten Wann du nun grossen lust hast / in zuuerdringen / vnd dich an sein stat zu setzen / vnd siehest deshalben dester lieber das er vbel haushalt / leibest vnd borgest im dester mher / das er nachlessig / lieberrlich vnd arm werd / bis er zu letzt verkauffen mus / Wann du im alsdann gleich abkauffest / vnd redlich bezalst / so hastu dannoch gesündigt / Dann wir sollen vnsern nechsten lieben als vns selbst / vnd im alles guts gonnen als vns selbst. Nun wolten wir ja gern bey dem vnsern bleiben / vnd nicht durch armut in abnemen oder gar von heuslichen ehren kommen. Darumb sollen wir auch vnsern nechsten nicht nach seinem haus trachten / Sonder viel mher helfen vnd rhaten / das ers behalt / vnd in seinem ehrlichen gutem stand bleib.

Vnd das ist nun die meinung / vnd der recht verstand / dieses neunnden gebots / Das man Gott den Herrn vber alle ding sol fürchten vnd lieben / das wir vmb seinen willen / vnsern nechsten nicht mit list / nach seinem erbe / oder hause trachten / vnd nicht mit schein des rechtens an vns bringen / Sonder im das selbig zu behalten fürderlich vnd dienstlich sein.

Darumb meine liebe kindlein / merckts mit fleis / vnd wann man euch fraget.

Wie verstest du das neunnde gebot?

So solt ihr also antworten.

Wir sollen Gott den Herrn / vber alle ding fürchten vnd lieben.

ben / das wir vmb seinen willen / vnsern nechsten nicht mit list / nach seinem erbe / oder haufe trachten / vnnd nicht mit schein des rechtens an vns bringen / Sonder jm das selbig zu behalten furder lich vnd dienstlich sein.

Vnd eben auff diese weis / solt ihr meine liebe kindlein / das zehent vnd letst gebot auch verstehn / Dann dieweil wir yetzo in dem vorigen gebot gelernet haben / das wir vnsern nechsten / von seinem haushalten / oder stand vnd beruff zu vertringen nicht begern sollen. So möchten wir gedencken / es wer vns allein verboten / das wir seines gantzen haushaltens nicht begeren solten / Aber ein stuck darvon / als ein guten knecht / oder ein ochsen / möchten wir wol begern / vnd wege suchen / wie wirs zuwegen brechten. Auff das wir nun nicht also gedencken / So verbeut vns Gott der Herr das selbig auch / vnd spricht / Du solt dich nicht lassen gelusten / deines nechsten weibs / noch seines knechts / noch seiner magd / noch seines ochsen / noch seines esels / noch alles was dein nechster hat. Wir möchten sonst gedencken / Ey / wann ich schon das oder das meinem nechsten entwenden vnd abtringen möcht / es schadet jm nichts / er het dannoch genug / oder dergleichen. Das wil aber Gott der Herr nicht haben / sonder verbeut vns allen schlechts / wir sollen vns nichts vberal lassen gelusten / was vnser nechster hat. Dann er hats alles erschaffen / vnnd ist der recht Herr daruber / darumb gibt ers wem er wil. So ers nun deinem nechsten geben hat / so lass jms / vnd denck du also / wann Gott gewölt het / das ichs solt haben / oder / wann es mir nutz were / er het mirs auch wol geben.

Dann es ist doch auch kein nutz darbey / wann wir vns also lassen frembdes guts gelusten / vnd trachten jm nach / wie wirs möchten vberkommen. Dann wir richten aintweder nichts aus / sonder haben nur müß vnd arbeit / sorg vnd angst vmb sonst / vnd merckens dannoch die leut / vnd reden vns vbel / das wir dardurch veracht werden / vnd trawen vnd glauben verlieren. Oder aber / wann wirs schon vberkommen / so ist es gewisslich vnser schad / vnd were vns tausentmal nutz / wir hettens nie gesehen. Dañ was halffs ^{2. Reg. 11.} den David / das erurias weib vberkam? Gott straffet in dargegen / das er all seine weiber verlor. Dann sein aigner son Absalon / ^{2. Reg. 16.} beschlieff sie alle offentlich an der Sonnen / vnd vernolget darzu den David / seinen leiblichen vater / vnnd begeret in zu tödten. Was halffs den Achab / das er des Naboths weingarten vberkam? ^{3. Reg. 12.} Gott straffet in dargegen / das er darumb / im nechsten krieg erschossen wurd. Was halffs den Judas / das er die dreissig silbern groschen vberkam / da er Christum verriete? Gott straffet ihn dargegen / das er sich darnach selbs erhieng. Also geht es gewisslich noch heutigs tags / wann man lang nach frembdem gut trachtet /

f 9 so vber

So vberkompt mans ainweder nicht / oder vberkompt alles vn-
glück darzu.

Darumb meine liebe kindlein / nembts zu hertzen / vñ last euch
keins frembden guts gelüsten / keins frembden weibs / keins
knechts noch magd / keins ochsen / oder esels / noch alles was vn-
ser nechster hat / dann es ist sünd / vnd Gott lests nicht vngestraft /
das secht ihr auch wol. Dann diese sünd ist yetzo gantz gemain
bey vns / das ye eins des andern knecht vñnd magd begert / vñnd
wann yemand ein guten knecht / oder ein gute magd hat / so richten
die leut alles an / was sie nur erdencken können / biss mans im ab-
setzt / Aber es strafft vnd bezalet sich selber fein. Dann eben wie sie
andern leuten / ihr megd vnd knecht verführen / so that mans ihu
auch hinwieder / bis zu letzst megd vnd knecht so böß sein worden
das sie niemand genug belonen / niemand mit ihu auskommen /
noch sie zur not / im dienst behalten kan / Sonder klagt vnd schrei-
et yederman daruber / das ist nun ein rechte Gottes straff / der vns
weder glück noch heil / zu frembden megden vnd knechten gibt / die
wir vnserm nechsten wieder seinen willen entziehen.

Des gleichen geschicht auch mit andern gütern / Dann bring
stu deinen nechsten aus seinem hauss / oder zins / so wirstu frantz
drin / oder verdirbst sonst. Dringstu in von seinem garten oder acker
so erschlecht dir der hagel die frucht. Dringstu in von seinem vñhe /
so stirbt es dir / vnd ist allenthalben kein glück darbey / wo man
sich frembdes guts gelüsten lest / vnd strebt darnach.

Darumb meine liebe kindlein / merckts eben vñnd richtet euch
darnach / last yederman was sein ist / vnd gonnets im von hertzen /
diweil ims Gott hat geben. Ist es Gottes wil / er wirdt euch
auch wol on ander leut schaden versorgen / entziehet niemand sein
ehalten / oder sein gut / weder mit list / noch mit rechten / es sey
denn / des nechsten nutz oder guter will. Vnd wann ihr dienet / so
last euch auch nicht verführen / vñ abwendig machen / das ihr nach
lessig wert / oder zur vnrechten zeit aus dem dienst laufft / sonder
dietet trewlich / wie ihr schuldig seit / vnd kert euch nichts an die bö-
sen leut / die euch verführen vnd abwendig machen wollen / Dann
solche leut sein gewisslich des teuffels boten / durch die er euch gern
zu sünden / vnd in alles vnglück bringen wolt / daran solt ihr nicht
zweifeln. Gott ist der recht Herr vnd hausuater / der vns alle er-
schaffen hat / vnd erneret / der alles ordnet vnd anrichtet was ein
yeder thun sol / der wirdt einem yeden wol geben / was er bedarff /
wann wir im nur gehorsam sein / Vnd ist nicht von nöten / das wie
vnser nechsten güter begern / vnd im zu schaden mit listen darnach
streben / vnd sie zu vns reissen.

Vnd

Und das ist nun die meinung / vnd der recht verstand dieses zehenden gebots / Das man Gott den Herrn vber alle ding sol fürchten vnd lieben / das wir vmb seinen willen / vnserm nechsten / sein weib / gesind / oder vihe / nicht abspannen / abdringen / oder abwendig machen / Sonder bey den selben anhalten / das sie bleiben / vnd thun / was sie schuldig sein.

Darumb meine liebe kindlein / merckts mit fleis / vnd wann man euch fraget.

Wie verstest du das zehendt gebot?

So solt ihr also antworten.

Wir sollen Gott den Herrn / vber alle ding fürchten vnd lieben / das wir vmb seinen willen / vnserm nechsten / sein weib / gesind / oder vihe / nicht abspannen / abdringen / oder abwendig machen / Sonder bey den selben anhalten / das sie bleiben / vnd thun was sie schuldig sein.

f in Dom

Vom Glauben.

Gemainer anfang / zu allen predigen / so
lang man von dem glauben sagt.

Hebr. 11.
Mar. 16.

WEine liebe kindlein / Es spricht der heilig apostel Paulus / es sey vnmöglich / das man Gott gefal on den glauben. Dargegen spricht der Herr Christus im Euangelio / Wer glaubt vnd getaufft wirdt der wirdt selig werden. Nun hoff ich aber es sey niemand vnter vns / der nicht ein hertzliche begird hab / Gott dem VERN woll zugefallen / vnd die ewigen seligkeit zu erlangē. Darumb sollen wir mit allem fleis darzu thun das wir den heiligen Christlichen glauben erlernen / vnd empfangen / dieweil wir hören / das wir die seligkeit oder das ewig leben / dardurch vberkommen.

Rom. 3 Dann wie wol die heiligen zehen gebot / die wir vor gehört haben / ein seine hailfame Göttliche lehr sein / so können wir doch durch die selbigen nicht selig werden / darumb / das wirs aus eignen krefft / nicht können halten / vnd volbringen / Sonder wir erlernen allein darin / Was Gott von vns begert / vnd haben wil / vnd erkennen vnser sünd vnd schwachheit / das wir dasselbig nicht vermögen / Wie Paulus spricht / Aus dem gesetz kompt nur erkantnus der sünde / auff das wir auch Gottes zorn erkennen / den wir mit vnsern sünden verdient vnd erweckt haben. Vnd also Gott den Herrn fürchten / vnd gnad vnd barmhertzigkeit suchen / Solche forcht lernt man / in den zehen geboten / vnd ist ein anfang der weisheit.

1. Cor. 2. Aber der heilig Christlich glaub / ist viel ein edlere / vnd höhere lehr / dann er ist die recht vnd volkomene weisheit der Christen. Wie Paulus bezeugt / vnd spricht / Da wir von reden / das ist dannoch ein weisheit bey den volkomen / nicht ein weisheit dieser welt / auch nicht der obersten dieser welt welche vergehn / Sonder wir reden von der heimlichen verborgen weisheit Gottes / welche Got verordnet hat / vor dem anfang der welt / zu vnser herligkeit / dann durch den glauben / lernen wir Gott den Herrn erkennen / was er ist / vnd was er vns guts gethon hat / vnd noch thun wil / Vnd wann wir glauben / so werden wir Gottes kinder / vnd er gibt vns dann / den heiligen Geist / der hilfft vns die heiligen zehen gebot halten / die wir sonst nimmer mehr konten erfüllen.

Darumb

werden. Dann wer from wil sein / der sol die zehen gebot halten. Wer die gebot sol halten / der mus den heiligen Geist haben / Wer aber den heyligen Geist wil haben / der muss in durch den glauben empfangen / darumb macht vns der glaub from. Also auch wer selig wil werden / der muss Gott / vnd vnsern Herrn Ihesum Christum erkennen / Johan. 17 Wer aber Gott vnd seinen Christum erkennen wil / der muss in durch den glauben erkennen / Darumb macht vns der glaub selig / vnd gibt das ewig leben.

So lernet nun mit allem fleis / den heyligen Christlichen glauben / wie er auff's kurtzist begriffen ist / vnd spricht mir den selbigen sein gemach / vnd haimlich nach / auff das ihr in mercken / vnd da haim auch sein nachsagen kont.

Der heilig Christlich glaub.

Ich glaub in Gott / Vater almechtigen / Schöpffer himels vnd der erden. Vnd in Ihesum Christum seinen einigen Son vnsern Herrn / der empffangē ist von dem heiligen Geist / geboren aus Maria der jungfrauen / gelitten hat vnter Pontio Pilato / gecreutziget / gestorben / vnd begraben ist / Nider gefaren zur helle / am dritten tag wider auff erstanden von todten. Auffgefaren gen himel / sitze zur rechten handt Gottis / des allmechtigen Vaters / von dannen er zukunfftig ist / zu richten / die lebendigen / vnd die todten. Ich glaub in den heyligē Geist. Ein heylige Christliche kirchen / gemainschafft der heiligen. Vergebung der sünden. Auffstehung des fleisch. Vnd ein ewigs leben / Amen.

As ist nun meine liebe kindlein / der heilig Christlich Glaube / darin vns geoffenbart ist / was Gott der Herr sey / vnd was er vns guts gethon hat / vnd noch thun wil / auff das wir dasselbig festiglich glauben / vnd vns frölich darauff mögen verlassen.

Ihr solt aber allen fleis ankeren / das ir diesen heiligen Christlichen glauben / nicht allein sprechen kont / sonder auch / das ihr in sein

Die Erst Predig.

Von der erschaffung.

Will an meine liebe kindlein / auff das ihr ja den heiligen Christlichen glauben / recht vnd wol verstehn lernet / So solt jr zum aller ersten mercken / das Gott der Herr ein Geist ist / vnd nicht ein leiblich ding / das man in kont greiffen oder sehen. Vnd ist an allen orten gegenwertig / sicht vnd merckt / was wir thun / reden / vnd gedenccken / vnd wirdt doch mit keinem ort / oder stat / vmbfangen vnd abgemessen. Vnd ist ein solchs herrlichs hoches wesen / das es kein mensch erforschen vnd begreiffen kan / dan nur allein die Christen / den es der Herr Christus selbs geoffenbart hat / in der lere des glaubens.

Er hat vns aber geoffenbart / das Gott der Herr sey / Vater / Son / vnd heyliger Geist / das ist / das der Vater / vnd der Son / vnd der hailig Geist / ein einiger / warer / ewiger / Gott sey. Das solt jr kindlein mit fleis mercken / vnd ob es wol schwer ist / das ihrs yetzo nicht verstehn kont / so werdt ihr doch zu seiner zeit / mehr darvon hören vnd lernen / allein mercket yetzo das / der einig war / ewig Gott / ist Vater / Son / vnd heiliger Geist / vnd das haissen wir die heiligen dreifaltigkeit / darumb / das die drey / Vater / Son / vnd heiliger Geist / ein ainigs Götlichs wesen sein. Vnd es were ein grosse schand / wann ihr kindlein / das nicht lernet / vñ fleissig mercket / Dann ihr seit getaufft im namen des Vaters / vnd des Sons / vnd des heiligen Geists / das ihr Christen / vnd Gottes Kinder solt sein / vnd solt vergebung der sünden haben. Darumb solt ihr auch fleissig mercken vnd lernen / wie ihr getaufft seit / auff das ihr wißt / was ihr für ein Gott / vnd Vater im himel habt.

Das lehret euch nun der glaub fein / lauter vnd klar / Dann wir sprechen / Ich glaub in Gott / Vater almechtigen / Vnd bald darnach / Vnd in Ihesum Christum seinen eingebornen Son / Vnd zu letst / Ich glaub in den heiligen Geist. Das alles ist eben so viel gesagt / Ich glaub in Gott / der da ist / Vater / Son / vnd heyliger Geist. Solchs aber wissen die vnglaubigen nicht / könnens auch nicht verstehn. Aber bey den Christen ist es so offenbar / durch den glauben / das es auch die kindlein wissen können vnd sollen. Darumb sollen wir Gott darumb dancken vnd loben / das er vns das geoffenbart hat.

Vnd also sehet ihr meine liebe kindlein / das vns der glaub sein
leret / was doch Gott der Herr ist / nemlich Vater / Son / vnd hei-
liger Geist / wie ich im anfang gesagt hab / man lerne Gott im
glauben erkennen / was er sey.

Wir lernen aber auch sein darbey / was vns Gott der Herr
guts thon hat / vnd noch thun wil / das ist / wie er gegen vns ge-
sinnet ist / vnd darin steht vnser seligkeit. Dann wann wir gleich
wüsten / was Gott ist / wüsten aber nicht / ob er vnser freund / oder
vnser feind were / oder ob wir vns guts oder böses zu ihm versehen
solten / so wern wir vnseelig / vnd hülf vns nichts / das wir erkent
haben / was Gott sey. Darumb meine liebe kindlein / merckt mit
allem fleis darauff / das ihr lernet / was vns Gott guts gethon
hat / vnd noch thun wil / dann in dem erkantnus steht das ewig
leben.

Nun hat aber Gott der Herr dreierley werck / die er an vns vbet
vnd treibet / bis er vns selig macht / vnd zum ewigen leben bringt /
gleich wie er auch dreifaltig ist / nemlich / Vater / Son / vnd heiliger
Geist.

Dann zum ersten / so hat vns Gott der Vater erschaffen / leib
vnd seel / vnd auch die narung / vnd vns alle irdische creatur geben /
vnd vnterthenig gemacht

Zum andern / dieweil Adam gesündigt hat / vnd wir alle von
im in sünden geborn sein / So hat vns Gott der Son / nemlich
Christus vnser Herr / von der sünde wieder erlöset / das sie vns ver-
geben wirt.

Zum dritten / dieweil vns die sünd durch den glauben vergeben
ist / So kompt der heilig Geist / vnd heiligt vns / hüfft vns der sün-
den ab / vnd macht das wir from / heilig / vnd Gottes tempel
werden.

Vnd darumb ist das kurtzlich die mainung vnser glaubens /
Als sprechen wir / Ich glaub in Gott den Vater / der mich erschaf-
fen hat / Ich glaub in Gott den Son / der mich erlöset hat / Ich
glaub auch in Gott den heiligen Geist / der mich rein vnd heilig
ma-
chet. Es ist zwar nur ein Gott / vnd ein glaub / wie ihr yetzo
gehört habt / Aber in Gott sein drey person / nemlich / Vater / Son
vnd heiliger Geist. Darumb wollen wir die leer vom glauben
auch in drey tail tailen / Der erst sol sein / von der erschaffung /
Der ander / von der erlösung. Der drit / von der heiligung.

Nun

Nun wollen wir yetzo / das erste stuck / von der erschaffung / für vns nemen / vñ die auslegung hören / wie man es verstehn sol / das lautet also.

Ich glaub in Gott / vater almechtigen / schepffer himels vnd der erden.

Vnd in diesem ersten stuck / meine liebe kindlein / solt ihr mit fleis mercken / das wörtlein glauben / das ist als viel / als vertrauen / oder sich alles guts zu jm versehen. Vnd ist das die meinung / Wir sollen vnsern glauben vnd trauen / auff kein creatur stellen / sonder allein auff Gott / dann kein creatur kan vns wieder guts noch böses thun / es sey dann Gottis wil / wir selbs können vns auch nicht helffen. Darumb sollen wir vns allein zu Gott alles guten versehen / vnd in in glauben / in ihn vertrauen / vñnd alles guts von jm gewarten.

Vnd wer sich verlest / auff menschen gunst vñnd sterck / oder auff menschen kunst vnd weisheit / oder auff gut / gewalt / freundschaft / vnd was mehr der gleichen ist / der selbig glaubt nicht recht in Gott / vertrauet jm auch nicht recht / vñnd gewartet nicht alles guts von jm / sonder er verachtet in viel mehr / vnd helt das / darauff er sich verlest / für ein abgot / vñnd thut ein grosse grewliche sünd / darumb mus er auch gewisslich darob zu schanden werden / vnd erfarn / das jm die ding nicht helffen können / darauff er sich verlassen hat.

Aber Gott der Herr / der gibt vns alles das / das wir bedürfen / zu leib vnd seel / reichlich / vnd behütet / vñnd errettet vns vor allem dem / das vns mag schaden an leib vnd seel / das ist sein guter vñ genediger will gegen vns / den er vns ohn all vnser verdienst beweiset / Vnd darumb sollen wir in in glauben / vnd trauen / von jm alles guts gewarten / vñnd vns frölich auff sein göttliche güte verlassen in allen sachen / das gefelt Gott dem Herrn wol / vnd alle die es thun / die helt er für seine liebe kinder / vñnd erzeigt sich gegen in in allen dingen / wie ein freundtlicher Vater.

Darumb meine liebe kindlein / sollen wir vns nicht auff zeitliche vnd zergengliche ding verlassen / Sonder wir sollen in allen dingen / Gott dem Herrn vertrauen / so werden wir Gottis kinder sein / vnd das ewig leben erlangen.

Nun was ist es aber für ein Gott / in den wir glauben / vnd
trawen sollen? Es ist Gott der Vater / der Allmechtig ein Schöp-
ffer himels vnd der erden.

Vnd diese wort meine liebe kindlein / solt ihr mit allem fleis
mercken / vnd wol verstehn lernen / dann es ist eitel grosse wunder-
barliche vnd himelische weisheit darinnen.

Zum ersten / So leret vns der glaube / das Gott der Vater sey
allmechtig / das ist / das er vermög / vnd könn thun alles / was er
nur will / es ist im nichts vnmöglich. Vnd das ist der recht grund
vnd anfang / zum Christlichen glauben / das wir glauben / Gott
sey allmechtig / welchs viel lewt nicht glauben / die dennoch gute
Christen / vnd darzu hochgelert sein wöllen / wie man bey den
schwärmern wol spürt / die nicht glauben / das der leib Christi / im
Abendmal / warhafftig / allen den gebē werd / die das Abendmal
empfangen. Wiewol Christus klarlich spricht / Nemet vnd esset /
das ist mein leib / der für euch geben wirdt / das macht / das sie die-
ses stuck noch nie recht geglaubet haben / das Gott almechtig sey /
Sonder mainen / was sie mit irer vernunfft nicht können außrech-
nen / vnd begreiffen / das kon auch Gott nicht thun. Ihr aber
meine liebe kindlein / volget in nicht nach / sonder last sie sarn / vnd
hütet euch vor in. Glaubet ihr von hertzen / das Gott almechtig
sey / vnd kön thun / alles was er nur wil / vnd was er redet / so werd
ihr rhw vnd frid in ewern gewissen finden / dann das ist vns ye ein
grosser trost / das wir wissen / das Gott allmechtig ist / Dann dar-
aus eruolget / das wir allen andern worten Gottis glauben kön-
nen / wann sie gleich scheinen / als seyen sie vnmöglich. Daraus
volget auch / das wir Gott vertrauen in allen nöten / das er vns
daraus erretten könne / wann vns gleich bedünckt / es sey zu lang
geharret / Daraus volget auch / das wir vns in keinem glück also
vber heben / das wir Gott verachten / oder sein vergessen / Sonder
bleiben demütig / vnd bedencken das Gott allmechtig ist / vnd kan
vns wol straffen / vnd all vnfers glücks wieder berauben / wann
wir in erzürnen.

Darumb meine liebe kindlein / merckts mit fleis / vnd bildets
auffs tieffst in ewere hertzen / das Gott allmechtig ist / Niemand
ist so krank / er kan in gesund machen / Niemand ist so arm / er
kan ihn reich machen / Niemandt ist so ainfeltig / er kann ihn
weis

weis machen / Niemand ist so veracht / er kan in zu ehren machen /
Niemand ist so ein grosser sündler / er kan ihn from machen / Nie-
mand ist so vnglaubig / er kan ihn glaubig machen / nichts ist so
vnglaublich / er kan es thun / wann er wil / Darumb sol man im
allein vertrauen / dann alle ding stehn in seiner macht.

Zum andern / so ist er ein schöpffer himels vnnnd der erden /
das ist / er hat Dimel vnd Erden / vnnnd alles was darinn ist /
erschaffen. Das haist aber erschaffen / wann Gott der Herr / nur
ein wort spricht / vnd schafft / das etwas geschehen sol / das es als
bald geschehe. Dann Gott hat himel vnd erde nicht mit henden
oder mit arbeit gemacht / wie ein zimmerman / oder stainmetz / ein
haus macht / Sonder hat nur gesprochen / Es werd / da ist es
worden / Darumb haist er ein schöpffer / oder ein schaffer / dann
er hats nur mit einem wort geschafft / da ist es als bald worden
vnd da gestanden.

Also hat Gott der Herr auch den menschen erschaffen / hat im
leib vnd seel / vernunft vnd weisheit geben / vnd hat im die erde /
vnd alles was darauff ist vnterthenig gemacht / laub vnnnd gras /
vnd allerley frucht der bawm / visch vnd vogel vnd allerley wilde /
vnd zame thier / die müssen dem menschen alle dienen vnd vnter
worffen sein / das er sich daruon erhalten vnd erneren / klaiden vñ
zieren kan / Ja er hat auch Sonnen vnd Mon / vnd alle stern am
himmel / dem menschen zu dienst gemacht. Vnd das das aller tröst
lichst ist / Er hat es alles gemacht / eh denn er den menschen be-
schuff / auff das er vns darmit anzaiget / das er fleissig für vns sor-
ge / vnd betracht / was wir bedürffen / eh das wir geboren werden.

So sollen wir nun / meine liebe kindlein / getröst sein / vnd also
gedencken / hat Gott himel vnnnd erd gemacht / so ist er auch Herr
daruber / vnd mus alles in himel vnd erde ergehn / wie er wil. Vnd
hat ers alles vmb vnsern willen gemacht / so muss es vns auch al-
les dienen. Darumb sollen wir nicht sorgen / vmb vnser leben / Math. 6
was wir essen vnd trincken werden / auch nicht vmb vnser leib /
was wir anziehen werden / Sonder sollen ansehen die vögel vnter
dem himel / Dann sie seen nicht / vnd erndten nicht / vnd vnser him-
lischer Vater erneret sie dannoch. Des gleichen die blümlein
auff dem felde / die arbeiten nicht / vnnnd spinnen nicht / vnnnd vnser
himlischer vater zieret sie dannoch so schon / das auch Salomon /
in aller seiner herrligkeit nicht also beklaidet ist gewesen. Thut er nun
das den vögeln / vnd blümlein / so wirt ers vns viel mehr thun / die
G iij weil

weil wir besser sein dann sie / vnd Gott sie auch vmb vnsern willen erschaffen hat. Darumb sollen wir Gott dem Vater der vnns erschaffen / vnd das leben geben hat / von hertzen vertrauen / er werde vns vnser leben wol behüten / vnd darzu geben / was wir bedörffen. Dann ist er der schöpffer / so mus die gantz welt thun was er wil / vnd wann nicht genug vorhanden wer / kan er teglich noch mehr erschaffen / wie er dann auch thut.

Also lernen wir in diesem stuck / das Gott der Herr / himel vnd erden / vnd alles was darin ist / vmb vnsern willen / vnnd vns zu gut erschaffen hat / vnd wil vns erhalten vnd erneren / Darumb sol sich kein mensch vermessen / das er durch sein eigene weisheit / vnnd geschicklichkeit / sein eigen leben mög erhalten / oder sein narung gewinnen / Sonder er sol Gott dem Vater darumb vertrauen / der wil vns erhalten / vnd erneren / so lang es sein Göttlicher wil / vnd vnser nutz ist / dargegen sollen wir arbeiten / vnnd thun ein yedlicher / das / darzu er beruffen ist / Dann Gott wil es also haben / das wir nicht sollen müßig gehn / sonder arbeiten / vnd in lassen sorgen / wie er vns die narung geben vnd ersproßen wöl.

Vnd das ist nun / meine liebe kindlein / der einfeltig vnd recht verstand / des ersten stuckes vnser glaubens / von der erschaffung / wann wir sprechen / Ich glaub in Gott / Vater allmechtigen / schöpffer himels vnd der erden / das ist / Ich glaub das mich Gott geschaffen hat / sampt allen creaturen / mir leib vnd seel / augen / oren / vnd alle glider / vernunfft / vnd alle syn gegeben hat / vnd noch erhelt. Darzu klaider / vnd schuch / essen vnd trincken / haus vnd hoff / weib vnd kind / acker / vñbe / vnd alle güter / mit aller notturfft / vnd narung dis leibs vnd lebens reichlich / vnd teglich versorgt / wieder alle ferligkeit beschirmt / vnd vor allem ybel behüt vnd bewart / Vnnd das alles aus lauter Göttlicher güte vnnd barmhertzigkeit / ohn all mein verdienst vnd würdigkeit / Des alles ich im zu dancken / zu loben / vnd dafür zu dienen / vnd im gehorsam zu sein schuldig bin / das ist gewislich war.

Darumb meine liebe kindlein merckts mit fleis / vnd wan man euch fraget.

Was ist die mainung / des ersten stuckes im glauben?

So solt ihr also antworten.

Ich glaub das mich Gott geschaffen hat / sampt allen creaturen / mir leib vnd seel / augen / oren / vnd alle glider / vernunfft /
vnd

vnd alle sinn gegeben hat / vnnnd noch erhelt. Darzu kleider / vnnnd
schuch / essen vnd trincken / haus vnd hoff / weib vnd kind / acker /
vibe / vnd alle güter / mit aller notturfft / vnd narung dis leibs vnd
lebens reichlich vnd teglich versorgt / wieder alle ferligkeit beschir-
met / vnd vor allem vbel behüt vnd bewaret / Vnd das alles aus
lauter göttlicher güte vnd barmhertzigkeit / ohn all mein verdienst
vnd würdigkeit / Des alles ich im zu dancken / zu loben / vnnnd dar-
für zu dienen / vnd im gehorsam zu sein schuldig bin / das ist gewis
lich war.

S iij

Dieser nachuolgender gemainer
beschlus / sol zu ende aller pre-
dig / vom glauben gelesen wer-
den.

Also habt jr meine liebe kindlein / den rechten gemainen ainfeltigen verstand / dieses ersten stuckts / des heiligen Christlichen glaubens / den sollt ihr mit allem fleis mercken / vnd Gott dem **WELCHEN** von hertzen glauben vnd vertrauen. Vnd dieweil der glaub / ein werck Gottis ist / das er durch sein wort vnd Gaist in vns würcken mus / also / das wir on geschickte Prediger / zum glauben nicht mögen komen / so sollt ihr Gottis wort gern vnd fleissig hören / bis er euch dardurch zum glauben bewegt. Vnd darnach sollt ihr ihn auch ernstlich bitten / das er euch den rechten glauben erhalten vnd mehren wöll / Dann wer da glaubt / der wirdt Gottis kind / vnd erbet das ewig leben. Wann wir aber Gottis kinder sein / so gibt er vns seinen heiligen Gaist / der selbig geust dann die rechten Göttlichen lieb in vnser hertzen / das wir Gott vnd vnseren nechsten / von hertzen lieben / vnd also die gebot Gottis erfüllen. Das alles widerfert vns durch den glauben / Darumb wer darin verhart bis ans ende / der wirdt selig / Das verleibe vns Gott allen / Amen.

Die ander Predig.

Von der erlösung.

DA Vn habt ihr am nechsten gehört / das erst haubtstück des glaubens / von der erschöpf-
fung / darin wir Gott den Vater / vnnnd alle seine
wolthat / erlernen haben / Nemlich / das er vns er-
schaffen / leib / seel / vnd vernunfft hat geben / dar-
zu mit narung reichlich versorget / vnd behüt vnnnd beschutzet vns
vor allem vbel / vnnnd erhelte vns nach seinem Göttlichen willen.
Darumb volget nun hernach das ander haubtstück / von der erlö-
sung / darin wir Gott den Son / das ist / Ihesum Christum vnsern
Herrn / vnd seine wolthat lernen erkennen / das lautet also.

Vnd in Ihesum Christum seinen einigen son
vnsern Herrn / der empfangen ist von dem heiligen
Geist / geborn aus Maria der juncckfrawen / gelit-
ten hat vnter Pontio Pilato / gecreutziget gestorben
vnd begraben. Ist wider gefarn zur helle / am drit-
ten tag wider auffgestanden von den todten / auff-
gefahren gen himel / sitzt zur rechten hand Got-
tis / des allmechtigen Vaters / von dannen er
kunnftig ist zu richten die lebendigen vnd die todten.

Vnd in disem andern haubtstück / meine liebe kindlein / lernen
wir die ander person in der Gottheit / das ist Gottis son / Ihesum
Christum vnsern herrn / vnd alle seine güter vnd wolthat erkennen /
auff das wir wissen / was wir vber die vorigen zeitlichen güter / von
Gott haben / dardurch wir zum ewigen leben kommen.

Ihr solt aber mit allem fleis mercken / meine liebe kindlein / wie
vbel es vmb vns ist gestanden / dieweil wir der hilff vnnnd wolthat
Christi / so nötig bedorfft haben / Dann wann er vns nicht erlöst
het / so hetten wir alle müssen verdampt sein / vnd nach dem tod in
die Helle faren / vnd ewiglich darin bleiben. Vnd ist das die vr-
sach / da Gott der Herr Adam vnd Eva het erschaffen / vnd in das
Paradis gesetzt / da thet er gegen ihn als ein gnediger Gott / vnnnd
freundlicher Vater / machet in alle lebendige thier / visch vnnnd vö-
gel vnterthenig / vnd gab in alle fruchtbare baum / zu essen / er wan-
net sie auch trewlich vor ihrem schaden / vnd verderben / Nemlich
das sie nicht essen solten von dem baum / des wissens guts vnnnd
böses

böses/dann sie wurden sonst des tods sterben. Darumb solten sie jm/ als ein gnedigen Gott vnd getrewen Vater / von hertzen glaubt vnd vertrawet/ vnd in lieb gehabt haben/ sie solten jm auch gehorsam gewest sein/ vnd gern geuolget/ vnd sein gebot gehalten haben/ das sie nicht von dem verbotenen baum gessen hetten.

Da aber der böse feind der Satan kam/ vnnnd redet durch die schlangen mit der Lúa / vnnnd sprach/ Es wer nicht war / das sie sterben wurden/ wann sie von dem verbotenen baum essen/ Sonder sie wurden weis vnd Flug werden/ wie götter/ vnd guts vnd böses wissen/ vnd bildet ihr mit solchen falschen worten ein / als gonnet in vnser lieber Herr Gott dasselbig nicht/ Da glaubet sie der schlangen/ vbertrat Gottis gebot/ vnd als von dem verbotenen baum/ vnd gab dem Adam auch daruon zu essen.

Nun mercket mit fleis meine liebe kindlein/ was für grosser vn-
aussprechlicher schad aus dem allen eruolget ist. Dann da Adam
vnd Lúa / durch die schlangen verführt vnnnd betrogen warn / da
glaubeten vnd vertraweten sie Gott dem Herrn nimmer/ Sonder
gedachten er wer in heimlich feind/ vnnnd gonnet in nicht / das sie
guts vnd böses solten wissen. Es war jm aber in der warheit nicht
also/ sonder die schlang het sie durch ihre falsche listige wort also
betrogen. Darumb fiengen sie an/ vnd setzten all ihren vertrawen
auff sich selbst/ vnd gedachten sie selbst musten sich versehen / vnd
ihr bestes bedencken/ vnser Herr Gott wurd in nicht mehr helfen/
das war aber auch nicht recht. Darnach da sie Gott nicht ver-
traweten/ da konten sie in auch nimmer lieb haben/ Sonder fieng-
en an/ vnd hetten sich selbst lieb / dann sie gedachten / sie hetten
kein bessern freund/ im himel vnd auff erden mehr/ dann sich selbst
das war aber auch falsch/ vnd weit von der warheit. Als bald sie
nun/ auff sich selbst vertraweten/ vnd sich selbst lieb hetten/ da er-
uolget vnd entstand als bald in in die forcht/ vnd die begierd / dass
sie forchten sich vor allem dem/ das dem leib/ vnd dem leben weh
thut/ vnd begerten/ vnd liessen sich gelüsten / alles des / das dem
leib vnd leben wol thut.

Da sehet ihr nun/ meine liebe kindlein/ grosser mangel vnd ge-
brechen vier/ darein Adam vnd Lúa durch der schlangen lüg/ der
sie glaubt haben / Kommen sein / gleich als ein grosse tödliche
Kranckheit/ Nemlich/ sie trawen Gott nicht/ sie lieben Gott nicht/
sie stecken voller forcht/ vnd stecken voller bösen begird/ Vnd das
ist nun die sünd / daraus alle böse werck entspringen / das merckt
mit fleis.

Also sein Adam vnd Lúa in die sünd gefallen/ vnd sündler wor-
den/ vnnnd eben wie sie sein / also sein auch ihre kinder / die von
ihm

in geborn werden. Nun sein wir aber alle mit einander von Adam vnd Eva geborn / darumb sein wir auch alle sündler / vnd geht eben zu / als wann vater vnd mutter das podagra haben / so gewinns die kinder auch / wann vater vñ mutter aufsetzig sein / so werden die kinder auch aufsetzig / weil sie noch in mutter leib sein. Also auch die weil Adam vnd Eva / Gott nicht traweten / do vertraweten im ihre kinder auch nicht / vnd da sie Gott den Herrn nicht lieb hetten / da hetten in ire kinder auch nicht lieb / vñ da sie sich forchten / da forchten sich ire kinder auch / vnd da sie gelustet / da gelustet ihre kinder auch / Vnd sein also alle menschen auff erden sündler / auch weil sie noch in mutter leib sein / dann sie trawen Gott nicht / lieben Gott nicht / förchten sich / vnd lassen sich gelüsten / wie ihr meine liebe kindlein vor sein gehört / vnd gelernet habt / im neunnden vñnd zehenden gebot. Darumb sein wir alle von natur kinder des zorns / wie Paulus spricht. Das ist / Gott zürnt mit vns / von dieser *Eph. 2. 26* sünd wegen / dann wir sein alle aus sündlichem samen gezeuget / vnd vnserer mütter haben vns in sünden empfangen / wie David psal. *51* klagt. Vnd darumb müsten wir alle verdampft sein / wann vns Christus nicht het erlöset.

So last vns nun / meine liebe kindlein / mit allem fleis / auff dieses ander haubtstück des glaubens merckē / auff das wir ja wol lernen / vnd begreiffen / was Christus sey / vnd wie er vns hab erlöset.

Vnd merckzt zum ersten / was Christus sey / dann er ist der einig oder eingeborn son Gottis / Gott selbst von Gott dem Vater geborn von ewigkeit / dann er ist Gottis wort vñnd weisheit / dadurch Gott der Vater alles erschaffen hat / Vnd wiewol euch kindlein das noch zu hoch vnd zuschwer ist / so wert ihr doch mit der zeit / sein lernen vnd begreiffen / Allein merckzt yetzo / das Christus Gottis son / vnd selbst warer Gott ist / von Gott dem Vater / von ewigkeit geborn.

Auch ist er / ein warer mensch / nemlich der eingeborn Son / der hochgelobten vnd rainen jungfraw Maria / empfangen von dem heiligen Geist / das kan man nun nicht kürtzer / vnd leichter sagen / dann also / Christus vnser lieber Herr / ist warer Gott / vnd warer mensch.

Zum andern / So mercket auch sein / wie vns Christus erlöset hat / dann es ist also zugangen / Was vns Gott geboten hat zu thun / das wir nicht vermochten / darumb / das wir sündler sein / das hat Christus alles für vns gethon. Vnd was wir mit vnsern sünden verschuldet hetten / das wirs solten leiden / vñnd kontens doch nicht ertragen / dann wir hetten darunter müssen verzweifeln vñ verderben / das hat Christus alles für vns gelitten vñ getragen.

Da

Da kont ihr nun fein erkennen / meine liebe kindlein / warumb
Christus hat sollen vnd müssen / warer Gott / vnd warer mensch
sein / vnd von einer jungfrawen geborn werden. Dann solt Chri-
stus für vnser sünd genug thun / vñ vns erlösen / so tauget es nicht /
das er ein sündler were. Dann wann er ein sündler gewest wer / wie
wir / so het er jm selbst auch nicht helffen können / sonder es het jm
ein ander müssen helffen / gleich als wol als vns / Dann was er ge-
thon vnd gelitten het / das het er für sein eigne sünd müssen thun /
vnd leiden / vnd wer dannoch nicht genug gewest / Darumb het er
für kein andern / nichts wieder thun noch leiden können. Nun habt
ihr vor gehört / das wir alle sündler sein von der geburt her / dieweil
vnser vater vnd mutter auch sündler sein. Darumb dorfft Christus
nicht geborn werden / wie wir / Sonder must aus einer rainen
junctfrawen geborn werden / von dem heiligen Gaist / auff das
er ein heylige raine geburt het / die in nicht zu einem sündler machet /
wie vns vnser geburt zu sündern machet / auff das vns / vnser vn-
raine sündliche geburt / durch sein heilige / vnd raine geburt / ver-
geben / vnd auch gerainigt wurd. Darumb sprechen wir im glau-
ben also / Ich glaub in Ihesum Christum seinen einigen son / vn-
sern Herrn / der empfangen ist vom heiligen gaist / geborn aus
Maria der junckfrawen etc.

So nun Christus kein sündler ist / so kan er für die sündler genug
thun / vnd die sündler erlösen. So er aber für vns sol thun / alles das
das wir zu thun schuldig warn / so muss er ein rechter mensch sein /
er kont sonst nicht thun / was ein mensch zu thun schuldig wer. Sol-
ers aber recht thun / also das er darin nichts sündige / sonder das es
Gott dem vater gantz vnd gar wol gefal / so mus er auch warer
Gott sein / dann niemand kan Gottes willen volkomenlich erfüllen
dann Gott selbst / Darumb mus er Gott vnd mensch sein.

Weiter / Solt er für vns leiden / was wir verschuldet hetten /
so must er ein warer mensch sein / er hett sonst nicht können leiden /
was wir sündige menschen verschuldet hetten / dan wir hetten ver-
schuldet / das wir solten sterben / vnd in die helle faren / Darumb
must Christus ein warer mensch sein / vnd für vns sterben / vnd
in die helle faren. Solt ers aber auch vberwinden / vnd sein ein
end machen / so must er warer Gott sein / das was er nicht warer
Got wer gewest / so het er nicht wider aus der helle mögen komen /
er het auch nicht vom tod wider können aufferstehen / Darumb
must er in alweg warer Gott vnd warer Mensch sein. Vnd das ist /
das wir im glauben sprechen / Der gelitten hat vnter Pontio Pila-
to / gecreuziget / gestorben / vñ begraben / ist nider gefarn zur Hel-
le / am dritten tag wider aufferstand von todten etc.

Also höret jr meine liebe kindlein / das vnser lieber Herr Ihe-
sus

Jesus Christus warer Gott / vnd warer mensch ist / vnnnd ist nicht in sünden geboren wie wir / sonder er ist vom heiligen gaist empfangen vnnnd von der rainen juncckfraw Maria geboren / vnnnd hat als ein mensch / den tod für vns gelitten / vnd ist in die helle für vns gefarn aber als ein warer Gott / ist er wieder aus der helle gangen / vnnnd vom tod wieder auffgestanden / Vnd hat also vnser sünd gebüßt vñ bezalt / oder genug dafür gethon. Darumb wann wir in Christum glauben vnd vertrauen / das dem gewisslich also sey / so zürnet Gott nicht mehr mit vns vmb vnser sünden willen / sonder vergibt vns die sünd vmb Christus leiden vnd sterben willen / vnd gibt vns sein heiligen gaist / durch des hilff wir der sünd widerstand thun vnnnd ledig werden. Das alles hat der heilig Paulus / zum Römern am. iij. capitel / auff's aller kürzist angezaigt / da er spricht / Christus ist vmb vnser sünde willen dahin geben / vnd vmb vnser gerechtigkeit willen wieder auffgestanden. Dann dieweil Christus kein sündler gewesen ist / vnd dennoch wie ein sündler gelitten hat / vnd gestorben ist / so merckt man wol das er vnser sünd auff sich genommen / vnd für vns gelitten / vnd den zorn Gottes / den wir verdient hetten / für vns getragen hat. Des gleichen dieweil er in der hell / vnd im tod nicht bleibt / sonder durch die herrlichkeit des Vaters / vom tod wieder auffsteht / so merckt man wol / das der zorn ein end hat / vnd vns die sünd vergeben ist / darumb sein wir durch den glauben gerecht. Dann Gott der Herr rechnet vns die gerechtigkeit Christi zu / aber die sünd rechnet er vns nicht mehr zu. Darumb meine liebe kindlein / merckt diese wort des heiligen Pauli mit fleis / da er spricht / Christus ist vmb vnser sünd willen dahin geben / vnd vmb vnser gerechtigkeit willen / wider auffgestanden. Dann wann einander für vns leidet / bezalt / oder gnug thut / vnd darüber ledig gelassen wirt / so ist's gewis / das wir auch ledig sein / wann wir aber ledig sein / so sein wir gerechtfertigt / Also / das vns niemand vmb die selben säch weiter ansprechen / oder anklagen darff. Darumb so Christus vom tod wieder erstanden ist / so sein wir ledig / vnd los / vnd von sünden gerechtfertigt.

So nun Christus vnser lieber Herr / also für die sünd genug hat gethon / vnd den tod vnnnd die hell vberwunden / So feret er gehn himel / vnd Gott der Vater setzt in zu seiner gerechten / vnnnd machet in zu einem Herren vber alles / darumb ist er nun auch vnser Herr / Vnd ihr kindlein / solt diese wort mit sonderm fleis merken / das der Herr Ihesus Christus / vnser aller Herr ist / Darumb sprechen wir auch im glauben / vnd in Ihesum Christum sein einigen son (vnsern Herrn) Dann wann er vns nicht erlöset het / so hetten wir müssen in die hell farn. Nun er vns aber erlöset hat / so sein wir sein aigen / vnd er ist vnser Herr / vnd wir sollen in lieben vnd im gehorsam sein.

Vnd das ist meine liebe kindlein / vnser höchster trost / das
b Christus

Christus vnser Herr ist / vnd wir sein algen / dann darumb wirdt er vns beschützen / vnd erretten / also / das / wann wir schon sündet sein / so wirdt er vns doch die sünd vergeben / dann er hat genug für die sünd gethon / vnnnd wann wir schon sterben / so wirt er vns doch wieder lebendig machen / dann er hat den tod vberwunden / vnd wann wir schon in die helle kömen / so könt sie vns doch nicht halten / dann er hat die helle zerprochen / Darumb weil wir ein solchen mechtigen Herrn haben / so hat es kein not vmb vns.

Wir sollen aber vnserm Herrn gehorsam sein / vnd thun was er vns beuilhet / dann darumb hat er vns erlöset / das wir from / vnd heylig sollen werden / wie ihr hernach hören werdt / vnnnd wer das nicht thut / der wirt gewisslich hart gestrafft werden. Dann vnser Herr Christus wird wider kommen / zu richten die lebendigen vnd die todten. Darumb solt jr meine liebe kindlein / fleis anerkennen / auff das wann Christus widerkompt zum gericht / das er euch / als fromme vnd gehorsame kinder finde / so werdt ihr das ewig leben / von ihm haben.

Auff diese weis hat vns Christus erlöset / meine liebe kindlein / von der sünde darein Adam vnd Lva gefallen sein / vnnnd vns alle mit ihn zu sündern gemacht haben. Dann Christus der Herr hat vns durch sein leiden vnd sterben erworben / vnd durch die predig des Euangelions geben / das wir Gott dem Herrn wider glauben / vnd ihm vertrauen / Vnd wann wir ihm glauben / so gibt er vns den heiligen Geist / das wir ihn auch mögen lieben / vnd der heilig Geist reinigt vns vnser hertz / von allerley bösen begirden / das wir also mögen from werden / Gottis gebott halten / vnd vnserm Herrn Ihesu Christo dienen.

Darumb solt ihr nun / meine liebe kindlein / von hertzen glauben vnd vertrauen / in Ihesum Christum den einigen Son Gottis / vnsern lieben Herrn / vnd gar nicht zweifeln / er hat für vns gethon / was wir thun solten / vnd kontens nicht / er hat auch für vns gelitten / was wir verschuldet hetten / Vnd hat vns also vergebung der sünd erworben / vnd mit Gott dem Vater versonet / das er vns für seine kinder helt / vnnnd wann wir in diesem glauben bleiben / mit Christo das ewig leben wil geben.

Vnd das ist die meinung / vnd der recht einfeltig verstand / dieses andern haubtstücks / des heiligen Christlichen Glaubens / das ich glaub / das Ihesus Christus warhafftiger Gott / vom
Vater

Vater geborn / vnd auch warhafftiger mensch / von der jungfraw
Maria geborn / sey mein Herr / der mich verlornen vnd verdamp-
ten menschen erlöset hat / von allen sünden / vom tod / vnd gewalt
des Teuffels / mit seinem heiligen tewren Blut / vnd mit seinem vn-
schuldigen leiden / Auff das ich sein aigen sey / vnd in seinem Reich
vnter ihm lebe / vnd ihm diene in ewiger gerechtigkeit / vnschuld
vnd seligkeit / gleich wie er ist auffstanden vom tod / lebt vnd re-
girt in ewigkeit / das ist gewis war.

Darumb meine liebe kindlein / merckts mit fleis / vnd wann
man euch fraget.

Wie verstehstu das ander haubtstück des Glaubens?

So solt ihr also antworten.

Ich glaub das Ihesus Christus warhafftiger Gott / vom
Vater geborn / vnd auch warhafftiger mensch / von der jungfraw
Maria geborn / sey mein Herr / der mich verlornen vnd verdamp-
ten menschen erlöset hat von allen sünden / vom tod / vnd gewalt
des Teuffels / mit seinem heiligen tewren Blut / vnd mit seinem vn-
schuldigen leiden / Auff das ich sein aigen sey / vnd in seinem Reich
vnter ihm lebe / vnd ihm diene in ewiger gerechtigkeit / vnschuld
vnd seligkeit / gleich wie er ist auffstanden vom tod / lebt vnd re-
girt in ewigkeit / das ist gewis war.

Oder wann euch diese wort zu schwer sein / so sprecht / Ich
glaub das Ihesus Christus sey vmb vnser sünd willen dahin ge-
ben / vnd vmb vnser gerechtigkeit willen wider auffstanden.

b ij Die

Die dritt Predig.

Von der heiligung.

In habt ihr am negsten gehört / das ander haubtstück des glaubens / von der erlösung / darin wir Gott den Son Ihesum Christum vnsern Herrn / vnd all seine wolthat erlernen haben / Nemlich das er vmb vnsern willen ist mensch worden / vnd hat vnser sund / todt / vnd hell / auff sich genomen / in seinem leiden vnd sterben / als ein warer Mensch / vnd hats auch vberwunden / vnd abgetilgt / in seiner aufferstehung / als ein warer Gott / darumb sitzt er zu der gerechten Gottis / vnd ist vnser Herr / vnd wir sind sein aigen.

Nun folget hernach / das dritt Haubtstück / von der heiligung / darin wir Gott den heiligen Gaist / vnd seine wolthat lernen erkennen / Das lautet also.

Ich glaub in den heiligen Gaist / ein heilige Christliche Kirchen / gemeinschaft der Heiligen / Vergebung der sünden / Aufferstehung des flaisches / vnd ein ewigs leben / Amen.

Ind in diesem dritten Haubtstück / meine liebe kindlein / lernen wir / die dritten Person in der Gottheit / das ist / den heiligen Gaist / vnd alle seine güter / vnd wolthat erkennen / auff das wir wissen / was wir nach der erlösung / von Gott empfangen / dardurch wir zum ewigen leben / das Christus erworben hat / tiglich wern.

Dann wiewol vns Christus / vnser lieber Herr / von der sund / todt / vnd hell erlöset / vnd mit Gott wider versonet hat / so wüsten wir doch nichts darumb / hetten auch kein trost / noch fried / in vnserem gewissen darvon / wann man vns nichts darvon predigt / Sonder blieben also fur vnd fur / mit bösem gewissen in der furcht des todtis / vnd allerley bösen begirden / wie sie vns angeborn sein / darumb weren wir auch nicht tiglich / zum Reich Gottis / vnd zum ewigen leben / wann wir also blieben / wie wir geboren sein. Dann sollen wir Gottis Reich / das vns Christus erworben hat / ererben vnd einnemen / so müssen wir new geboren / vnd heilig werden / wie Gottis Kindern zugehört / dasselbig aber muss der heilig Gaist in vns würcken / vnd volbringen.

Dann

Dann darumb wirdt er / der heilig Gaist genennet / das er alles heilig macht / was heilig ist / oder heilig wirdt / Vnd wann der heilig Gaist nicht in einem menschen ist / so kan vnd mag er nicht heilig sein / er thu gleich was er wolle. Darumb nennet ihn auch der heilig Paulus ein Gaist / der da heiliget oder heilig machet. Roma. 8.

So mercket nun mit allem fleis / meine liebe kindlein / das wir alle durch den heiligen Gaist / müssen geheiligt werden / vnd können kein heiligkeit / durch vnser eigene krefft vnd werck erlangen / Sonder wir müssen Gott / dem heiligen Gaist / darumb glauben vnd vertrauen / das er vns heilig machen werd / wahr / vnd wie er wolle / allein / das wir ihm gehorsam vnd gefolig seyen / vnd im nicht widerstreben / Darumb sprechen wir / Ich glaub in den heiligen Gaist.

Es ist aber not meine liebe kindlein / das wir auch ein wenig darvon wissen / wie es zu gebe / wann vns der heilig Gaist wil heilig machen / auff das wir vns dester bas dazu schicken / vnd im stat geben / das er sein werck in vns mög ausrichten. Darumb vernembt es mit fleis / vnd merckts eben / dann es gehet also zu.

Da vnser lieber Herr Ihesus Christus / durch sein leiden / sterben / vnd aufferhebung vns erlöset / vnd vmb Gott erworben hat / das er vns vnser sund vergeben / vnd vns wider fur seine liebe kinder annemen wil / da hat er bald darnach / am heiligen Pfingstag / den heiligen Gaist von Himel herab geschickt auff alle seine Apostel / in der gestalt der fiewring zungen / der hat ihn verstand vnd weisheit geben / darzu auch krafft vnd macht / das sie das heilig Euangelion / das ist / eben den glauben / da wir yetzo von reden / rechtgeschaffen vnd vnerschrocken / predigten / Vnd wo sie nicht hin komen möchten / oder in die leng nicht bleiben könnten / da haben sie andere frome verstendige leut zu predigen verordnet / vnd ihnen den heiligen Gaist / durch aufflegung der hend mitgetailt / welcher gebrauch vnd ordnung ist in der Christenheit blieben bis auff diesen tag / vnd mus auch furan bleiben / bis zum ende der Welt. Vnd wirdt also das heilig Euangelion / oder der Christlich glaub / in der gantzen Christenheit gepredigt / nicht aus menschlichem furwitz / sonder aus Göttlichem befehl / vnd aus anregung vnd mitwürckung des heiligen Gaists. Dann die Prediger könnten / on mitwürckung des heiligen Gaists / nichts ausrichten. So könnten die Zuhörer der Predig auch nicht vertrauen / wann sie nicht ihren vrsprung vnd anfang von Gott aus dem Himel hetten. Darumb spricht Paulus / Wie können sie glauben on ein Prediger / wie können sie aber predigen / wann sie nicht gesandt werden? Roma. 10.

Joha. 1.

Wernun die predig / oder die lere vom glauben an Christum annimpt / der kan Gottis kind werden / wie Johannes der Euangelist bezeugt / vnd spricht / Wiewiel in aber auffgenommen haben den hat er macht geben / Gottis kinder zu werden / die da an seinen namen glauben. Wann wir aber glauben / vnd getaufft werden / so sein wir new geboren vnd Gottis kinder. Dann die tauff ist ein bad der wiedergeburt / wie ihr hernach klerer hören werd.

Gal. 4.

Als bald wir aber Gottis kinder worden sein / so gibt vns Gott den heyligen gaist in vnser hertzen / wie Paulus bezeugt zun Galatern / vnd spricht / Darumb das jr Gottis kinder seit / so sendet Gott seinen gaist in ewere hertzen / der da schreyet / vater / vater. Wann wir aber den heyligen gaist haben / so gibt er vns ein rechte göttliche lieb in vnser hertzen / wie Paulus zun Römern sagt / Die liebe Gottis ist in vnser hertzen aufgossen durch den heiligen gaist der vns ist geben. Wo aber Göttliche lieb ist / da helt vnd erfüllet man Gottis gebott / Darzu so streitet der heilig gaist wieder das fleisch / vnd seine böse begird / vnd hilfft vns die selben vberwinden / das wir in nicht volgen / sonder from vnd heilig seien.

Also richtet der heilig gaist zum ersten die predig an / darnach durch die predig den glauben vnd die tauff / vnnnd durch glauben vnd Tauff die neuen geburt. Wann wir dann new geboren vnd Gottis kinder sein / so wonet der heilig Gaist selbs in vns / vnd heiliget vns / das wir Gottis Tempel sein / mehret vnd stercket vns den glauben / das wir Gott für ein rechten Vater halten / versichere das hertz / das vns die sund durch Christum vergebē sey / gibet vns Göttliche lieb / darmit wir alle gebot Gottis erfüllen / vnnnd hylffe vns die sund vnnnd böse begird vberwinden / Ja er tödtet sie auch durch das creutz / vnd leiden / vnnnd das alles treibt er für vnd für / bis der glaub vnd die lieb vollkommen werden / vnd die sund vnnnd böse begirde / mit dem flaisch gar absterben. Als dann / so sein wir recht rein / vnd heilig / ledig von aller sund vnd bosheit / vnd mögen das reich Gottis erben / als die rechten vnd lieben kinder Gottis.

Wie ihr nun vor gehört habt / meine liebe kindlein / das wir glauben / vnd trawen sollen / in Gott den Vater / der vns erschaffen hat / Vnd in Gott den Son / der vns erlöset hat. Also solt ihr hie auch lernen glauben vnd trawen in den heiligen Gaist / der vns alle geheiliget hat / vnnnd weiter heilig machen wirt / alle die / so dem Euangelio glauben. Dann wer an Ihesum Christum glaubet / das er der Herr sey / dem wirdt der heilig Gaist gegeben / das
er in

er in heylig mache / Wie Paulus bezeuget vnd spricht / Niemand
kan Ihesum ein Herren haissen / ohn durch den heiligen Gaist.

Also habt ihr / meine liebe kindlein / ein kurtz anzaigen / wie
wir durch den heyligen Gaist geheyligt werden / das solt ihr nicht
allein fleissig mercken / Sonder auch Gott den Herrn ernstlich dar
umb bitten / das er euch also wöl heylig machen / vnnnd solt euch
selbst auch mit ernst darzu schicken / Dann wer Gottis wort fleis-
sig hört / lernt / vnd festiglich glaubt / der erlangt solche heyliga-
keit / wie ihr gehört habt.

Was weiter hernach volget in dem Glauben / das ist ein kur-
tze erklerung alles des / das ir ytz gehöret habt / vnd darff nicht vil
auslegung / dann es ist gut zuuerstehn / wan man weis / wie es mit
der heyligung zu geht. Dann dieweil wir gelernet haben / das
wir in Gott glauben vnd vertrauen sollen / so volgen nun auch die
fürnehmsten hauptstück / darumb wir im vertrauen / vnnnd kains
wegs daran zweiffeln sollen.

Zum ersten sollen wir glauben vnnnd trauen / das das heilig
Euangelion / oder der glaub / nicht vergeblich gepredigt werd /
sonder es finden sich alweg etlich leut darzu / die es glauben / vnnnd
dardurch selig werden / wieder Herr durch den propheten Esaiam Esa. 55.
spricht / Mein wort sol nicht leer wider zu mir kommen / sonder es
sol ausrichten alles das / darzu ich es ausschick. Vnd die selben
leut / die dem Euangelio glauben / haissen ein Christlich kirche /
das ist / ein Christlich volck oder samlung / oder gemain / das ist das
wortlein (Kirche) haist nicht ein staines hauss / oder ein tempel /
sonder es haist die versamlung der leut / die zu samen kommen / von
predigens vnnnd betennis wegen / Das solt ihr kindlein fleissig
mercken.

Diese Christliche kirch / oder gemain / ist ein gemeinschafft der
heyligen / das ist / sie sein alle heylig / oder ein heylige gemain. Vnd
alle gaisliche güter / die zur heyligung gehörn / die hat die Christ-
liche kirche von irem herrn Ihesu Christo / vñ sein gemaine güter /
dann ein yeder Christ hat tail dran / einer als wol vnnnd als viel als
der ander.

Das sein aber die güter / die die Christen mit einander inn ge-
main haben. Zum ersten / das Gott der Vater / vnser aller gne-
diger Vater ist / Gott der Son vnser aller erlöser / Herr vnd bruder
Got der heylig gaist vnser aller heyligmacher. Darnach das Euan-
gelion / vñ alle Christliche ler. Darnach die tauff / vñ der leib / vñ dz
b iij blut

blut Christi/durch welche wir aller güter Christi teilhaftig werden/ Vnd zu letzt/das gebet/ vnd das heilig creutz. Das heilig creutz aber/ haist ein leiden/das nütz vnd gut ist / vnd fürdert vns zum ewigen leben / vnd solchs leiden findet man allein / bey den Christen/ Der vnglaubigen leiden aber / ist ein schedlich creutz/ dann es fürdert sie nur zu der ewigen verdammus.

Das sol man nun darumb wissen/das man erken/das aufferhalb der heyligen Christlichen Kirchen /dieser güter kains ist/vnd das man festiglich glaub/das diese güter alle in der heiligen Christlichen Kirchen gefunden werden/vnd wann sie vns diese güter zu sagt/so sollen wir nicht zweifeln/ wir haben sie schon empfangen/ Vnd wann sie vns ein ambt darüber befilhet/sollen wir auch nicht zweifeln/Gott bestettigt dasselb/vnd der heilig Geist steht vns darinnen bey/ vnd hylfft vns/das wirs nützlich ausrichten.

Zum andern / Sollen wir glauben / vergebung der sünden/ Dann wo ein Christliche gemain ist/so hat sie vergebung der sünde/vnd aufferhalb der Christlichen gemain / wirdt niemand kein sünd vergeben/Darumb sollen wir vergebung der sünd / bey der Christlichen gemain/durch die entpindung suchen/vnnd festiglich glauben/wem die Christlich gemain / vergebung der sünde/durch ire diener lest zu sagen / der hat sie gewis / wie ihr hernach von schlüsseln weiter hören werdt.

Zum dritten / Sollen wir auch glauben / die auferstehung des flaischs/oder des leibs/ dann wir sehen / das wir alle dahin sterben/vnd niemand dem tod vorstehn kan / das geschicht aber darumb/auff das die sünd / die noch inn vnserm flaisch steckt/ durch den tod ein end neme / Wie Paulus zun Römern am sechsten cap. sagt/Dann wann wir im glauben sterben/so vergeht vns zorn/neid/hass/vnkeuscheit/geitz/hoffart / vnd alle böse begird/darnach wird vns Gott am jüngsten tag alle also wider lebendig machen/Das solche sünd vnd gebrechen / nicht mehr an vns sein werden/Sonder wir werden rein/gaistlich vnd vnsterblich/ia aller ding Christo selbs gleich werden. Vnd auff das wir dester gewisser glauben/so ist Christus selbs auch vom tod wider auferstanden/darzu nicht er allein / sonder viel heiliger Leut mit ihm/wie das/das Luangelion Matthei / vnd der Prophet Daniel anzeigen.

Matt. 27.
Dani. 12.

Zum vierdten / Sollen wir auch glauben / ein ewigs leben/dann wann wir vom tod wider auferstehn /so werden wir ewig

wigklich mit Christo leben / in gerechtigkeit / vnschuld / vnd seligkeit. Vnd zu diesem allem sollen wir sagen / Amen / Das ist als viel gesagt / als ja / es ist gewislich vnd warlich also.

Darumb solt ihr nun von hertzen glauben vnd trawen / in den heiligen Gaist / der vns vergebung der sünde / durch seine ordentliche Prediger verkündigt / vnd vnser hertzen / dieselben zu glauben bewegt / darnach vns weiter / durch den glauben / in der heiligen Christlichen Kirchen / heiligt / die sünd in vns vberwindet vnd aus tilgt / vnd vom tod wider aufferwecken wirdt / zum ewigen leben / Vnd solt nicht zweifeln / er wirts alles thun vnd ausrichten / wie er angefangen hat / wann wir nur gehorsam sein / vñ im glauben verharren bis ans ende / Dann wer verharret bis ans end / der wirdt selig.

Vnd das ist die mainung / vnd der recht einfeltig verstand / dieses dritten haubtstucks / von der heyligung / Das ich glaub / das ich nicht aus aigner vernunft noch krafft / an Ihesum Christum meinen Herrn glauben / oder zu ihm kommen kan / Sonder der heilig Gaist hat mich durchs Euangelion beruffen / mit seinen gaben erleuchtet / in rechtem glauben geheiligt / vnd erhalten / Gleich wie er die gantze Christenheit auff erden berufft / sammelt / erleucht / heiligt / vnd bey Christo erhalt in rechtem einigen glauben / In welcher Christenheit er mir / vnd allen glaubigen / teglich / alle sund reichlich vergibt / vnd am jüngsten tag mich vnd alle todten aufferwecken wirdt / vnd mir sampt allen glaubigen / in Christo / ein ewigs leben geben / Das ist gewislich war.

Darumb meine liebe kindlein / merckts mit fleis / vnd wann man euch fragt.

Wie verstehstu das dritt haubtstück des glaubens?

So solt ihr also antworten.

Ich glaub das ich nicht aus aigner vernunft / noch krafft / an Ihesum Christum meinen Herrn glauben / oder zu ihm kommen kan / Sonder der heilig Gaist / hat mich durchs Euangelion beruffen / mit seinen gaben erleuchtet / in rechtem glauben geheiligt / vnd erhalten / Gleich wie er die gantze Christenheit auff erden / berufft / sammelt / erleucht / heiligt / vnd bey Christo erhalt in rechtem einigen glauben / In welcher Christenheit er mir / vnd allen glaubigen / teglich alle sund reichlich vergibt / vnd am jüngsten tag / mich vnd alle todten aufferwecken wirdt / vnd mir sampt allen glaubigen / in Christo / ein ewigs leben geben / Das ist gewislich war.

Vom Gebett.

Gemainer anfang zu allen predigen/
so lang man vom Vater vnser predigt.

Mar. 11.
Johan 13.

WEine liebe kindlein / es spricht vnser lieber Herr Christus im Euangelio / Alles was ihr bittet im gebet / so ihr glaubet / so werd ihrs empfangen. Vnd abermals / Was ihr bittet den Vater in meinem namen / das wil ich thun.

Nun habt ihr bissher fein gehört / in den zehen geboten / was wir sollen thun / vnd das darbey / das wirs nicht thun können / es geb vns dann Gott seinen heiligen Geist / der es in vns würck. Ihr habt auch gehört / das vns Gott den heiligen Geist nicht gibt / wir glauben dann / vnd habt fein gelernet / was wir sollen glauben / vnd das darbey / das wirs nicht glauben können / es thu vns dann Gott vnser hertzen auff / vnd gebe vns den glauben / dann der glaub ist ein werck Gottis in vns.

Matt. 7.

Darumb ist auch hoch von nöten / dieweil wir wissen / was wir thun vnd glauben sollen / das wir nun Gott den Herrn / mit allem fleis darumb bitten. Dann er spricht / Bittet / so wirdt er euch geben / Klopffet an / so wirdt euch auffgethon. Wann wir aber bitten wollen / so müssen wir in seinem namen bitten / sollen wir anderst erhört werden / Dann er hat vns zu gesagt / was wir in seinem namen bitten das woll er thun / Vnd was wir nicht in seinem namen bitten / das wirt er wol lassen. Das haist aber in seinem namen bitten / wann wir nach seinem willen bitten / das ist / wann wir bitten / das / das er vns hat haissen bitten / Also das wir vor Got möchten also sprechen / Lieber Gott / ich bitt dich rumb das / oder das / vnd thu es nicht von mir selbst / sonder dein lieber Son Ihesus Christus / vnser Herr / der hat michs gehaissen / vnd ich thu es aus seynem befehl / vnd in seinem namen / Darumb erhörstu mich / so erhörstu auch deinen lieben Son / Ihesum Christum / vnsern Herrn / Erhörestu mich aber nicht / so erhörestu auch Christum nicht der mich her geschickt / vñ solchs hat haissen bitten

Von einem solchen gebet spricht Johannes in seiner Epistel / Das ist die fraidigkeit / die wir haben zu ihm / das / so wir etwas bitten nach seinem willen / so höret er vns / Vnd so wir wissen / das er vns höret / so wissen wir / das wir die bit haben / die wir von ihm gepeten haben.

Darzu sollen wir auch glauben / das vnser gepet erhört werde / dann wer nicht glaubt / der erlangt nichts. Darumb spricht er So ihr glaubet / so werdt ihrs empfangen.

Auff

Auff das wir nun möchten glauben / das vnser gebet erhört werde / So hat er vns zu gesagt / er wöls thun / was wir in seinem namen bitten / Vnd auff das wir auch wüsten / das wir nach seinem willen bitten / so hat er vns selbst gelet / wiewir betten sollen.

Wir sein auch schuldig zu betten / wie ihr / meine liebe kindlein / im andern gebot habt gehört / Darumb lernet mit fleis das heylig gebet / das vns Christus vnser lieber Herr selbst gelet hat. Vnd sprecht mir dasselbig fein gemacht vnd haimlich nach / das irs mercken / vnd da haim auch fein nach sagen könt.

Vnser lieber Herr Christus sprach zu seinen Jungern / Wann ihr beten wolt / so solt ihr also sprechen.

Vater vnser / der du bist im himel / Geheyligt werd dein name / Zufom dein reich / Dein will geschech als im himel auch auff erden / Vnser teglich brot gib vns heut / vnnnd vergib vns vnser schulden als wir vergeben vnsern schuldigern / Vñ füre vns nicht in versuchung / Sonder erlöß vns vom öbel / Amen.

Das ist nun meine liebe kindlein / das aller best gebet / darin vns Christus vnser lieber Herr hat lernen bitten / vmb alles das / das vns in den zehen gebotten beuolen / vnd im glauben zu gesagt ist worden.

Ihr solt aber allen fleis ankeren / das ihr dieses heiliges gebet nicht allein sprechen könt / Sonder auch das ihrs fein versteht / wie es vnser lieber Herr Christus gemaint hat. Vnd wann man euch darumb fraget / das ihr könt antwort geben / vnnnd zu seiner zeit / ewere kindlein auch also leren / wie man yetzo euch leret / Dass es ist ein grosse schand / vor Gott vnnnd der welt / wann sich ein mensch für ein Christen dargibt / vnd waiß was er glauben vnnnd thun sol / waiß aber doch nicht / wie er Gott bitten sol / das er ihm gebe / was er im hat zu gesagt / Oder wann ers gleich wol waiß / vnd wils dannoch aus lauter faulkeit vnd verachtung nicht thun / So doch ein yeder Christ schuldig ist / Gott in allen nöten vnd anligen anzuruffen / vnd im zu dancken / vnnnd sein namen zu preysen.

Was biß hieher geschrieben / sol zu einer yeden predig / vor her gelesen werden / so lang man vom Vater vnser predigt.

Die Erst Predig.

Auslegung der ersten bitte.

Will an mein liebe kindlein / auff das
ihr ja / dieses heiliges gebet / recht vnd wol ver-
stehn lernet / so solt ihr zum aller ersten mercken /
das wir arme sander nicht anheben / oder den
ersten grund legen / zu vnser seligkeit / Sonder
vnser lieber Herr Gott / der hebt an / vns durch
die predig zu fordern / vnd gerecht zu machen / Dann er schickt
vns fromme vnd recht geschaffene prediger / die vns das heilig
Euangelion / ohn vnser zu thun predigen / vnd lest vns anzeigen /
was wir vns guts zu im versehen sollen / vnd thut vns darzu vnse-
re hertzen auff / vnd gibt vns / das wir dem Euangelio glauben
können / Wie Christus spricht / Ihr habt mich nicht aufferwelt /
sonder ich hab euch aufferwelt / Wann er vns nun also zum glau-
ben berufft / vnd vns den glauben geben hat / das wir an in glau-
ben / in für vnsern Gott halten / vnd keinen andern Gott neben im
haben / wie das erst gebot lautet / Alsdann so sollen wir / auch dar
zu thun / vnd Gott ernstlich bitten / das er wöll furt farn / vnd vns
weiter helffen / vnd geben / das wir mögen thun / alles das er vns
hat geboten / vnd glauben alles das er vns hat zugesagt. Dann
wer nicht glaubet / des selben gebet gilt nichts. Darumb mus
Gott anfahen / vnd vns zum glauben beruffen / vnd den glauben
in vnser hertz geben / sonst wurden wir nimmer mehr nichts bitten.
Vnd darumb bitten wir nicht also / Lieber Gott gib mir / das ich
glaub / das du vnser Vater seiest / Sonder also / Vater vnser der du
bist im himel / etc. Das ist so viel gesagt / Lieber Gott / du hast
mir vorhin / ohn mein zu thun / prediger geschickt / vnd mir lassen
sagen / du seyest mein Vater / durch Christum vnsern Herrn / vnd
hast mir mein hertz auffgethon / das ichs auch glaub / du seyest
mein Vater / Darumb bitt ich dich / lieber Vater / der du bist im hi-
mel / gib genad / das dein name geheiligt werd.

Vnd wer das noch nicht glaubete / der solt es doch aus diesem
gebet lernen / Dann Christus vnser lieber Herr / wais ja den wil-
len seines himelischen vaters wol / Nemlich das er vnser lieber Va-
ter sein wil / er het vns sonst nicht geleret / das wir in Vater nennen
solten. Darumb solt ihr meine liebe kindlein / ein grosse zuver-
sicht / zu vnserm lieben Herr Gott im himel haben / dann er ist vn-
ser aller Vater.

Nun

Nun sehet ihr wol/ wie lieb ein yeder vater/ hie nieden auff er-
den/ seine kindlein hat/ dann die veter ziehen ihre kindlein mit allem
fleis/ erneren sie/ vnd klaiden sie / arbeiten vmb ihren willen / le-
ren sie/ bestellen ihn zuchtmaister vnd lernaister / ersparn in auch
güter/ vnd sorgen für sie. Vnd wann die kindlein vnrecht thun/
das man sie straffen mus/ so haben sie die kindlein dannoch lieb/
vnd ist in laid für sie/ das sie vnrecht gethon haben. Vnd wann
sich die kindlein nur bessern / vnd es nimmer thun/ so frewen sich
die veter/ vnd ist in schon alles vergeben vnd vergessen/ Also auch/
vnd noch viel mer thut vnser lieber Herr Gott im himel / der wil
vnser aller Vater sein/ wil vns erneren vnd bewaren/ wil vns leren
vnd vnterweyssen/ das wir selig werden. Vnd wann wir schon
gesündigt/ vnd vnrecht gethon haben/ so wil er vns dasselbig vmb
Christus willen gern verzeihen/ vnd wann er vns schon strafft/
so straffet er vns doch nicht ewiglich / sonder nur zeitlich / zur
züchtigung/ allein darumb / das wirs nur nimmer thun sollen.

Darumb meine liebe kindlein/ solt ihr euch von hertzen frewen
vnd Gott den Herren wiederumb lieb haben / die weil er vnser al-
ler Vater ist/ vnd vns so viel guts thut / vnd solt das Vater vnser
gern betten / dann wann ihr betet / so redet ihr mit ewerm Vater
im himel/ vnd er erhörets / vnd thut euch alles guts/ vnd gibt
euch/ was ihr bittet. Darumb solt ihr oft vnd fleissig betten/
sonderlich / wann ihr auffsteht / wann ihr in die kirchen geht/
wann ihressen wolt/ vnd wann ihr euch niderlegt / auff das ihr
is gewonet/ das ihr gern vnd oft bettet / Dann durch das gebet/
erlangen vnd holen wir / alles / was vns Christus erworben/ vnd
Gott der Vater zugesagt hatt.

Auch solt ihr mit fleis mercken / meine liebe kindlein / das wir
sprechen/ Vater vnser der du bist im himel/ zu einem vnterscheid/
das wir nicht vnser veter mainen hie auff erden/ Dann auff erden
haben wir auch veter / die sein menschen wie wir / vnd können vns
nicht selig machen. Aber im himel haben wir ein andern rechten
gaistlichen vnd ewigen Vater / der kan vns in allerley not helffen/
vnd darzu selig machen. Vnd gleich wie die kindlein / ihr fleisch
vnd blut / von ihrem leiblichen Vater haben/ vnd sehen im gemai-
niglich gleich / Also sollen wir auch den Gaist / von vnserm himel-
lichen Vater haben/ vnd ihm nach dem gaist gleich sein / das ist/
wir sollen glauben was er redet / vnd thun was er gebeut/ vnd las-
sen was er verbeut/ vnd sollen aller ding gesynnet sein / nach seinem
heyligen Göttlichen wort/ als dann / so ist er recht vnser Vater/
vnd wir seine liebe kindlein / vnd wie er im himel ist/ so werden wir
auch im himel kommen / vnd ewiglich bey ihm bleyben / Das al-
les leret vns / vnser lieber Herr Ihesus Christus / in dem / das er
vns also leret betten/ Vater vnser der du bist im himel.

Nun volgen hernach in diesem heyligen gebet / sieben vnterschiedliche bitt / darin alles begriffen / vnd gebetten wird / was vns Gott in den zehen gebotten hat beuolhen / vnd im glauben zugesagt / Die solt ihr meine liebe kindlein / mit allem fleis lernen / vnd mercken / auff das ihr wisst / was ihr bittet / Die ersten drey bitt / treffen die zehen gebot an / vnd die andern vier bitt / treffen den glauben an / wie ihr dann hernach sein hören wert.

Die erst bitt / trifft an das ander gebot / nemlich / Du solt den namen des Herrn deines Gottis nicht vergeblich fürs / Vnd lautet also.

Geheiligt werd dein name.

Vnd das ist / meine liebe kindlein / das ich vor gesagt habe / das wir vmb das erst gebot nicht bitten / dann vnser lieber Herr Gott kompt vns zuvor / mit der predig / vnd mit seinem Geist / berufft vns zum glauben / vnd gibt vns / das wir in für vnsern Gott / vnd Vater erkennen / ehe dann wir im nach trachten / oder nach suchen.

Dieweil er vns dann zum glauben beruffen / vnd durch die tauff / in die heiligen Christenheit bracht hat / sollen wir nicht still stehn / sonder weiter trachten / vnd also beten. Lieber Vater im himel / dieweil du vns dein heilig Euangelion hast geschickt / vnd lassen predigen / dardurch wir sein glaubig worden / vnd dich für vnsern Gott erkent / vnd dir als einem Vater vertrauet haben / vnd also etlicher mafs / das erst gebot halten können / So las nicht ab / hör nicht auff / sonder hylff vns weiter / das wir auch das ander gebot mögen halten / nemlich / Das dein name geheiligt werd. Solchs gebet gefelt dann Gott wol / vnd wird erhört / vnd gibt vns Gott krafft / vnd macht / das wir sein namen mögen heyligen.

Das haist aber den namen Gottis heiligen / wann man in für heilig helt / vnd also darmit vmb geht / wie man mit einem heiligen ding vmb sol gehn / das ist / wann man sich aus rechter Gottis forcht vnd lieb enihelt / das man ihn nicht vnnutzlich nennet / oder füret / sonder bekennet / lobet / vnd preysset in / rufft in an in aller not / vnd dancket ihm / dann Gottis name ist an ihm selbst heilig vnd bleibt heilig. Aber wir verunheiligen seinen heiligen götlichen namen / mit vnserm mißbrauch / wann wir ihn zu vnheiligen dingen gebrauchen / als da ist / wann man vnrecht von Gott redet /

bet/leret/vnd predigt/ oder abgötterey treibet / Oder wann man bey seinem namen vnnützlich oder falsch schweret/ oder wann man dem menschen/ oder anderen creaturen/ mit Gottis namen fluchet / Oder wann man lecherliche/ vnnnd spötlich geschwetz von Gott/ vnd götlichen dingen treibet/ Oder wann man Gottis namen / zu zauberey vñ andern aberglaubischen sachen braucht/ Oder wann man nicht nach seinem wort lebet/ sonder verachtet in/ vnd macht das in ander leut auch verachten / wie ihr dann im andern gebot habt gehört.

Nun ist es aber ye ein erschrecklich vnd elend wesen / meine liebe kindlein/ das wir Christen sollen sein/ vnnnd wissen / das Gott vnser Herr vnd Vater ist/ vnd sein dannoch so böß/schwach/vnd vnartig/das wir seinen namen nicht heyligen/oder ehrlich halten.

Darumb ist es warlich hoch von nöten/das wir Gott trewlich vnd ernstlich bitten/ das er vns helffe/ das wir seinen götlichen namen/ nicht verunheiligen/ sonder heyligen/ vnnnd helfen fürdern/ das er auch von andern leuten geheyligt werd/ Das geschicht aber wann man Gottes wort recht predigt / vnnnd leret/ vnnnd wir recht Christlich vnnnd wol darnach leben / das ist/ wann wir sein wort glauben vnd bekennen/ seine gebot halten/ in in aller not anruffen vnd vmb alle wolthat / lob vnd danck sagen.

Dann wann man vnrecht leret / so wirdt Gottis namen dadurch verunheyligt/ dann man lobet vnd preysset die falschen lehr/ als sey sie Gottis wort/ vnd heylig/ so sie doch des teuffels lüg ist/ vnd vnheilig. Wie könt man aber Gottis namen schendlicher verunheiligen/ dann wann man ihn/ an des teuffels lügen hencket vnd schmückt sie darmit / das die lewt bester schedlicher verfürd werden.

Des gleichen/ wann man die rechten lehr / verlestert vnd veruolgt/ so wirt Gottis namen auch verunheyligt/ vnd verschmecht / Dann wann man sie irthumb vnd ketzerey schilt / so volget / das Gott auch ein ketzer sein müß / der vns die ler geben hat / das ist aber ja ein grewliche schmach vnd schand seinem götlichen namen.

Also auch/ wann wir Gottis wort nicht glauben / so verunheiligen wir sein namen / vnnnd schmechen in/ als sey er nicht warhaftig.

Vnd wann wir sein wort nicht frey / vor aller Welt bekennen /
so verschmehen vnd verunheiligen wir seinen namen auch / Dann
wer sein wort verlangnet / oder widerrufft / der thut eben / als wer
er / vnd sein heiligs wort / nicht gutt gnug oder würdig / das man
vor den hohen / vnd gewaltigen diser welt / daruon solt reden /
oder etwas darumb leiden.

Auch wann wir Gott vnsern vater nennen / wie ers dann ist /
vnd wir seine kinder sein wollen / vnd leben doch nicht als Gottis
kinder / so ist es dem namen Gottis auch ein schmach / vnd wirdt
dardurch verunheiligt / Gleich wie es ein vater ein schand ist /
wann er vngezogene böse kinder hat. Daruon spricht Gott durch
Eze. 36. ein Propheten / Mein nam wirdt vmb ewern willen verlestert / vn-
ter den Laiden.

Also ist es auch mit dem anruffen / vnd dancken / Dann wer
Gott nicht anrufft / oder ihm nicht danckt / der veracht vnd ver-
schmecht in / als sey er nicht der recht ware Gott / der vns in allen
nöten geholffen hab / vnd noch helffen könn / vnd wöll / Dann
wer bekent / das er im geholffen hab / der sol ihm billich dancken /
Vnd wer da glaubt / das er ihm weiter helffen könn / vnd wöll /
der sol ihn billich anruffen.

Darumb wer nicht recht glaubt / oder nicht recht lehret / oder
Gottis wort nicht in aller gefahr frey bekennet / oder nicht nach
Gottis wort lebet / Gott nicht anrufft in allerley nöten / vnd ihm
nicht danckt vmb allerley wolthat / der verachtet vnd verunhey-
ligt den namen Gottis / vnd gibt vrsach vnd ergernus / das er bey
andern leuten auch veracht vñ verunheiligt wirdt / das ist aber ein
grosse grewliche sund / Darumb sollen wir Gott fleissig bitten /
das er vns daruor behüte.

Vnd das ist nun die meinung / vnd der ainfeltig vnd recht
verstand / dieser ersten bitt / Nemlich / Gottis name ist zwar an ihm
selbst heilig / aber wir bitten in diesem gebet / das er bey vns auch
heilig werde. Das geschicht dann / wo das wort Gottis lau-
ter vnd rein gelert wirdt / vnd wir auch heilig / als die kinder Got-
tis darnach leben / des hilff vns lieber vater im himel / Wer aber
anderst leret / vnd lebet / dann Gottis wort leret / der entheiliget
vnter vns den namen Gottis / da behüt vns vor himelischer vater.

Darumb meine liebe kindlein merckts mit fleis / vnd wann
man euch fraget.

Wie

Wie verstest du die erste bitt?

So solt ihr also antworten.

Gottis name ist zwar an jm selbst heilig/ Aber wir bitten in diesem gebet/ das er bey vns auch geheiligt werde. Vnd wann man euch weiter fraget.

Wie geschicht das?

So solt ihr also antworten.

Wo das wort Gottis lauter vnd rein gelert wirdt/ vnd wir auch heilig/ als die kinder Gottis darnach leben/ des hilff vns lieber Vater im himel. Wer aber anderst leret/ vnd lebet/ dann Gottis wort leret/ der entheiliget vnter vns den namen Gottis / da behüt vns vor himlischer Vater.

Gemainer beschluss zu allen predigen/ so lang man vom Vater vnsrer predigt.

Also habt ihr meine liebe kindlein / den rechten gemainen ainfeltigen verstandt / dieser **(ersten/ andern/ oder dritten/ etc.)** bitt / den solt ihr mit allem fleis mercken / Vnd Gott den Herrn ohn vnterlas also bitten / vnd nicht zweiffeln / er wirts erhören / vnd euch geben / das ihr seine fromme / vnd heilige leut wert / wie Gottis kindern / die ihren Vater im himel haben / wol ansteht. Dann er hat vns zu gesagt / Was wir bitten in seinem namen / vnd glauben / das wöll er vns geben. Nun bitten wir ja in seinem namen / wann wir das Vater vnsrer beten / dann er hat vns also gelert vnd gehaissen / so sollen wir auch von hertzen glauben / Gott werd vns erhören / dieweil er vnsrer Vater ist. Dann wann wir glauben / so werden wir gewisslich erhört / vnd werden durch vnsrer gebet erlangen / das wir empfaben was wir glauben / vnd thun / was er vns geboten hat / Das verleich vns Gott allen / Amen.

Mat. 26

I iij Die ans

Die ander Predig.

Auslegung der andern bitte.

In habt ihr am nechsten gehört / die ersten bitte / vnd wie wir in der selbigen bitten / das vns Gott wöll geben / das wir das ander gebot halten / nemlich / Das wir seinen namen nicht vergeblich führen / sonder das er vnter vns geheiligt werde. Darumb volget yetz hernach die ander bitte / darin wir bitten / das vns Gott wöll geben / das wir auch das dritte gebot halten / das ist / das wir den Sabbath / oder den feiertag heyligen / Das geschieht / wann wir nicht allein vnser arbeit lassen stehn / sonder auch vnser böse begird / vnd eigen willen hinlegen / Gottis wort hören / vnd dem selbigen von gantzem hertzen volgen / das können wir aber ohn sondere gnad vnd hylff Gottis nicht thun / Darumb sollen wir fleissig vnnnd ernstlich darumb bitten / wie vns Christus vnser Herr / inn der andern bitt gelehrt hat / Die lautet also.

Zu komme dein reich.

Rom. 14.

Auff das ihr aber diese bitt recht vnd wol versteht / meine liebe kindlein / so merckt mit fleis / was Gottis reich sey / darumb wir bitten. Dann das reich Gottis / ist / wie Paulus zun Römern sagt / Gerechtigkeit / frid / vnd freud / im heyligen Gaißt.

Vnd wiewol diese wort etwas schwer sein / so mögt ihr sie doch wol lernen verstehn / meine liebe kindlein / wann ihr mit fleis darauß merckt. Dann ihr wißt wol / das ein yeder König / oder Kaiser / ein eigens reich hat / vnnnd die leut / die die selbigen König vnd Kaiser für ihr herren erkennen / vnd halten / vnnnd ihm gehorsam sein / die gehören in ihr reich / vnd sein vnter ihrem reich / vnd ist also das eins Königs reich / wann er schafft / vnd gebent / vnd also regirt / das seine vnterthanen nicht thun was sie wöllten / sonder was in ihr herr gebent.

Also hat auch Gott der Herr ein himelisch reich / vnnnd alle die an in glauben / vnnnd seine gepot halten / die gehören in dasselbig reich. Vnd wann Gott anfahet / sie zum glauben zuberuffen / durch das Euangelion / so kompt Gottis reich zu in / das ist / Gott fahet an / vnd wirt ihr Herr vnd König / vnnnd regiert sie / das sie nicht

nicht mehr thun/was sie gut dunckt/sonder was sie Gott der Herr
der ihr König ist/durch sein wort vnterweyset / vnd leret.

Vnnd die weltliche Herrn / die regiren zwar mit gewalt / mit
troen / vnd mit straffen / vnd zwingen die leut / das sie in müssen ge-
horsam sein / thun auch recht daran / dann Gott hats also geor-
dent. Aber Gott der Herr thut im dannoch nicht also / in seinem
himelischen reich / sonder regirt allein mit der predig des heyligen
Euangelions / vnd mit dem heyligen Saist. Das geht also zu.

Gott der Herr lest vns das heylig Euangelion predigen / wie
Christus für vns gelitten hab / gestorben vnd wieder auffgestanden
sey / wie ihr dann im glauben vor hin gelernet habt / vnd thut vns
darzu die hertzen auff / vnd gibt vns den glauben / das wir dem
Euangelio glauben können. Vnd wann wir glauben / so gibt er
vns seinen heyligen Saist / der regiert vns / vnnd führt vns zu allen
guten tugenden / vnd wercken.

Dann zum ersten / werden wir durch den glauben gerecht vor
Gott / dann der glaub macht vns teilhafftig aller gerechtigkeit
Christi / vnd gibt vns die selben zu eigen. Vnd wer das durch ein
rechten glauben fast / dem wirt der heilig Saist geben / der selb
bringt dann / die götliche lieb in vnser hertzen / die erfüllt dann alle
gebot / Darumb wer recht glaubt / der ist gerecht vnnd from vor
Gott / durch die gerechtigkeit Christi / die im geschenckt vnd zu ge-
rechnet ist. Wie Paulus spricht / Wir halten das der mensch ge-
recht werd / allein durch den glauben. Er ist auch gerecht vor Rom. 7.
der welt / von wegen der liebe / vnnd ihrer frucht / die der heilig
Saist in sein hertz geust / vnd in im würckt.

Zum andern / So macht der glaub ein fried vnnd sicherheit in
vnsern hertzen / vnd gewissen / dann durch den glauben wissen
wir das vns vnser sund vergeben sein. Darumb spricht Pau- Rom. 8.
lus / Nun wir dann gerecht sein worden / durch den glauben / so ha-
ben wir fried mit Gott / durch vnsern Herrn Ihesu.

Zum dritten / So bringt solcher frid / ein besondere freud in vn-
sere hertzen / das wir Gott / vmb solche gnad lieben / loben / prey-
sen / dancken / vnd lust gewinnen alles das zu thun / das im wol ge-
fellet / vnd zu meiden alles das im vbel gefellet.

Sehet

Rom. 14. **7.** Gehet da meine liebe kindlein / das ist das reich Gottis / wann er durchs Euangelion / vnd durch den heyligen Gaist / in vns herschet / vnd schafft / das wir gerecht werden / fried im gewissen haben / vnd in dem heyligen Gaist vns frewen / vber seinen wolthaten / das ist / das Paulus sagt / Das reich Gottis ist gerechtigkeit / fried / vnd freud im heyligen Gaist.

psall. 110. **11.** Wie nun ein weltlicher König sein volck regirt / mit seinen geboten / vnd mit seiner gewalt vnd macht / Also regirt vns Gott / mit seinem wort des heyligen Euangelions / vnd mit der krafft des heyligen Gaists / den er ausgeust / vber alle / die dem heiligen Euangelio glauben / vnd zeucht vns dardurch / das wir im williglich vnd gern gehorsam sein / dann Gott wil kein genöten dienst haben / sonder sein volck / sol als freywillig sein / wie David sagt. Vnd das ist das reich Gottis / wann er vns also regirt / vnd wir nicht thun was wir wollen / sonder sein von vnserm aigenen bösen willen vnd begyrden / mit leib vnd gemüt / thun aber was Gott der heylig Gaist in vns würckt / das haist die feyre recht hailigen / nemlich / wann wir sein / vnd Gottis wort fleissig vnd gern hören / auff das der heylig Gaist in vns würcke eitel / heilige / Göttliche / vnd himelische werck / das ist / gerechtigkeit / fried / vnd freud wie ihryso gehört habt.

12. Darumb wer da bittet / Zu kom dein reich / der bittet nichts anders / dann das vns Gott wöll geben / das wir mit vnserm aigen willen mögen sein / auff das wir nicht thun / was vns gelüftet / sonder lassen Gott durch sein heilig wort / vnd gaist / eytel heilige werck in vns würcken / damit das drit gebot / nemlich / Du solt die feyre heiligen / in vns erfüllt werd. Dann also erkleret der prophet Esaias dis gebot am acht vnd fünfzigsten capitel / vnd spricht / Wann du nicht thust / was dir gefelt / an meinem heyligen tag / so wirdts ein lustiger Sabbath haissen / den Herren zu heyligen / vnd zu preysen.

13. Vmb das alles / solt ihr nun meine liebe kindlein / Gott den Herren fleissig bitten / nemlich / das er sein reich zu vns kommen las / auff das wir im also gehorsam werden / wie ihr gehört habt.

14. Es kompt aber das reich Gottis auff zweyerley weis zu vns. Zum ersten durch die predig / im glauben / das ist / was man vns den glauben predigt / wie ihr den selbigen gehört habt / nemlich / das vns vnser Herr Christus von sünd / tod / vnd helle / erlebigt hab / durch sein leyden / sterben / vnd aufferhebung / dann durch diese predig / lernen wir Gott vertrauen / vnd lieb haben / das nimbt dann von tag zu tag zu / vnd kompt also / das reich Gottis
alle

alle tag zu vns / nicht allein zu den / die erst anfangen zu glauben /
sonder auch zu den / die vor hin glauben / Dann ihr glaub wirdt /
durch die teglichen predig / des heiligen Euangelions gesterckt /
vnd ihr lieb wirt gemert.

Zum andern / Kommt das reich Gottis zu vns / durch die of-
fenbarung / inn der aufferstehung / wann wir am jüngsten tag /
vom tod wieder auffstehn / vnd in das himelreich genomen wer-
den / dann daselbst / werden wir gar from / heilig / vnsterblich /
vnd ewiglich selig sein / Das alles aber ist vns yetzo verborgen /
vnd noch nicht vor augen / aber am jüngsten tag wirts offenbar
werden. Darumb spricht Joannes in seiner Epistel / meine lie-
be kindlein / Es ist noch nicht offenbar / was wir werden sollen /
wir wissen aber / wann es offenbar wirdt / das wir dem Herren ^{1. Joh. 3.}
Christo werden gleich sein.

Solchs alles lest vnser lieber Herr Gott / in der welt predigen
von jm selbst ohn vnser verdienst vnd zu thun / aus lauter gnad vnd
barmhertzigkeit / wann wir schon nicht darumb bitten. Es hülf
vns aber nichts / wann mans gleich in aller welt prediget / wann
wirs nicht glaubeten / das ist / wann es nicht zu vns in vnser her-
tzen hinein keme. Darumb sollen wir mit allem fleis darumb bit-
ten / das ers nicht allein las predigen / sonder auch den glauben dar
zu gebe / vnd das er in nicht andern leuten allein / sonder auch
vns gebe. Vnd das alles / ist so viel gesagt / vnd gebeten / das er
sein wort durch rechtgeschaffene prediger / vns wöll lassen für tra-
gen / vnd vns durch den heyligen Geist glaubig / vnd jm selb gehor-
sam machen / vnd den selbigen gehorsam von tag zu tag mehren /
Vnd dann die vbrigen vngehorsamen welt / mit all ihr bosheit /
durch den jüngsten tag hinweg thun vñ aufstilgen / vnd vns in sein
ewigs reich zu jm nemen / Das alles haist / Zu komdein reich.

Das ist nun die mainung vnd der ainfeltig recht verstand / die-
ser andern bit / Nemlich / Gottis reich kompt zwar wol / ohn vn-
ser gebet / von jm selbst / Aber wir bitten in diesem gebet / das es
auch zu vns kom. Das geschicht dann / wann der himelische
Vater / vns seinen hailigen Geist gibt / das wir seinem heyligen
wort / durch sein gnad glauben / vnd götlich leben / hie zeitlich /
vnd dort ewiglich.

Darumb meine liebe kindlein merckts mit fleis / vnd was man
euch fraget.

E Wie

Wie verfestu die andern bitte

So solt ihr also antworten.

Gottis reich kombt zwar / ohn vnser gebet / von im selbst / Wie bitten aber in diesem gebet / das es auch zu vns kom.

Vnd wann man euch weiter fraget.

Wie geschicht das?

So solt ihr also antworten.

Wann der himelisch Vater / vns seinen heyligen Geist gibt / das wir seinem heyligen wort / durch sein gnad glauben / vnd götlich leben / hie zettlich vnd dort ewiglich.

Die dritt Predig.

Auflegung der dritten bitte.

In habt ihr bisher gehört/wie wir in den ersten zweien bitten/von Gott dem Herrn begern/das er vns wöll geben / alles / das da gehört zu der ehr Gottis / vnd zum reich der Himel/ daruon er vns in den ersten dreien gebotten hat beuolhen/ Darumb volget hernach die dritte bitt darin wir bitten/ das vns Gott wöl geben / das wir auch die andern siben gebot mögen halten / darin vns geboten wirdt / alles / das da gehört/ zu dem weltlichen reich/ in dieses zergengcklichs leben/ nemlich das wir Vater vnd Mutter / vnd alle obrigkeit ehren nicht tödten / ehebrechen / stelen / liegen / noch yemand nach dem feinen stellen / sonder gehorsam / fridlich / züchtig / vnd getrew vnter einander seyen / vnd lauetet also.

Dein will geschehe / als im himel auch auff erden.

Auff das ihr aber diese bitt recht versteht / meine liebe kindlein / so merckt mit fleis das zwey reich sein / Eins ist Gottis reich oder das himelreich / daruon ihr in der nechsten bitt gehört habt. Das ander ist das irdisch / oder weltlich reich / daruon ihr yetzo hören wert. Nun ist Gott der Herr in diesen beiden reichen / der oberste Herr / Im himelreich regirt er also / das wir ewiglich selig werden / Im irdischen reich / regirt er also / das wir hie zeitlich frid vnd rwe haben / auff das wir Gottis wort hören / vnd lernen / vnd also das himelreich erlangen können. Vnd die weltlich obrigkeit / die in der welt regirt / die ist von Gott eingesetzt / das sie von seinem wegen regiren sollen / vnnnd fleissig darauff sehen / das frid / rwe / vnd einigkeit bleib / vnd niemand sein obrigkeit veracht / niemand morde / niemand ehebrech / niemand stele / niemand liege / noch seinem nechsten bösslich nach seinem gut stelle / Darzu hat er ihm macht geben / die bösen / die nicht gehorsam wöll sein / zu straffen. Wie Paulus bezeugt / vnd spricht / Jederman sey vnterthan der obrigkeit / die gewalt vber ihn hat / dann es ist kein gewalt ohn von Gott / Wo aber obrigkeit ist / die ist von Gott verordenet / Wer sich nun wieder die Obrigkeit setzt / der widerstrebt Gottis ordnung / die aber widerstreben / werden vber sich ein vrteil empfangen. Dann die geweltigen sein nicht den guten wercken zu fürchten / son

Roma. 13.

der den bösen. Christus nun böses / so fürchte dich / dann die obrigkeit tregedas schwert nicht vmb sonst / sie ist Gottis dienerin / ein archerin zur straff / vber den / der böses thut / So seit nun aus not vntertan / nicht allein vmb der straff willen / sonder auch vmb des gewissens willen.

Aus diesen worten / kont ihr nun wol verstehn / meine liebe kindlein / das Gott der Herr wil ein feines / fridlichs / vnd guts regiment auff erden haben / Vnd hat die gebot darzu geben / Du solt Vater vnd Mutter ehren / Du solt nicht tödten / Du solt nicht ehebrechen / Du solt nicht stelen / Du solt nicht falsch zeugnis geben / Du solt dich nicht lassen gelüsten.

Er hat auch der obrigkeit beuolhen / das sie die straffen sollen / die solche gebot nicht halten / vnd wann sie es thun / so thun sie im ein dienst daran / wie wol er selbst auch strafft / Darumb wer vngehorsam ist / mus nicht allein die straff vor der welt fürchten / sonder auch vor Gott ein böß gewissen haben.

Vnd das weltlich regiment / oder den zeitlichen frid / hat Gott darumb verordnet / das man dester leichtlicher die warheit / des heiligen Euangelions mög erlernen vnd erkennen / vnd also selig werden / Dann wa kein frid noch rwe ist / da kan man auch Gottis wort nicht predigen / mit nutz vnd besserung.

Darumb spricht der heilig Paulus / Man sol vor allen dingen bitt / gebet / fürbit / vnd dancksagung thun / für alle menschen / für die könig / vnd alle obrigkeit / auff das wir ein geruhigs vnd stilles leben mögen furen / in aller gotseligkait / vnd erbarkeit / dann solches ist gut / darzu auch angemem / vor Gott vnserm hailand / welcher wil / das allen menschen geholffen werd / vnd zur erkantnus der warheit kommen.

Dieweil wir dann diesen willen Gottis / aus seinen heyligen geboten wissen / so sollen wir allen fleis ankeren / das wirs thun / vnd Gott mit fleis vnd ernst darumb bitten / das er vns die gnade vnd hylff geb / das wirs zu thun vermögen / Darumb hat vns Christus vnser lieber Herr also leren beten / Dein will geschehe / als im himel auch auff erden.

Sein will aber / der hie auff erden / im irdischen regiment geschehen sol / der ist vns sein angezeigt in den siben letzten geboten / die ihr vor gehört habt / Darumb meine liebe kindlein / solt ihr die selben gebot / mit irer auslegung fleißig bedenckē was ir dise wort betet /

betet/ Dein will geschech als im himel auch auff erden. Dann es
ist eben so viel gesagt/ als sprechen wir/ lieber Vater im himel/ gib
vns dein götlich gnad vnd hylff/ das wir Vater vnd Mutter/ vnd
aller obrigkeit gehorsam seyen/ vnd sie von hertzen ehren/ gib vns
das wir niemand feind werden/ mit niemand zürnen/ niemand
schmehen/ niemand schlagen/ niemand tödten/ sonder yederman
guts gonne von hertzen/ vnd erzeigen in Worten vnd wercken/
Gib vns/ das wir züchtig vnd keusch leben/ niemand ergern/ oder
zur vnzucht raitzen/ sonder yederman sein zucht vnd ehr helffen be
warn/ Gib vns/ das wir niemand sein gut/ wieder mit listen/ noch
lügen/ wieder mit stelen noch rauben/ entfrembden/ sonder yeder
man das sein helffen bewarn/ bessern vnd mehren/ vnd von den
unsern gern almosen geben/ Gib vns/ das wir niemant mit lügen
vnd falscher zeugnus beschweren/ sonder zu allen dingen das beste
reden/ Erlöse vns von aller böse begird/ das wir niemand nach sei
nem stand/ oder nach seinem gut trachten/ dann das alles/ ist dein
guter Götlicher will/ den wir hie auff erden fleissig thun sollen.

Vnd sonderlich/ solt ihr das mit allem fleis wol bedencken/ das
wir sprechen/ Dein will geschech als im himel/ Dann die lieben
Engel im himel/ die thun den willen Gottis im himel auff's aller
fleissigst/ mit grosser lieb/ vnd gehorsam/ vnd kompt ihr keinem
nimmer mehr in synn/ das er etwas anders thun solt/ dann was
de wille Gottis ist/ Also solten wir auch hie auff erden thun/ wir
sein aber viel zu böß/ vnd zu schwach darzu/ dann etwa thun wirs
gar nicht/ etwa thun wirs vnfleissig/ vnd vngern/ das ist dann al
les ein grosser gebrech vnd sünd/ vnd kan niemand hie auff erden
so from werden/ er bedarff wol das er noch frömmere werde/ Dar
umb sollen wir Gott immerdar bitten/ das er vns die gnad geb/
das wir seinen willen thun/ bis wir so from/ gehorsam/ vnd frey
willig werden/ als die engel im himel sein.

Weiter solt ihr das auch auff's aller fleissigst mercken/ meine lie
be kindlein/ das wir nicht allein bitten für vns/ sonder auch für an
der leut/ wann wir sprechen/ Dein will geschech/ dann wir bitten/
das ander leut auch Gottis willen thun sollen/ als wol als wir/
vnd wann ein mensch etwas wider den willen Gottis thun wil/ so
bitten wir das ihm sein will nicht fürsich gebe/ sonder das allein
der will Gottis geschehe/ Daraus volget dan/ das wir auch wie
der den Satan/ vnd wieder die bösen welt bitten/ das ihr will auch
nicht fürsich sol gehn/ Dann wann wir Gottis wort hören vnd
glauben/ vnd wolten gern darnach leben/ so thut es dem Satan
zorn/ vnd wolts gern hintern/ richtet an falsche leer vnd schwer
mercy/ krieg vnd auffrur/ lesterung vnd veruolgung/ darzu hilfft
im dann die böse welt/ vnd vnser eygen flaisch sichtet vns auch an.
Wann wir nun bitten vnd sprechen/ Dein will geschehe/ So bitten
E ij Wik

wir nicht allein / das wir vnd ander leut / seine gebot mögen halten
sonder wir bitten auch / das dem Satan / vnd der bösen welt / vnd
vnserm eigen fleisch / sein will nicht sol für sich gehn / sonder Got-
tis will sol allein für sich gehn / auff das frid vnd rwe in der welt
bleib / vnd das wort Gottis gepredigt werd / vnd wir Christlich vnd
seligklich / in aller erbarkeit darnach leben.

Die weil vns dann Christus vnser lieber Herr / also hat haissen
beten / vnd vns zugesagt / was wir den Vater in seinem namen bit-
ten / das wöll er vns geben / So sollen wir festiglich glauben /
vnd nicht zweifeln / er werde auch dis vnser gebet erhören / vnd
dem Satan / vnd der bösen welt / ire böse vntrewe giftige anschle-
ge nicht lassen für sich gehn / sonder vns vor ihrem lestern vnd ver-
uolgen bewaren / das wir bey seinem heyligen wort mögen bleiben
vnd frid haben / Darumb sollen wir getrost vnd grossmütig sein /
vnd sein götlich wort fleissig hören / vnd frölich bekennen / Dann
er spricht / Wer mich bekennet vor den menschen / den wil ich auch
bekennen vor meinem himlischen Vater / Wer mich aber nicht be-
kennet / den wil ich vormeinem himelischen Vater auch nicht be-
kennen.

Matt. 10.
Luce 12.

Auch solt ihr das mit sonderm fleis mercken / vnd in das hertz
bilden / meine liebe kindlein / das wir in diesem gebet / in allerley lei-
den bewilligen / das vns in dieser welt begegnen kan / dann wann
wir bitten / das sein götlicher will sol geschehen / so verzeihen wir
vns / das vnser atgner will nicht sol geschehen / Es ist aber gemai-
niglich vnser will / das wir gern gesündt / reich / ehrlich vnd frid-
lich leben wolten. Dargegen aber ist es der will Gottis / das
wir das creutz tragen / vnd leiden sollen / wie Christus gelitten hat.
Rom. 8. Darumb spricht Paulus zun Römern / Welche Gott zuuor fürses-
hen / das ist / zum ewigen leben geordnet hat / die hat er auch ver-
ordnet / das sie gleich sein solten dem ebenbild / seines sons. Dar-
umb spricht auch Christus / Wer nicht sein creutz auff sich nimpt
Luce 9. teglich / vnd volget mir nach / der kan nicht mein jünger sein.

Es ist aber kein böß zeichen / wann vns Gott leiden zuschickt /
dann er züchtigt ein yedes kind / das er auffnimpt / vnd wer der
zücht oder des leidens nicht tailhafftig ist / der ist nicht ein recht
Gottis kind / sonder ein basthart / wie der Apostel zeuget / So sprit-
Hebr. 12. chet auch Salomon / Wen Gott lieb hat / den züchtigt er. Dar-
Pro. 3. umb solt ihr / meine liebe kindlein / gedultig sein / vnd gern leiden /
wann euch Gott krankheit / oder armut / oder vnuerdiente schand /
oder vnuerdientes leiden vnd veruolgunz zuschickt / dann es ist ein
zeichen / das er euch lieb hat / vnd euch dardurch vor sünden behü-
ten / vnd ewern eigen willen brechen wil / das ihr ein wolgefallen
gewinnet

gewinnet an dem willen Gottis / das ist dann ein rechte himlische
vnd engelische tugend.

Ihr seits auch schuldig zu thun / dann in der tauff hat Gott
ein solchen bund mit vns gemacht / das wir sollen mit Christo zu
gleichem tod begraben sein / das ist / wir sollen leiden vnd sterben
wie er / so wil vns Gott widerumb lebendig machen / vnd in himel
setzen / wie der Herr Christus wider lebendig worden / vnd gen
himmel gefarn ist.

Darumb meine liebe kindlein / merckts mit fleis / vnd seit gedul-
tig in allerley leiden / es sey krankheit oder armut / oder schande /
oder vernolung / dann es ist der will Gottis / das wir leiden sollen
Darumb spricht auch Christus / Es wirt euch nicht ein har von Luce 21
erwerm haubt fallen ohn den willen ewers Vaters im himel. Vnd
wann euch die vngedult ansichtet im leiden / so rufft Gott ernstlich
an / das er euch gedult verleihe / vnd spricht / Dein will geschehe /
vnd nicht der mein / wie vns der Herr Christus in diesem gebet ge-
leret / vnd selbst auch gethon hat.

Das ist nun die mainung / vnd der einfeltig recht verstand / die-
ser dritten bitte / nemlich / Gottis guter gnediger will / geschicht
wol auch ohn vnser gebet / Aber wir bitten in diesem gebet / das er
auch bey vns geschehe. Das geschicht dann / wann Gott allen
bösen rhat vnd willen / bricht vnd hindert / so vns den namen Got-
tis nicht heyligen / vnd sein reich nicht zu vns kommen lassen wöllen
als da ist / des teuffels / der welt / vnd vnser eigen flaischs böser
wille / Sonder behelt vns feste in seinem wort vnd glauben / vnd
im gehorsam seiner gebot / bis an vnser ende / das ist sein gnediger
guter wille.

Darumb meine liebe kindlein merckts mit fleis / vnd wann
man euch fraget.

Wie verstest du die dritten bitte?

So solt ihr also antworten.

Gottis guter gnediger will / geschicht wol auch ohn vnser ge-
bet / wir bitten aber in diesem gebet / das er auch bey vns geschehe.

Vnd wann man euch weiter fraget.

Wie geschicht das?

So solt ihr also antworten.

Wann Gott allen bösen rhat vnd willen / bricht vnd hin-
dert / so vns den namen Gottis nicht heyligen / vnd sein reich nicht
zu vns kommen lassen wöllen / als da ist / des teuffels / der welt /
vnd vnser eigen flaischs böser wille / Sonder behelt vns fest in sei-
nem wort vnd glauben / vnd im gehorsam seiner gebot / bis an vn-
ser ende / das ist sein gnediger guter wille.

Die vierdte Predig.

Auslegung der vierdten bitte.

In habt ihr bisher inn dreien bitten gehört / wie wir von Gott dem herren bitten vnd begern / das er vns wöl geben alles das / das dar zu gehört / das wir seine heylige gebot erfüllen / vnd vns in allem vnserm leben recht halten / beide gegen Gott vnd gegen den menschen / Daraus wir sein erkennen / das wir Gottis gebot / aus aignen krefft / ohn sein gnad vnd hilff nicht können erfüllen.

Darumb volgen hernach die andern vier bitte / darin wir von Gott dem Herrn bitten vnd begeren / das er vns wöl geben / alles das / das vns im heyligen Euangelio fürgetragen / vnd gepredigt ist worden / vnd wirs durch den glauben gefasset haben / vnd begriffen. Dan erstlich volget hernach die vierdte bitt / darin wir bitten / das vns Gott wöll geben alles das / das vns im ersten articel / von der erschöpfung / wirt für gehalten zu glauben / nemlich / das wie er vns erschaffen hat / also auch wöll erhalten / vnd erneren / vnd lautet also.

Unser teglich brot gib vns heut.

Auff das jr aber diese bitt recht versteht / meine liebe Kindlein / so bedenckt mit fleiss / was ihr im ersten articel / des glaubens von der erschöpfung gelernet habt / nemlich das / die weil Gott himel vnd erd hat gemacht / so ist er auch herr darüber / vnd muss alles in himel vnd erde ergehn / wie er wil. Vnd so ers vmb vnsern willen hat gemacht / so muss es vns auch alles dienen. Darumb sollen wir nicht sorgen vmb vnser leben / noch vmb die narung des lebens / Sonder sollen Gott dem Vater / der vns erschaffen vnd das leben geben hat / von hertzen vertrauen / er werd vns vnser leben wol behüten / vnd darzu geben was wir bedörffen. Dann ist er der schöpffer / so muss die gantz welt thun was er wil / vnd wan nicht gnug vorhanden were / so kan er teglich mehr erschaffen wie er dann auch trewlich thut.

Darumb sol sich kein mensch vermessen / das er durch sein eigene weisheit oder geschicklichkeit sein leben mög erhalten / oder sein narung gewinnen / Sonder er sol Gott dem vatter darumb vertrauen / der wil vns erhalten vnd erneren.

Vnd

Und dieweil wir das sollichs glauben / meine liebe kindlein / so sollen wir auch fleissig darumb bitten / vnd sprechen / Unser teglich brot gib vns heut / dann es ist Gott ein ehre / vnd gefelt ihm wol / wann wir viel vnd oft von im bitten. Darumb hat er vns auch ^{Lu. 11.} gehaissen / wir sollen ohn vnterlass bitten / vnd zu gesagt / was ^{Joh. 17.} wir in seinem namen bitten / das wöll er vns geben.

Und zwar es ist aus diesen worten auch gut zuuerstehn / das wir oft bitten sollen / dann Christus hat vns nicht haissen bitten vmb ein grossen vorrat / auff fünffzig oder zehen jar / ja auch nicht auff ain jar / oder ein monat / sonder allein auff den heutigen tag / Und sollen nicht / spricht er / sorgfelig sein für den andern morgen / dann der morgenig tag wirt für das sein sorgen. Es ist genug / das ein yglicher tag sein aigen sorg hat. So wir dann nicht sollen sorgen für den morgenigen tag / sonder allein bitten / Unser teglich brot gib vns heut / so ist gewiss / das wir morgen widerumb bitten sollen / dann wir dörffens morgen gleich so wol / als heut / vnd haben doch heut nicht vmb das morgenig gebetten / sonder allein vmb das teglich. ^{Matt. 6.}

Darumb solt ihr / meine liebe kindlein / euch mit fleis gewenen das ihr oft vnd gern bettet / dann es gefelt Gott wol / vnd ist bereit vns alles zu geben / was wir dürffen / wann wir ihm nur die ehr thun / das wir in darumb bitten. Sonderlich aber soll sich ein yedes mensch gewenen zu betten / wann es sich niderlegt / vnd wann es wieder auffsteht / wann es in der kirchen ist / vnd wann es zum tisch geht / dann diese zeyt sein sonderlich darzu verordent / wie die Schrift hin vnd her mit exempeln sein anzeigt.

Vor allen dingen aber solt ihr meine liebe kindlein bedencken / das wir vnser teglich brot / nicht von vns selbst haben / noch durch vnser geschickligkait oder list mögen vberkommen / sonder Gott der Herr der gibts. Darumb sollen wir niemand betriegen / noch beschweren / dann solches alles hülfft nichts zu der narung / sonder schadet nur. Und wann es Gott schon ein weil glücklich zu gehen lest / so hat es doch kein bestandt / sonder Gott verhengt es allein darumb / das er solche leut vber ein weil bester inn ein grössere schand / armut / vnd verderben kommen laß.

Ihr dörfft auch nicht gedencken / meine liebe kindlein / das vns Gote der herr allein ein stück brots / vnd sonst nichts dar zu / wöll geben / Dann er nennet hie / das teglich brot / alle notturfft / die zu diesem zeytlichen leben gehört / als essen vnd trincken / ^{Flay-}
der

der vnd schuch / haus vnnd / hoff / vich vnnd ecker / gelt / vnnd
gut / from gemahel / kinder vnd haussgesindt / wie der heylig Pau-
lus spricht / Er gibt vns allerley reichlich zu geniessen. Er nennets
1. Th. 6. aber darumb das teglich brot / auff das er vns damit lere vnnd
züchtige / das wir vns an einem zimliche / wie der teglich prauch ist
sollen benügen lassen / vnd nicht zu grossen vberflus vnd pracht er-
zäigen / auff das wir nicht vnser flaisch zu gail vnnd zu mutwillig
machen / vnd vnnützlich ohn werden / das / damit wir den armen
soltten helffen. Dann der heylig Paulus gebeut / das die Chri-
sten sollen arbeiten / auff das sie ihr aigen brot essen / vnnd den ar-
2. Tes. 3. men mittailen. Das kan man nun leichtlich thun / wann man
sich an einem zimlichen last benügen / Wer aber zu köstlich wil le-
ben / der kan den armen nicht viel guts thun / sonder wirt viel mehr
verursacht / den armen das ihr mit betrug ab zu dringen / wie man
dann sieht / das die grossen geytzer / vnnd vollen schlemmer / wie
reich sie sein / den armen wenig guts thun.

Wir bitten auch in dieser bitte / nicht allein vmb die narung /
sonder auch vmb alles das / das darzu von nöten ist / das wir vnser
narung mögen geniessen / Das ist / gut wetter / gesundthait des lei-
bes / fried vnnd ruhe im regiment / from haussgesindt / vnnd
getrewe nachpaur. Dann wann wir lang das feltbawen / vnd
allerley pflantzen vnnd sehen / wann Gott nicht gut weter dar-
zu gibt / so kompts nicht zu fruchten / Vnd wer franck ist / der kan
seiner narung vnd seins teglichen brots auch nicht geniessen / dass
es legt im nicht zu / wann er schon alles genug hat / was sein hertz
begeret.

Des gleichen wan krieg ist / so kan man nichts vor den feinden
behalten / wann man gleich viel hat / Ja man kans auch vor den
freunden nicht behalten / Sonder man raubt / stillt / nimpt / schätzt
verderbt / verwüst / vnd verprennet alles dahin / vnd wann schon
etwas vberbleibt / so kan mans für sorgen / schrecken / vnd allerley
vntrew / auch nicht mit liebe geniessen. Vnnd wan schon fried im
land ist / so hilfft es doch nichts / wann yemandt ein vntrewen ge-
mahel / oder böse vngeradte kinder / oder vntrew haussgesindt /
vnd nachpaur hat / dann diese alle schmelern / vnnd entziehen vns
das teglich brot / das man zu letzt verderben muss. Solchs alles
treibt vnd verursacht der Satan / dann er ist ein solcher böser giffti-
ger feind / das er vns nicht allein durch vnglauben / sund / vnd irr-
thum gern vmb der seel seligkeit wolt bringen / Sonder er wolt vns
auch gern / durch vngewitter / bösen vergifften lufft / mancherley
franckheit / hunger / krieg / auffrür / vnd allerley vntrew des haus-
gesindts vnd der nachpaur / vmb leib vnd leben / ehr vnd gut brin-
gen. Vnd es geschehe auch gewisslich / wann im Gott nicht we-
ret. Darumb sollen wir in dieser bitt fleissig bitten / das ihm Gott
wöll

wöll weren / vnd vns vnser teglich brot geben / das ist alles was zur narung gehört / vnd wolle vns vor allerley bösen Franckheiten behüten / das wirs mit gesundem leib mögen brauchen / darzu auch durch seine fromme fürsichtige obrigkeit / beschützen vnd beschirmen / das vns nicht mit gewalt genommen / oder sonst durch vnrew gesynd entzogen / vnd verderbet werden.

Weiter solt ihr meine liebe kindlein / auch das mit allem fleis merken / das niemand für sich selbst allein bitten sol / Dann Christus vnser lieber Herr hat vns nicht gelet sprechen / Gib mir mein teglich brot / sonder gib vns vnser teglich brot / vnd eben desgleichen in den ander nachuolgenden bitten.

Vnd das geschicht darumb / das wir dardurch zu rechter brüderlicher lieb geübet vnd gezogen werden / dann wir sein alle sündler / vnd von natur kinder des zorns gewest / Aber vnser lieber herr Ihesus Christus / ist für vns gestorben / hat vns also vergebung der sund erworben / vnd hat vns mit Gott dem Vater versönet / vñ Gottis kinder gemacht / Darumb ist Gott nun vnser Vater / vñnd Christus der Herr vnser bruder / Wir aber sein Gottis kinder / vnd erben / miterben Christi / vnd ye einer des andern bruder. So dann Gott vnsern nechsten also geliebet hat / so sollen wir in auch lieben / sonst bleibt die lieb Gottis nicht in vns.

Dargegen sollen wir vns auch trösten / das die gantz Christenheit für vns bittet / vnd alle gaisliche güter / als Christus / himel reich / Euangelion / Sacrament / vnd gebet / vnser aller in gemain sein / dann wer etwas von Gott bitten wil / der mus für vns auch bitten / vnd kan noch sol niemand für sich allein bitten / das ist ein grosser trost / dann wo so viel leut einhelliglich bitten / da wirdt das gebet gewislich erhört.

Das ist nun die mainung / vnd der einfeltig recht verstand / diser vierten bitte / Nemlich / Gott gibt das teglich brot wol / auch ohn vnser bitte / Aber wir bitten in diesem gebet / das er vns erkennen lass / vnd mit danckfagung empfangen vnser teglich brot.

Das teglich brot aber ist / alles was zur leibs narung vnd notdurfft gehört / als essen / trincken / klaid / schuch / hauss / hoff / acker / vñ / gelt / gut / frum gemahel / frumie kinder / frum gesynde / fromme

me vnd trewe oberherrn / gut regiment / gut wetter / fried / gesunde
heit / zucht / ehr / gute freund / getrewe nachbarn / vnd des
gleichen.

Darumb meine liebe kindlein merckts mit fleis / vnd wann
man euch fraget.

Wie verstestú die vierten bitte?

So solt ihr also antworten.

Gott gibt das teglich brot wol / auch ohn vnser bitte / wir bit-
ten aber in diesem gebet / das er vns erkennen lass / vnd mit danck-
sagung empfangen vnser teglich brot.

Vnd wann man euch weiter fraget.

Was haist dann das teglich brot?

So solt ihr also antworten.

Alles was zur leibs narung / vnd notturfft gehört / als essen /
trincken / klaiden / schuch / haus / hoff / acker / vihe / gelt / gut / frum
gemahel / frumme kinder / frum gesynde / fromme vnd trewe ober
herrn / gut regiment / gut wetter / fried / gesundeit / zucht / ehr /
gute freund / getrewe nachbarn / vnd des gleichen.

Die Fünffte Predig.

Auslegung der fünfften bitte.

In habt ihr am nechsten gehört / wie wir in der vierten bitte von Gott dem Herren begern / das er vns / als der einig vnd ware schöpffer himels vnd erden / vnd vnser aller / wölle erhalten vnd erneren / wie wir dann in dem ersten haubt articke des glaubens / Von der schöpfung / gelernt haben / das wir vns desselben zu jm allein / vnd sonst zu keiner creatur / sollen versehen.

Darumb volget hernach die fünffte bitt / darin wir bitten / das er vns wöll auch geben / alles das / das wir in dem andern haubt stuck des glaubens / Von der erlösung / gelernt vnd erkant haben Nemlich das wir durch das leiden / sterben / vnd aufferstehung Ihesu Christi vnser Herrn / von allen vnsern sünden / vom tod / vnd von der helle errettet werden / auff das wir frölich / vnd vnerschrocken mögen erwarten des tags / daran er richten wirdt die lebendigen vnd die todten / vnd lautet also.

Vnd vergib vns vnser schuld / als auch wir vergeben vnsern schuldigern.

Auff das ihr aber diese bitt recht versteht meine liebe kindlein / so bedenckt mit fleis / das ihr vor gehört habt / das vns Christus hat zu gesagt / alles das wir bitten in vnserm gebet / wann wir glauben / so wöll ers vns geben. Sollen wir aber glauben / so müssen wir zuuor ein wort Gottis / oder ein zusagung haben / daran wir glauben / dann es tauget nicht / das wir wolten glauben / was vns einfiel / oder was wir möchten gedencen / darvon vns doch Gott nichts gesagt / oder gelert hette / als wann einer wolt glauben / wann er mutwilligklich in ein wasser fiele / Gott wurd in dannoch erretten / das er nicht ertrüncke / dann das were ein versuchung Gottis / vnd ein grosse sünd / die gewisslich vom teuffel herkompt / wie man darbey wol merckt / das der teuffel Christum vnsern lieben Herrn auch also versuchet / da er ihn zu Iherusalem auff den tempel geführt het vnd sprach / Bistu Gottis son / so fall da hinab / Matt. 4. aber Christus wolts nicht thun / sonder antwortet vnd sprach / Es steht geschrieben / Du solt Gott dein Herrn nicht versuchen. Deut. 6.

Nun hat vns Gott in allerley vnsern nöten / vnderliche vnd reichliche

liebe zusagung gethon/daran wir sollen glauben/vnd in vnserm
gebet daran manen/das ers halte/vnnd vns geben wöll/was er
vns zugesagt hat/vnd sonderlich in diesem stuck/hat er vns ein fein
freundlich/vnd miltes zusagen gethon/das vns nicht allein zum
ewigen leben dienet/sonder auch zum zeitlichen fried/rwe/vnnd
einigkeit/vnd zu rechter brüderlicher liebe/das lautet also/Mat-
thai am.vi. Wann ihr dem menschen ihre feel vergebet/so wirt
euch ewer himlischer Vater ewere feel auch vergeben/Wann ihr
aber den menschen ihre feel nicht vergebet/so wirdt euch ewer Va-
ter/ewere feel auch nicht vergeben.

Vnd vmb dieses zusagens willen/meine liebe kindlein/hat vns
Christus vnser lieber Herr also geleret beten/Vergib vns vnser
schuld/als auch wir vergeben vnsern schuldigern/Dann es wer
nicht recht/wann wir beten/Gott solt vns vnser schuld vergeben
vnd wir wolten doch ander leuten nicht vergeben/was sie wieder
vns gethon hetten/Es wurd auch Gott ein solchs gebet nicht erhö-
ren/Dann was wir für vrsach haben/darumb wir andern leu-
ten nicht verzeihen wöllen/so hat Gott dargegen eben die selbigen
vrsach/vnd noch viel mehr/das er vns auch nicht verzeihe/Es ist
auch nicht möglich/das ein mensch glauben kan/das im Gott sein
sünd vergebewann er selbst andern leuten/nicht verzeihen wil.
Darumb wann im Gott sein sünd schon vergeben wolt/so keret er
doch wieder vmb/vmb solcher vntrew/vnd vnglaubens willen/
Wie vns Christus fein angezeiget hat/inn dem exempel Matthei
am achtzehenden/ Da der knecht/dem sein schuld nach gelassen
war/seynem mitknecht die schuld nicht auch nachlassen wolt/da
muß er alles wieder bezalen/was man im vor nachgelassen vnnd
geschenckt hette.

Ephes. 4. Darumb meine liebe kindlein/lernets bey zeit/von jugent
auff/das jr gern vergebt/vnd verzeihet allen denen/die euch be-
laidigen/vnd seit nicht rachgirig/so wirdt euch Gott/ewer him-
lischer Vater auch verzeihen/zürnt mit niemand/zürnet jr aber/
so sündigt nicht/vnd last die Sonnen nicht vnter gehn vber ewern
zorn.

Dann vnser lieber Herr Gott/hats vns nicht zu einem nach-
tail gethon/das er gesagt hat/er wölle vns nicht vergeben/wir ver-
geben daß andern leuten auch/Wann wir aber andern leuten ire feil
vergeben/so wölle er vns auch vergeben/sonder er hats vns zu gut
gethon/vñ ist ein sonderlicher haimlicher trost darin verborgē/den
merckt mit fleis/so wert jr Gottis güte/vñ veterliche barmhertzig-
keit darin erkennen/daß er waifs wol/das es vnserm hertzen schwe-
re ist/wann wir gesündigt/vñ Gott belaidigt haben/das wir sollen
glauben

glauben / das er vns dasselbig vmb sonst / aus lauter gnaden verzeihen wölle / Darumb hat er vns das zeichen daran gegeben / darbey wirs erkennen sollen / das er vns verzeihe / nemlich / wann wir andern leuten auch verzeihen / Dann es ist viel leichter / andern leuten verzeihen / dann glauben / das Gott vns / vnser sünd verzeihe / wie wol es auch schwer ist / Darumb sollen wir vns mit fleis darzu vben / das wir gern verzeihen / so können wir als dann vil desto leichter glauben / das vns vnser Herr Gott vnser sünd auch verzeihe / dann er ist doch ja barmhertziger vnd gütiger dann wir sein.

Es dienet auch nicht allein zum glauben / sonder auch zum zeitlichen frid / rwe / vnd ainigkeit / vnd zu brüderlicher liebe / Dann wann wir ein ander nicht wolten verzeihen / sonder ein yedlicher weg suchen / wie er sich möcht rechen / mit listen / mit gewalt / oder mit recht / so wurd des betriegens / schlagens / vnd rechtens / so vil in der welt werden / das niemand kein frid / noch rwe in der welt wurd haben / das were vns aber verderblich an seel vnd leib / ehr vnd gut / wie mans sein erferet / dann es rechtet oft einer vmb zween oder drey gulden / bis es in wol zwantzig oder dreyszig kostet / vnd gewint dannoch zu letst nichts / So maint oft einer / er wölle einem andern ein wunden schlagen / vnd wurd er selbs daruber gar erwürget / vnd felt darzu in Gottis zorn / Darumb ist es viel besser man vergebe / ye eins dem andern / dann das man zürne vnd zanke / vnd ob es gleich zu zeiten ein schaden am gut bringt / so haben wir doch das dargegen zu gewin / das vns Gott auch verzeihet vnd vergibet / wie wir vnsern belaidigern vergeben.

Ihr solt aber mit fleis mercken / meine liebe kindlein / das vns Christus geleret hat / wir sollen sprechen / Vergib vns vnser schuld vnd nicht vnser sünd / Dann wann er vns die schuld vergibt / so ist es viel mehr / dann wann er vns die sünd vergibt. Das solt ihr also verstehen / die sünd haist / wann wir vnrecht thun / wieder Gottis gebot / Schuld aber haist / wann wir guts thun sollen / vnd thuns nicht / oder thuns aber ja nicht vollkommenlich vnd gar / wann wir gleich darneben nichts vnrecht thetten.

Wann vns nun die sünd durch den glauben an Christum vergeben ist vnd sein gerecht / vnd Gottis kinder worden / haben dem heyligen Geist empfangen / der vns wieder die sünd hilfft streitten / vnd sterckt vnd treibet vns zu allerley guttem werck / so thun wir dannoch noch nicht alles das vollkommenlich / was wir thun solten / wann wir gleich nicht wieder seine gebot offentlich vnd gröblich handeln / Wann wir aber nicht alles thun / was wir sollen / so

l ij blet

bleiben wir immer dar noch etwas schuldig / Die selbigen schulde
vergiht vns nun Gott auch / vmb Christus willen / wann wir in
darumb bitten / vnd vnserm nechsten auch verzeyhen. Vnd da si-
het man warumb wir nimmer mehr durch vnser eygene werck /
können von sünd / tod / vnd helle erledigt vnd gerechtfertigt werden
dann vnser gute werck dörfen auch verzeyhen / darumb / das sie
nicht vollkommen sein / Darumb müssen wir alleyn durch das ley-
den / sterben / vnd auferstehen Christi vnser Herrn / erlöset wer-
den / wie wir im andern artickel des glaubens von der erlösung ge-
lernet haben.

Dieweil wir dann im glauben lernen / das vns Gott all vnser
sünd vnd schuld allein vmb Christus willen vergeben hab vnd das
selbige glauben / So sollen wir Gott fleysig bitten / das er vns
wöll thun nach vnserm glauben / vnd vnser schuld vergeben / wie
wir ander leuten ihre schuld vergeben.

Das ist nun die mainung / vnd der ainseitig recht verstandt die-
ser fünfften bitte / Nemlich / wir bitten inn diesem gebet / das der
Vatter im himel nicht ansehen wöll vnser sünde / vnd vmb der selbi-
gen willen vnser bitt nicht versagen / Dann wir sind der keins wert
das wir bitten / habens auch nicht verdient / sonder er wolts vns
alles aus gnaden geben / dann wir teglich viel sündigen / vnd wol
eitel straff verdienen / So wöllen wir dargegen auch hertzlich ver-
geben / vnd gern wol thun denen / die sich an vns versündigen.

Darumb meine liebe kindlein merckts mit fleis / vnd was man
euch fraget.

Wie verstestu die fünfften bitte?

So solt ihr also antworten.

Wir bitten in diesem gebet / das der Vater im himmel nicht an-
sehen wöll vnser sünde / vnd vmb der selbigen willen vnser bitt nicht
versagen / Dann wir sein der keins wert / das wir bitten / habens
auch nicht verdient / sonder er wolts vns alles aus gnaden geben /
dann wir teglich viel sündigen / vnd wol eitel straff verdienen / So
wöllen wir dargegen auch hertzlich vergeben / vnd gern wol thun
denen / die sich an vns versündigen.

Die sechste

Die sechste Predig.

Auslegung der sechsten bitte.

In habt ihr am nechsten gehört / wie wir in der fünfften bit / von Gott dem Herrn begern / das er vns wöll geben / alles das / das vns vnser lieber Herr Jesus Christus erworben hat / durch sein bitters leiden vnd sterben / vnnnd durch sein fröliche aufferstehung / Nemlich vergebung der sünde / gleich wie wir auch vergeben / denen / die wieder vns gethon haben / wie wir dann in dem andern hauptstück des glaubens / von der erlösung gelernet haben.

Darumb volget nun hernach die sechste bitt / darin wir bitten / das er vns auch wöll geben / alles das / das wir im dritten hauptstück des glaubens / von der heyligung gelernet / vnnnd erkant haben / Nemlich / das er vns auch seinen heyligen gaisst wöll schicken der vns helff streitten wieder die sünd / wieder vnser flaisch / wieder die welt / vnnnd wieder den teuffel / auff das wir aller anfechtung / vnd versuchung mögen widerstand thun / Vnd lautet also.

Vnd für vns nicht in versuchung.

Auff das ihr aber diese bitt recht versteht / meine liebe kindlein / so merckt mit fleis das / was vns schon die sünd vergeben ist / durch Christum / so ist sie darumb noch nicht hin genomen oder außgereut / sonder steckt noch in vnserm flaisch / vnnnd sicht vns an / vnnnd wolt vns gern bewegen / vnd vberwinden / das wir vnrecht / vnnnd wieder Gottis gebot solten thun / Dann ihr habt ja aus den zehent geboten gelernet / was sünd vnd vnrecht ist / vnnnd das ihr dasselb nicht solt thun / So habt ihr auch aus dem glauben gelernet / das vns Gott die sünd vergibt / vnnnd nicht mehr darumb verdampt / wann wir an Christum glauben / Aber wir empfinden dan noch der sünde / das sie vns noch ansichtet / das wert ihr an euch selbst fein mercken. Dann wann euch ewere eltern etwas haissen / das ihr nicht gern thut / so sichtet euch die sünd an / vnd wert versucht / das ir solt Vater vnd Mutter vngehorsam sein / Ihr aber solt der selben versuchung nicht folgen / sonder solt Vater vnd Mutter gehorsam sein / wie Gott geboten hat / Des gleichen auch wann ihr sehet / das ein anders etwas feins hat / das ihr auch gern haben wolt / so sichtet euch die sünd an / vnd versucht euch / das ihrs im

nemen / oder es darumb betriegen / oder im stelen solt / Ihr aber solt derselben versuchung auch nicht volgen / sonder solt das gebot Gottis halten / das da spricht / Du solt nicht stelen. Also werden wir auch in den andern geboten angefochten / vnnnd versucht / ob wirs halten wöllen oder nicht / wir sollen vns aber ernstlich weren / das wir nicht wider Gottis gebot thun.

Wann wir nun der anfechtung vnd versuchung widerstand thun vñ nicht volgen wöllen / Sonder wöllen die gebot Gottis halten so ist von nöten / das wir den heyligen Gaißt haben / Dann den heyligen Gaißt / kan niemand from vnd heylig sein / vñ darumb haiffi er auch der heylig Gaißt / das er die leut from / rein / vnd heilig macht. Nun gibt aber Gott den heyligen Gaißt / allen denen die von hertzen an den Herrn Christum glauben. Vnd darbey leret vns auch der heylig Paulus erkennen / das wir den heyligen Gaißt haben / wann wir bekennen / das Ihesus Christus warlich vnser Herr sey. Dann er spricht / Niemandt kan sprechen Der Jesu / ohn allein durch den heyligen Gaißt / Darumb meine liebe kindlein / glaubt von hertzen / das Ihesus Christus warer Gottis Son sey / für euch gestorben / vnd wieder auffstanden / hab euch vergebung der sünd / vnd das ewig leben erworben / vnd sey ewer aller Herr / also / das ihr gewisslich bey im / im ewigen leben wert sein / vnd im in der ewigen seligkeit dienen / So gibet er euch den heyligen Gaißt / der selbig macht dann euch heilig / vnd hilfft euch / das ihr nicht in versuchung gefürt wert / sonder from sein kont / wie ihr in den zehen geboten habt gelernet.

1. Cor. 12.

Dann es geht nicht anderst inn diesem leben zu / dann das wir viel anfechtung / vnd versuchung haben / Ein weil sichtet vns vnser eigen flaisch an / ein weil die böse welt / ein weil der teuffel selbst vnd sein alle anfechtung dahin gerichtet / das wir sollen wider Gottis gebot thun. Nun müssen wir aber vns solcher anfechtung in vnserm hertzen erwerben / das wir nicht vnrecht thun / vnd können vns doch nicht erwerben / es helff vns dann Gott / durch sein heiligen Gaißt. Darumb wann wir angefochten werden / das wir vnrecht thun sollen / so ist nichts bessers / dann das wir Gott fleissig vmb hylff bitten / vnd sprechen / Für vns nicht in versuchung / dann wann wir das thun / so erhöret Gott vnser gebet / schickt vns sein heyligen Gaißt / vnd hilfft vns / das wir from bleiben.

Auff das ihr aber / meine liebe kindlein / solcher anfechtung vnd versuchung / dester bas lernet widerstand thun / so merckt mit
fleys

flais das die anfechtung vnd versuchung dreyerley synd. Die ersten anfechtung sein von vnserm flaisch / als wann wir angefochten werden etwas zu thun / das vnserm flaisch wol thut / vnd doch vnrecht ist / als ehebrechen / hurerey treiben / voltrincken / vnd der gleichen / Oder wann wir angefochten werden / etwas vnterwegen zu lassen / das dem flaisch wieder ist / vnnnd doch recht ist / als wann wir nicht gern leiden / fasten / oder nicht gern almüsen geben darumb das wir sorg haben / es werd vns zu vnserer hoffart vnnnd bracht zurrinnen.

Die andern anfechtung sein von der welt / als wann vns böse gefelshafft verführen wil / das wir vnrecht thun sollen / oder wann vns die menschen mit troen / zürnen / vnd veruolgen weren wollen / das wir nicht sollen recht thun / Oder wann sie vns / zu zorn / neid vnd hasß raitzen / mit iren bösen tucken vnd wercken.

Die dritten anfechtung sein von dem teuffel / Als wann vns ein felt / das wir vnrecht thun sollen / vnd treibet vns doch weder vnser flaisch / noch die welt darzu / Sonder es kommen die bösen gedancken so schnel / vnd vnuersehens daher geflogen / das wir selbs nicht wissen wo her / oder aus was vrsachen sie kommen / Solche böse gedancken sein gewislich vom teuffel / dann der teuffel ist ein gaist / den wir weder greiffen noch sehen können / Er aber kan vns böse gedancken in vnserem hertzen verursachen / das wir nicht wissen wo her sie kommen / Ja wann vns vnser flaisch / oder die welt anfiicht / so kompt er auch darzu / vnd sterckt die selben anfechtung. Also das es vns sawr vnd schwer wirdt / das wir vns der anfechtung erwerben / vnd nicht vnrecht thun.

Vnd diese anfechtung vnd versuchung alle mit einander / meine liebe kindlein / sein wieder Gottis gebot / Darumb lernet die anfechtung darbey kennen / wann euch etwas in erder synn / vnnnd gedancken kompt / das ihr thun solt wieder Gottis gebott / so ist es ein anfechtung / oder versuchung / darumb solt ihrs nicht thun / Sonder ihr solt Gott bitten vmb gnad / vnd hylff / das ihr euch desselben mögt erwerben.

Dann darin steht ein Christlichs / vnstrefflichs / heiligs leben / das wie vns die sünd durch Christum vergeben ist / also sollen wir vns auch weren / das wir kein sünd mehr thun. Dann was were das für ein wüstes vnchristlichs leben / wann wir bekenneten / das die sünd vnrecht ist / vnd beten Gott / das er vns die sünd verzeyhen wolt / vnd er thers auch / vnd wir wolten dennoch nicht auff hören zu sünden.

Wir könnens auch wol thun / wann wir nur recht glauben / vnd ernstlich bitten. Dann im glauben lernen wir / das wir von vns selbst nicht heilig / from / vnd rein sein / sonder Gott der heilig Gaist mus vns heilig / from / vnd rein machen. Wann wir nun das festiglich glauben / so sollen wir auch ernstlich darumb bitten nemlich also / Lieber Herr himelischer vater / führe vns nicht in versuchung / So wirt vns Gott erhören / vnd in der versuchung erhalten.

Dann das müssen wir vns in diesem leben erwegen / das wir kein rue noch frid vor den anfechtungen werden haben / sonder es wirt ymmer aine nach der andern daher fallen. Vnd wann wir aine vberwunden haben / so wirt ein andre da sein / die noch grösser ist. Darumb bitten wir nicht Lieber herr himelischer Vatter / las vns kein versuchung kommen / sonder wir bitten allein / das er vns nicht darein führe.

Das haist aber in versuchung geführt / was Gott verhengt / das die anfechtung so stark wirt / das wir sie nicht vberwinden können sonder lassen vns den teuffel also betriegen vnd blenden / das wir nichts dann nur eytel nutz vnd wollust an der sünd sehen / dargegen aber Gottis zorn vnd die straff gar nicht sehen / also / das wir vns lassen beduncken / es dörrf kains bedenckens mehr / sonder es sey schlechts ohn alles hinder sich sehen zu thun / vnd bewilligen also in die versuchung / vnd in die sünde / Das haist dann in die versuchung geführt / Gleich wie wir sonst sprechen / der hat mich in ein vnglück geführt das ist / er hat gemacht / das ich mich drein begeben hab. Auff das wir aber ja in kein versuchung geführt werden / so sollen wir Gott fleissig dafür bitten / wie vns Christus allhie gelehrt vnd beuolhen hat.

Also sehet ihr meine liebe kindlein / wie es ein gestalt hat / vmb vnser zeytlichs zergenglichs leben / es ist voller böser anfechtung / aber wir sollen solchen anfechtungen nicht folgen / sonder ihn widerstandt thun / vnd from sein / das können wir aber nicht / es mach vns dann der heilig Gaist selbs heilig / from / vnd rein / Darumb sollen wir Gott fleissig bitten / das er vns sein heiligen Gaist wöll geben / vnd vns lassen heiligen / das wir aller böser anfechtung / vnd versuchung widerstehen / vnd seine heilige Göttliche gebot mögen halten.

Vnd das ist nun die mainung / vnd der einfeltig recht verstand / dieser sechsten Bitt / nemlich / Gott versucht zwar niemand / Aber wir bitten in diesem gebet / das vns Gott wöll behüten / vnd erhalte / auff das vns der teuffel / die welt / vnd vnser fleisch nicht betriege /

triege/vnd verführe in missglauben/verzweifeln/oder andere große schand vnd laster / vnd ob wir damit angefochten werden / das wir doch entlich gewinnen / vnd den sig behalten.

Darumb meine liebe kindlein merckts mit fleis / vnnnd wann man euch fraget.

Wie verstestu die sechsten bitt?

So solt ihr also antworten.

Gott versucht zwar niemand / Aber wir bitten in diesem gebet / das vns Gott wöll behüten / vnd erhalten / auff das vns der teufel / die welt / vnd vnser flaisch nicht betriege / vnd verführe in missglauben / verzweifeln / oder andere grosse schand / vnd laster / vnd ob wir darmit angefochten werden / das wir doch entlich gewinnen / vnd den sig behalten.

Die

Die sibendt Predig.

Auflegung der siebende vnd letzten bitte.

DA Vn habt ihr am nechsten gehört / wie wir in der sechsten bit / von Gott dem Herren begern / das er vns durch seynen heyligen gaist wöll laiten vnd stercken / das wir mögen streyten wider die sünd / vnd aller anfechtung vñ versuchung vnsers argen flaisches / der welt / vnd des teuffels widerstand thun / auff das wir heylig vnd from werden.

Darumb volget ytzo hernach die siebendt vnd letzte bitte / dar in wir beschliessen / vnd bitten / das er vns von solchem streit / vnd von allem andrem vbel wöl erlösen / auff das es nicht ymmerdar were / sonder ein mal ein end neme / Vnd lautet also.

Sondern erlösz vns vom vbel / Amen.

Auff das ihr aber diese bitt auch recht versteht meine liebe kindlein so solt ihr wissen / das das wörtlein (vbel) nicht allein haist die sünd wider Gottis gebott / vnd den vn glauben wieder Gottis zusagung / sonder es haist auch alles das vn glück / das vns an leib vnd seel / an ehr vnd gut / von der sünd wegen begegnet / als da ist / vnwissenheit / traurigkeit / forcht / schrecken / Kleinmütigkeit / schwachheit / Franckheit / tod / armut / schand / schmach / widerwertigkeit / verfolgung / krieg / tewrung / pestilentz / vnd allen den schaden / den vns der böß feind teglich thut / durch sich selbst / oder durch die bößen welt / die sein reich ist.

Apoc. 12. Nun kan aber niemand solche vbel alle genugsam erzelen / dasñ ihr sein vber die massen viel / vñnd werden ihr darzu ymmer ye lenger ye mehr / dann der Satan tobet vnd wütet in diesen letzten zeyten / mit seinem grossen zorn / ye lenger ye greulicher / wieder Gottis volck / die weil er wais / das er wenig zeit hat / auff Gottis gericht / vnd sein ewige verdammus. So wirt die welt auch ye lenger ye bößer / Darumb nimpt allerley schand vnd laster / allerley böß hait vnd vntrew vberhandt / vnd wirt des vbels so viel / das es niemand erzelen kan / ya es kans auch niemand genugsam verstehen / was vns nutz oder schad sey / oder wann vns guts oder vbels begegnet / Dann mancher maint / Franckhait sey sein grosser schad /
Wann

Wann er aber gesund were / so möcht er sündigen / das er darumb verdampt wurde / oder möcht sonst ein vnglück anrichten / das er darumb erwürgt wurde so er aber frantz ist / so bleibt er bey leben / vnd wirt darzu selig. Mancher maint reichthumb sey sein nutz / vnd verlest sich drauff / lernt nichts / vnd thut auch nichts / dann das er müßig geht / vnd vnglückt stift / darob er etwo erwürgt wirt / Dader thut nichts dan das er isset vñ trincket / darob er in grosse frantzheit felt / vnd stirbt / Wer er aber arm gewest / hett etwas gelernet vnd gearbeit / so wer er bey gesundem leben blieben.

Mancher maint / im begeben gros vbel vnd widerwertigkeit / vnd zürnt seer / wann er an seinem fürnemen verhindert wirt / vñnd wais nicht / das es sein größtes vnd höchstes verderben gewest were wann es im für sich vnd nach seinem willen gangen were. Darumb wissen wir warlich gar wenig / was vns gut / oder böß vñnd vbel ist / ohn was wir aus Gottis wortierlernen.

Die weil wir aber nicht wissen / was vns nutz vnd gut / oder aber schad vnd böß ist / so können wir auch Gott den Herren nicht mit außgedruckten wortten bitten / das er vns / vor diesem oder ihenem behüte / Sonder müssen allein mit wenig wortten / aber dabey mit vnaussprechlichen gedancken vñnd seufftzen bitten / das vns Gott wöll helfen / nicht wie wir gedencen / dan wir verstehn nicht / was vns nutz oder schad ist / sonder wie ers für gut erkent. Darumb spricht auch der heilig Paulus. Wir wissen nicht / was wir bitten sollen / wie sichs gebürt / sonder der gaist vertritt vns selbst mechtiglich vor Gott / mit vnaussprechlichem seufftzen. Rom. 8

Wir sollen vns aber das auch nicht hindern lassen / das wir bester weniger wolten beten / Dann Gott der Herr begert oder bedarff sein gar nicht / das wir ims alles so eben solten fürsagen / was wir dörrften vnd begern / Sonder / er weis vorhin wol / was vns anliget / Darumb hat vns Christus vnser lieber Herr im Euangelio auch also gelert / Wann ihr betten wolt / so solt jr nicht vil wort machen / wie die heuchler thun / Dann die selben mainen / sie werden vmb ihr viel wort willen erhört / Ihr aber solt in nicht gleych werden / dann ewer himelischer Vater weis vor wol / was ihr bedörfft / eh dan ihr ihn bittet. Matt. 6

Vnd eben wie er vns gelert vnd beuolhen hat / wir sollen nicht viel wort machen / also hat ers selbst auch sein gehalten / dann die weil des vbelis vnd vnglücks / das vns teglich begegnen mag / so viel ist / das wirs nicht alles nennen / oder erkennen mögen / so fasset ers alles zusamen / inn ein einigs wort / vñnd leret vns also betten / Erlöfs vns vom vbel. Gleich als sprech er / Last euch nichts anfechten / das ihr nicht wisset noch versteht / alles das vnglück / darvor euch Gott behüten sol / sonder sprecht nur das kurtz

Kurtz wörtlein / Erlös vns vom vbel / so waiß er schon / was er
thun / vnd war vor er euch behüten sol / vnd wirts auch gern thun.

Da sehet ihr dann fein / meine liebe kindlein / wie gnedig vnd
barmhertzig Gott vnser lieber Vater im himel ist / der so fleißig auff
vns sihet / das er waiß was wir bedörffen / vñ waruor er vns sol be
hüten / eh dann wir in bitten Vnd begert nicht / das wir viel wort
machen / Sonder allein das wir im die ehr thun / das wir ihn dar
umb bitten / vnd mit dem gebet vnsern glauben auffwecken / das
wir glauben er erhör vns / dann wann das geschicht / so wirt vns
gewißlich geholffen.

Jere. 17.

Darumb solt ihr meine liebe kindlein / mit fleis mercken / das
Gott der Herr / von vns begert / vnd haben will / wir sollen in al
lem vbel / das vns begegnen kan / hylff bey im suchen / vnd ihn al
lein anruffen / das ist / wir sollen vnser vertrauen auff kein men
schen setzen. Dann der Prophet Jeremias spricht / Verflucht ist
der man / der sich auff menschen verlest / Sonder wir sollen allein
auff Gott vertrauen / dan wann vns schon menschen helfen / so
thun doch sie es nicht / sonder Gott thuts durch sie / als durch ein
feinen geschickten werckzeug / Wans aber Gott nicht thun wil / so
könnens die menschen auch nicht thun. Geschicht vns gewalt vnd
vnrecht / vnd wil vns Gott nicht erlösen noch helfen / so wüdt
warlich der Richter auch nicht thun / Wann vns aber Gott helfen
wil / so thut ers durch den Richter / den er darzu verordnet hat / als
durch sein werckzeug. Werden wir krank / vnd wil vns Gott
nicht gesund machen / so wirts warlich der artzt auch nicht thun /
Wann vns aber Gott gesund wil machen / so thut ers durch die ertz
ney / die er darzu erschaffen hat / als durch sein werckzeug / Dar
umb sollen wir in allen nöten Gott anruffen / vnd hylff bey im al
lein suchen / im allein darumb lob / danck / vnd preiß sagen / Dem
werckzeug aber / sol man auch sein gebürliche ehr beweisen.

Wir sollen aber auch wol bedencken / vnd fleißig mercken / mei
ne liebe kindlein / das wir nicht sprechen / Behüt vns vor dem vbel
sonder erlös vns von dem vbel. Dann damit bekennen wir / vnd
ist auch war / das wir schon in alles vbel gefallen sein / vnd es ist
mechtig vnd geweltig vber vns worden / das wir vns selbst nicht
mehr erwerben noch erretten können. Vnd das alles ist geschehen
da wir sein in die sünd gefallen vnd sündler worden / Dann die sünd
ist nichts anders / dann ein abfal vom wort Gottis / als wan man
seinem wort nicht glaubt / vnd seinem gebot nicht volget / Daraus
entstehet dann alles vbel / dann wer Gottes wort nicht glaubt / der
hat schon kein weißheit noch verstandt mehr / sonder ist vnwis
sendt vnd blindt / Vnd wer Gottis gebot nicht volget / der ist schon
eigen

eigenwillig / vnnd voller böser begird / zu vngehorsam / auffruhr /
todschlag / ehebruch / diebstal / liegen vnd triegen / daraus volget
dann ein bößs gewissen / forcht / traurigkeit / schrecken vnd kleinmü-
tigkeit. Ein solcher mensch aber kan nicht in die lenge leben / son-
der nimpt von tag zu tag ab / vnnd frist jm selbst das hertz ab / mit
seinem vnordenlichen wesen / Darumb empfindet er hunger / durst
hitz / frost / müde / schwacheyt / daraus entstehen dan allerley
Kranckhait / vnd zu letz der tod. Vnnd dieweil er kein waißheit
mehr hat / sonder blind ist / so kan in der Satan verführen vnd betrie-
gen / Daher volget dann abgötterey / zauberey / ketzerey / irthumb
vnd allerley falsche leer. Vnd die weil anderleut eben auch also
sein / vnd keiner besser ist dann der ander / außgenommen die glau-
bigen / So volget dan / neid / haß / zorn / zancck / betrug / raub / dieb-
stal / schmach / scheltwort / schlagen / würgen / liegen / triegen / krie-
gen / vnd alles verderben. Solche grosse grewliche sünde kan dann
Gott nicht vngestraft lassen / sonder verhengt dem bösen Feind /
das er den lufft vergifft / vngewitter anricht / da feuer ausbringt /
dort mit wasser schaden thut / hie macht er ein vnfinnig / dort bsitzt
er einen gar / dem bricht er den hals ab / den leßt er ertrincken / ver-
brinnen / oder zu tod fallen / vnnd sonderlich richtet er an / das die
leut verzweifeln / wo er nur kan / auff das sie dann ewigklich ver-
dampt werden.

In dise vnglück vnd vbel alle sein wir gefallen / da wir gesündt-
get haben / vnnd müssen all augenblick gewarten / wann sie vber
vns daher fallen. Darumb thut es warlich not / das wir Gott den
himelischen vater trewlich anruffen vnd bitten / das er vns vor dem
vbel wöl erretten vnd erlösen.

Dieweil wir vns aber selbs in diese vnglück vnd vbel alle gestre-
cket haben / so müssen wirs auch zur straff ein zeitlang tragen / das
sie werden nicht von stund an von vns genommen / Darumb bitten
wir auch nicht / das Gott alles vbel als bald hin wegnemen vnnd
aufstilgen wöll / Sonder alleyn / das er vns daruon erlöse / Das
ist / wann wir lang im vbel gelegen sein / vnd viel gelitten haben /
das er vns erretten wöll / das wir endlich nicht darinn verderben /
sonder erledigt werden. Dann wiewol vns Gott die sünd vergibt /
so nimpt ers doch nicht als bald von vns / sonder leßt sie noch an
vns kleben / bis wir sterben / auff das wir demütig bleyben / vnnd
darwieder streitten / Da mit wir probirt werden / ob wir Gott lieb
haben / vnd seine gebot lieber halten / dann vnsern bösen begirden
nachfolgen.

Desselben gleichen leßt er vns auch die andern vbel zum tail
m auff

auff dem hals ligen / das wir das creutz müssen tragen vnser leben lang biss vnser aygner will wieder geprochen wirdt / vnd wir Christo vnserm Herrn gleich werden.

Darumb sollen wir meine liebe kindlein / fürsichtig vnd gedultig sein. Fürsichtig in dem / das wir der sünd die vns noch anhanget / nicht folgen. Gedultig aber in dem / das wir die andern vbel vnd alles creutz / das vns Gott auffleget / willig tragen / vnd Gott den Herrn ernstlich vnd emsiglich anrufen / das er vns nicht darinnen verderben wöll lassen / sonder gnediglich daruon erlösen.

Das geschicht dann gewisslich / von tag zu tag ye lenger ye mehr / sonderlich aber werden wir gar erlöset / wann wir sterben / vnd wieder aufferstehen. Darumb wann wir bitten / Erlöset vns vom vbel / so bitten wir auch vmb ein Christlichs seligs endt / das solt ihr kindlein fleissig mercken / dann wann wir sterben sollen / so sein wir in der grösten gefarlichkeit / Darumb sollen wir Gott von jugent auff fleysig vnd ernstlich bitten / das er vns ein seligs endt verleihe / das ist / das er vns gnediglich von allem vbel wöll erlösen.

Vnd disß gebet / sollen wir allweg beschliessen mit dem wörtlein Amen / das haist zu teutsch als viel / als / es wirdt gewisslich also geschehen. Es ist aber nicht genug / das wir mit dem munde sagen / Amen / Sonder wir sollens auch im hertzen für ein Amen halten / vnd ein Amen sein lassen / das ist / wir sollen so vestiglich glauben / das vnser gebet erhöret sey / vnd vns Gott vnser himelischer Vatter geben werd / was wir gebeten haben / Als gewis alles das war ist / das Christus redet / wann er spricht / Amen Amen. Dann wann wir also glauben / so geschicht vns gewisslich wie wir glauben.

Das ist nun die mainung / vnd der ainfeltig recht verstandt dieser sibenden vnd letzten bitt / Nemlich / wir bitten in diesem gebet / als in der Summa / das vns der Vatter im himel von allerley vbel leibs vnd seele / guts vnd ehre / erlöse / vnd zu letst / wann vnser stundlein kompt / ein seliges ende beschere / vnd mit gnaden von diesem jammerthal zu sich neme in den himel.

Amen

Amen.

Das ist / das ich sol gewis seyn / solche bitt seyen dem vater im
himmel angenehm / vnd erhöret / dann er selbs hat vns gebotten also
zu beten / vnd verhaissen / das er vns wol erhören / Amen. **A-**
men / das haist / Ja Ja / es sol also geschehen.

Darumb meine liebe kindlein / merckts mit fleis / vnnnd wann
mann euch fraget.

Wie verstehstu die letzten bitt?

So solt ihr also antworten.

Wir bitten in diesem gebet / als in der Summa / das vns der
vater im himmel / von allerley vnels / leibs vnd seele / guts vnd ehre /
erlöse / vnd zu letzt / wann vnser stündlein kompt / ein seligs ende
beschere / vnd mit gnaden von diesem jammerthal zu sich neme
in den himel.

Amen.

Das ist / das ich sol gewis sein / solche bitt seyen dem vater im
himmel angenehm / vnd erhöret / dann er selbs hat vns geboten also
zu beten / vnd verhaissen / das er vns wöll erhören / Amen. **A-**
men / das haist Ja Ja / es sol also geschehen.

m ij. Von

Von der Tauff.

Ein ainige ganze Predig.

Johan. 3.

WEine liebe kindlein / Es spricht der Herr Christus im Euangelio / Es sey dan / das yemand new geboren werd aus dem wasser vnnnd gassit / so kan er in das reich Gottis nicht kommen. Nun sollen wir ja allen fleiss ankeren / das wir inn das reich Gottis kommen / dann der Herr spricht /

Matt. 6.

Sucht zum ersten das reich Gottis. Vnd er haist vns auch darumb bitten / vnnnd sprechen / Zu kome dein reich. Darumb ist vns hoch von nöten / das wir der newen geburt fleissig war nemen / dan ohn die selben können wir nicht in Gottis reich komen.

Ir solt aber nicht gedencken / meine liebe kindlein / wann wir von der newen geburt reden / das wir es also mainen / das ein mensch wiederumb in seiner mutter leib sol kriechen / vnd also noch ein mal geborn werden / wie er vor geborn ist / dann das were nerrisch zugeedencken / Sonder wir mainen ein gaisliche geburt / das ist / ein inwendige verenderung vnd vernewerung des gemüts durch den hailigen Gassit / also / das ein mensch ein gantz newen guten Christlichen synn gewinne / den er vor von natur nicht gehabt hat vnd solche newe geburt muss geschehen durch das wasser der tauffe / welche der heilig Paulus nennet ein bad der wiedergeburt / darumb das vns in der tauffe die sünd vergeben / vnnnd der hailig Gassit / als den lieben kindern Gottis / eingegossen wirdt / auff das wir also in der tauffe durch die würckung des heiligen Gassits widergeboren werden / vnd ein new wesen vnd leben vber komen / dar durch wir / wan wir anders darinn bestehn vnd bleiben / inn das reich Gottis kommen vnd ewigklich selig werden.

Darumb meine liebe kindlein / solt ihr mit allem fleiss warnemen ewrer tauffe / vnd fleissig lernen / was ir für grosse gaben vnd wolthat von dem Herrn Christo in der tauffe habt empfangen / auff das ihr im darumb dancket / euch selbs in aller not damit tröstet / vnnnd fleiss ankeret / das ihr im nachkomet / vnnnd thut alles / was ihr in der tauff bewilligt vnd zugesagt habt.

Auff das ihr aber das desterbas könt thun / so hört vnd lernet mit fleiss die wort des Herrn Christi / mit den er die tauffe beuollen vnd eingesetzt hat / vnnnd spricht mir die selbigen fein gemacht vnnnd

vnd haimlich nach / das ihrs mercken / vnnnd da haim auch sein nachsagen könt.

Das sein die wort des Herrn zu seinen Jüngern.

Gehet hin vnd leret alle völder / vnnnd taufft sie im namen des Vaters vnd des Sons / vnnnd des heiligen Geists / Wer da glaubt / vñ getaufft wurde der wirdt selig werden / Wer aber nicht glaubet / wirdt verdampt werden.

Mit diesen Worten hat vnser lieber Herr Christus die tauffe beuolhen vnd ein gesatzt / dardurch wir sollen zum reich Gottis new geborn werden.

Ihr solt aber allen fleiss ankeren / das ihr diese wort nicht allein sprechen könt / sonder auch das ihrs sein versteht / wie sie Christus der Herr gemaint hat / vnd wann man euch darumb fraget / das ihr könt antwort geben / vnd zu seiner zeit ewere kindlein auch leren / wie man euch ytzo leret / Dann es ist ein grosse schand vor Gott vnnnd der welt / wann sich yemand rümet / er sey ein Christ / darumb das er getaufft ist / vnnnd waiß noch nicht / was die tauff ist / oder bedeutet / so doch all vnser glaub vnd leben / sich nach der tauffe richten sol.

Wolan meine liebe kindlein / auff das ihr ja die tauffe recht vñ wol verstehen lernet / So solt ihr zum ersten fleissig mercken / das vns vnser lieber Herr Ihesus Christus / neben der predig des Euangelions / drey besondere vnd vnterschiedliche Sacrament / oder heylige bunds zeichen hat eingesetzt vnd verordnet / durch welche er mit vns in seinem namen lest handeln / auff das wir mögen festiglich glauben / vnd gewiß sein / das wir die seyen / den das Euangelion vermaint vnd geschickt ist / vnd das wir das alles gewißlich haben / daruon das Euangelion sagt. Das erst ist die tauffe / dardurch wir zum newen himelischen leben / new geborn / vnd in die Christenheit angenommen werden. Das ander ist der gewalt der schlüssel / dardurch wir von sünden / darein wir nach der tauffe fallen / wieder entbunden werden. Das dritt ist das heylig Abentmal des Herren / dardurch wir teglich gespeist / getröst / vnnnd im Euangelio gesterckt werden / auff das wir im newen leben auffwachsen vnd zu nemen / biss wir ein vollkommen man werden / der Eph. 4
da sey in der masse des vollkommen alters Christi.

Dann das solt ihr meine liebe kindlein wissen / das es gar nicht taug / wann einer das Euangelion gehört vnd glaubt hat / das er wolt dahin gehn / vnd sich lassen bedüncken / er were ein Christ /
m ij vnd

vnd hette auch teil an allem dem / das im Euangelio verkündigt wirt / Da kein solchs geduncken ist kein rechter glaub / kan auch in den grossen schweren ansechtungen nicht bestehn / Sonder er mus gewisse wort vnd werck Gottis haben / daran er glaub / vnnnd wisse das er ein Christ worden sey / das ist / er mus getaufft sein / Dann wer getaufft ist / der mag wol sprechen / Ich lass michs nicht beduncken / sonder ich waiss fürwar / das ich ein Christ worden bin / dann ich waiss das ich getaufft bin. Nun ist die tauff von Gott ein gesetzt / vnnnd der mich getaufft hat / der hat sein befehl von Gott gehabt. Darzu bezeuget der heylig gairt / Wer getaufft sey / der hab Christum angezogen / das ist dann ein rechter glaub / der wieder alle porten der helle bestehn kan / die weil er allenthalben Gottis wort vnd werck für sich hat / vn darff gar nichts auff sein eigen geduncken bawen. Vnnnd eben diese gestalt / hat es auch mit den schlüsseln / vnd mit dem abendmal des Herrn / wie ihr hernach hören werdt.

Weiter solt ihr nun auch fleissig lernen verstehn / meine liebe kindlein / warumb wir getaufft sein. Nun habt ihr aber vor gehört / das wir inn der tauffe new geborn werden / das geschicht nun darumb / das wir in der ersten geburt / da wir von vatter vnnnd von mutter geborn sein / alle mit einander in sünden geborn sein / vnnnd haben die sünd mit vns aus mutter leib gebracht / wie ihr vor in den zehen gebotten / sonderlich im letzten gebot / sein gelernet habt / Dann wie der Adam gesündigt hat / vnnnd durch die sünd verderbt worden ist / das er von ihm selbst nicht mehr from vnd gerecht werden kont / also sein auch seine kinder alle sündler geborn / vnnnd können von in selbst nicht from werden / sunder sein zum bösen genaigt zu aller zeit. Darumb spricht der heylig Paulus / Wir warn alle kinder des zorns von natur / das ist / Gott zürnt mit vns / von vnser sünden wegen / die vns von natur angeborn ist / Die weil wir aber getaufft sein / vnnnd durch die tauff new geborn / so ist vns die sünd vergeben / vnnnd der heilig Gairt eingegossen / der vns wieder from macht / vnd zum guten hilfft vnd treibet.

Darumb meine liebe kindlein / ist es nichts anders / wann sich ein mensch tauffen lest / dann das er bekennet / er sey ein sündler geborn / vnnnd die sünd sey sein herr / also / das er von im selbst nicht from werden könn / sonder Gott mus im darzu helfen / Darumb kompt er zu der tauff / vnd sucht bylff vnd rhat / Bittet zum ersten / das ihm Gott die sünd wöll vergeben / darnach das er im der sünd auch wöll abhelffen / wie ein artzt einem francken seiner franckheit abhilfft / dargegen mus er dann bewilligen / vnd zu sagen / das er der sünde mit all seinen krefftten widerstand thun / vnnnd gern leiden wöll

wöll/ alles das/ das im Gott zu leiden auff legt ja das er zu letzt
auch gar sterben wöll/auff das im nur geholffen werde/das er der
sünd abtom. Dann Gott vergibt vns die sünd durch den glauben
Aber durch leyden vnd sterben nimpt er sie hinweg / vnnnd tilget sie
aus. Wie Petrus zeuget vnd spricht / Wer am flaisch leidet / der ^{1. Petr. 4.}
hört auff von sünden. Vnd Paulus / Wer gestorben ist/ der ist ge- ^{Roma. 6.}
rechtfertigt von sünden.

Solche gedancken / vnd ein solchen synn / meine liebe kindlein/
müssen alle die haben / denen die empfangen tauff zu nutz kommen
sol/ Darumb weil jr alle getaufft seyt / so gedencet auch / das ihr
in solchem bekantnus vnd fürsatz bleibt / vnnnd bekennet Gott / das
ihr arme sündler seit / last euch das selbig laid sein / vnd bit ihn / das
er euch der sünde wöll abhelffen / Vnd wert nicht wieder böß / das
jr euch die sünd woll gefallen lest / vnd mutwilliglich sündiget / son-
der seit from / vnd leydet gern / was euch Gott zu leiden zu schickt /
Dann wann ihr das thut / so wirdt euch die tauff nutz sein / vnnnd
wirdt Gott alles an euch vollenden / was er in der tauff mit euch
angefangen hat.

Dargegen merckt nun auch mit fleis / meine liebe kindlein/
was Gott mit vns durch die tauff handel / dann die tauff ist nicht
allein ein schlechtes wasser / Sonder sie ist ein wasser in Gottis ge-
bot gefasset / vnd mit Gottis wort verbunden / darumb würckt sie
auch an vns / alles das darzu sie Gott hat eingesatzt. Dann vnser
Herr Christus spricht / Gehet hin vnd leret alle vöcker / vnd taufft
sie im namen des Vaters / vnd des Sons / vñ des heyligen Gaists
wie jr vor gehört habt / vnd vmb dieses beuelhs willen / würckt die
tauff krefftiglich an vns als ein werck Gottis / Dann wir werden
in Gottis namen getaufft / das ist dann eben als viel / als tauffet
vns Gott selbst. Darumb sollen wir nicht auffß wasser sehen/
sonder auff Gott / der die wasser tauff eingesetzt / vnd in seinem na-
men zu thun beuolhen hat / Dann er ist almechtig / vnd kan wol
durch die tauff außrichten / vnd in vns würcken alles das / darzu
ers hat eingesetzt / obs gleich vnser vernunft nicht begreiffet. Dar
vmb merckt mit fleis / was vns Gott der Herr wiederumb inn der
tauff für grosse güter vnd wolthat zusaget vnd mittailt.

Dann zum ersten / wirt vns in der tauff die sünd vergeben / wie
der heilig Petrus leret in geschichten am andern capit. vnd spricht /
Las sich ein yeder tauffen / auff vergebung der sünde.

Zum andern / wirt vns der heilig Gaist geben / der die liebe
Gottis in vnser hertzen geust / darmit wir dan Gottis gebot könnē
halten / wie

ten/ wie Petrus bezeugt/ vnd spricht/ in geschichten am andern/
Lasset euch tauffen/ so werth ihr empfangen die gab des heilige gaists.

Zum dritten/ wirt vns die gerechtigkeit Christi geschenckt/ vnd
gantz vnd gar zu aigen geben/ das wir vns der selben mögen an-
men vnd vns drein klaiden/ als hetten wirs selbst gethon/ wie Pau-
lus leret zun Galatern am dritten/ vnd spricht/ Wieviel ewer ge-
taufft sein/ die haben Christum angezogen.

Zum vierdten/ werden wir durch die tauff/ mit Christo zu glei-
chem tod begraben/ auff das wann wir leiden vnd sterben/ wie
Christus gelitten hat/ vnd gestorben ist/ das die sünd in vns dar-
durch vertrieben vnd ausgerentet werde/ dann wer sich tauffen
last/ der bewilligt/ das er mit Christo sterben wöll/ auff das er
von der sünd ledig werd/ vnd wen Gott tauffen lest/ dem sagt er
auch zu/ das er des leidens Christi sol tailhafftig werden/ das ist/
sein leiden sol heilig vnd nutz sein/ wie das leiden Christi/ vnd nicht
schedlich vnd verdamlich/ wie des Judas vnd anderer gotlosen
menschen leyden ist.

Was dem allen/ könt ihr nun/ meine liebe kindlein/ sein ver-
stehn vnd mercken/ warumb die tauff ein bad der wider geburt
haisst/ vnd wie wir in der tauff new geboren vnd gantz verendert
werden. Dann wer ein sündler ist/ der mus sich vor Gottis zorn/
vnd vor der ewigen verdambnus forchten/ vnd hat also weder frid
noch rhu in seinem gewissen. Wann im aber sein sünd inn der tauff
vergeben werden/ vnd er glaubets/ so wirt er durch den glauben
gerecht/ hat frid mit Gott/ vnd ist frölich vnd sicher/ das Gott
nicht mehr mit im zürnt/ vnd er vmb der sünden willen/ nicht mehr
verdampft muss werden/ Das ist aber ja ein grosse verenderung
vnd vernewerung des inwendigen menschen.

Roma. 5.

Johan. 8.

Roma. 7.

Des gleichen wer ein sündler ist/ der ist auch der sünde knecht/
vnd vnter die sünd verkaufft/ thut nicht das gut das er wil/ sonder
das böss das er nicht wil/ das thut er/ wie Paulus sagt/ vnd kan
im selbst nicht helffen/ noch sich der sünd erweren. Was im aber
der heylig Gaist in der tauff geben wirt/ so geust er die lieb inn sein
hertz/ darmit er Gottis gebot erfüllt/ macht in frey von der sünden
gewalt/ vnd hylfft im/ das er wider die sünd streiten/ vnd ihr wi-
derstand thun kan/ das ist dann auch ein seer grosse verenderung
vnd vernewerung des inwendigen menschen.

Dann das solt ihr/ meine liebe kindlein gewisslich wissen/ vnd
festig-

festiglich glauben / das keins jüden oder türcken kind / das nicht getaufft wirdt / den heyligen Geist hat / können auch Gottis wort nicht verstehn / noch from sein / Darumb solt ihr Gott von hertzen dancken / das er euch durch ewere eltern / zur tauff hat lassen bringē / Dann wann ihr an Christum glaubt / vñ sein wort gern hört / so ist es gewis / das ihr durch die tauff den heiligen Geist habt empfangen.

Weiter / wer ein sündler ist / ob er schon den heyligen Geist hat / der im wieder die sünd hylfft streitten / so wirt er dannoch ye zu zeiten vberwunden / vnd felt wieder in sünde / Vnd wann er gleich alweg den sieg behielte / so ist doch das ein grosser mangel / das er vn gern from ist / vnd im so sawer wirt / Darumb mus er immer dar fürchten / er werd sich der sünde nicht können erwerben / oder wann er sich schon erwere / so sey doch sein fromkeit zu schmal / vnnd zu vnuolkomen / das er darmit vor Gottis gericht nicht bestehen kan / wie dann in der warheit / vor Gottis gericht niemand mit seiner aigen gerechtigkeit besteht. Wann im aber in der tauff / die gerechtigkeit Christi zugerechnet / vnd geschenckt wirt / so kompt er dieser sorge aller ab / dann er wais / das er Christum hat angezogen / vnnd sein geprechlichkeit / mit der gerechtigkeit Christi zugedeckt / Darumb setzt er furo hin / sein vertrauen nicht auff seine fromkeit / sonder auff Christum allein / das ist aber ja auch ein grosse verenderung vnd vernewerung des inwendigen menschen.

Vnd zum letzten / Wer ein sündler ist / der forcht sich / vnnd ist vngedültig in allem leiden / dann wann das leiden daher felt / so gedencet er / Gott zürn mit im / vnnd wöl in vmb seiner sünd willen straffen / hie zeitlich / vnnd darnach dort ewiglich / darumb kan er imleiden / weder manlich noch gedültig sein. Wann er aber in der tauff / zu gleichem tod mit Christo begraben ist / vnnd hat das zusagen / das im kainerlay leiden sol schaden / als wenig es Christo geschadet hat / sonder sol im nutz / gut / vnnd dienstlich sein / zur außsrentung der sünde / vnd zum eingang in die ewigen herligkeit so wirt er gedültig / vnnd frölich im leyden / ja er rümbt sich auch des leidens. Das ist dann abermals ein grosse verenderung / vnnd vernewerung des inwendigen menschen. Vnd wann er also in diesem glauben verharrt / bis ans end / so wirt in Gott vom tod wieder auff wecken / vnnd vnsterblich machen / das er mit Christo ewiglich lebe / vnd alsdann so ist der mensch gantz vnnd gar new worden / an seel vnd leyb. Darumb nennet der Herr Christus im Euangelio / die auferstehung von todten / auch ein neue geburt. Das alles würckt die tauffe an vnns / wann wir nur glauben. Darumb hat Christus gesprochen / Wer glaubt vnd getaufft wirt / der
n wirdt

wirdt selig werden / Wer aber nicht glaubt / der wirdt verdampt
werden.

Darumb meine liebe kindlein merckt mit vleysß die frucht der
tauffe / Dann sie würckt vergebung der sünden / erlöset vom
todt vnd Teuffel / vnd gibt die ewigen seligkeit / allen die es glau-
ben / wie die wort vnd verhaiffung Gottis lauten.

Wann aber yemand wolt sprechen / Wie kan das wasser solche
grosse ding thun? So ist das die antwort / Das wasser thut
freylich nicht / sonder das wort Gottis / so mit / vnd bey dem was-
fer ist / vnd der glaube / der solchem wort Gottis trawet / Dann on
Gottis wort / ist das wasser schlecht wasser / vnd kein tauffe / aber
mit dem wort Gottis / ist es ein tauff / das ist ein gnadenreich was-
fer des lebens / vnd ein badt der newen geburt im heyligen gayst /
wie Sanct Paulus sagt zum Tito am dritten Capitel / Gott macht
vns selig durch das badt der wiedergeburt / vnnnd ernewerung des
hayligen gaysts / welchen er außgossen hat vber vns reichlich
durch Ihesum Christ vnsern hailand / auff das wir durch desselbi-
gen gnad gerechtfertigt / erben seien des ewigen lebens / nach der
hoffnung / das ist gewislich war.

Ihr solt euch auch fleissen / meine liebe kindlein / das ihr also le-
bet wie ihr in der tauffe habt zugesagt / vnd wie die tauffe bedentet.
Dan die tauffe bedent / das der alt Adam in vns durch tegliche reu
vnd buß sol erseufft werden / vnd sterben / mit allen sünden vnd bö-
sen lüsten / vnd wiederumb teglich heraus kommen / vnnnd auffer-
stehn ein newer mensch / der in gerechtigkeit vnd reinigkeit vor Got
ewiglich lebe / Wie der heilig Paulus zun Römern am sechsten an
zeygt / vnd spricht / Wir sein mit Christo durch die tauffe begraben
in tod / auff das gleich wie Christus ist von todten aufferweckt /
durch die herrligkeit des Vaters / also sollen auch wir inn einem
newen leben wandeln.

Vnd das ist die mainung vnnnd der recht ainfeltig verstandt der
hailigen tauffe / nemlich das wir vns für sündler erkennen / verge-
bung der sünd bitten / in allerley leiden / vnd in den tod bewilligen /
auff das wir der sünd ledig werden. Darumb sollen wir der sünd
feind sein / vnnnd darwider fechten. Gott aber vergibt vns die sünd /
gibt vns den heyligen gaist / schenckt vns die gerechtigkeit Christi /
vnnnd legt vnns das leiden Christi auff zu einer abtödtung des
alten

alten sundigens Adams/das sollen wir festiglich glauben / vnd gedultiglich leyden / so werden wir selig.

For Darumb meine liebe kindlein / merckts mit fleis / vnnnd wann man euch fraget.

Q Was ist die tauffe?

A So solt ihr also antworten.

Die tauffe ist nicht allein schlecht wasser / sonder sie ist das wasser in gottis gebot gefasset / vnd mit gottis wort verpunden / vñ das sein die wort Gottis / da vnser herr Christus spricht Mathei am letzten Gehet hin in alle welt / lert alle haiden / vnd tauffet sie in namen des vatters / vnnnd des sons / vnd des heiligen gaists.

Zum andern / wann man fragt / Was gibt oder nützt die tauffe? So solt ihr antworten. Sie würck vergebung der sunden / erlöset vom tod vnd teuffel / vnd gibt die ewige seligkeit allen die es glauben / wie die wort vnd verhaiffung Gottis lauten / vnd lauten nemlich also. Do vnser Herr Christus spricht Marci am letzten / Wer da glaubet / vnd getaufft wirdt / der wirdt selig. Wer aber nicht glaubt / der wirdt verdampft.

Zum dritten / so gefraget wirdt / Wie kan wasser solche grofse ding thun? Antwort. Wasser thut freilich nicht / sonder das Wort Gottis / so mit vnd bey dem wasser ist / vnnnd der glaube / so solchem wort trawet. Dann on Gottis Wort / ist das wasser schlecht wasser / vnd keine tauffe / aber mit dem wort Gottis ist eine tauffe / das ist ein gnadenreich wasser des lebens / vnd ein Pad der neuen geburt im heiligen gaist / Wie S. Paulus saget zu Tito am iij. cap. Durch das Pad der widergeburt vnd ernewerung des heiligen Gaists / welchen er ausgossen hat vber vns reichlich durch Ihesum Christum vnsern Hailand / auff das wir durch desselben gnad gerechtfertiget Erben seyen des ewigen lebens nach der hoffnung. Das ist gewislich war.

Zum vierdten / so man euch fraget / Was solch wasser tauffen bedeut? Antwort. Es bedeut das der alt Adam in vns durch tegliche rew vnd busse sol erschafft werden vnd sterben / mit allen sünden vnd bösen lüsten / vnd widerumb teglich heraus komen / vnd aufferstehen / ein newer mensch / der in gerechtigkeit vnd raimigkeit vor Gott ewiglich lebe / Als Paulus zun Römern am vi. capittel spricht / Wir sein sampt Christo durch die tauffe begraben in tod / das gleich wie Christus ist von den todten aufferweckt / durch die herrlichkeit des vaters / also sollen wir auch ihm ein neuen leben wandeln.

Vom Ampt der Schlüssel.

Ein ainige Predig.

Weine liebe kindlein / es spricht der heilig Paulus zun Römern / Wer den namen des Herrn wirdt anruffen / der soll selig werden. Roma. 10. Vnd fraget darnach weiter also / Wie sollen sie aber anruffen / an den sie nicht glauben? Wie sollen sie aber glauben / von dem sie nichts gehört haben? Wie sollen sie aber hören / on Prediger? Wie sollen sie aber predigen / wo sie nicht gesandt werden? Vnd zaiget vns in diesen worten sain klarlich an / das niemandt Gott warhafftiglich anruffen kan / er glaube dann an ihn / vnd / das niemandt festiglich an Gott glauben kan durch sein aigen gedancken / sonder man mus ihms predigen / oder er müsse es von ander leuten hören / Dann wir wissen von vns selbs nicht / was wir glauben sollen / Auch kan niemand fruchtbarlich predigen / er werde dann darzu beruffen vnnnd gesandt. Dann wo die predig sol frucht schaffen / da mus Gott der Herr durch seinen hailigen Geist mitwürcken / er würcket aber nichts durch die Prediger / die er zu predigen nicht hat verordnet. Darumb spricht Paulus / Wie können sie predigen / wann sie nicht gesandt werden.

Es ist auch die predig nichts nütz / wann wirs nicht glauben / Dann wer nicht glaubt / der wirdt verdampt werden. Nun können wir aber der predig nicht glauben geben / wir wissen dann / vnd seyen des gewis / das es Gott beuolhen hab / das man vns also predigen sol / wir müsten sonst zweiffeln / vnnnd also gedencken / wer wais / obs war ist / was dieser predigt / hat ihms doch vnser Herr Gott nicht gehaissen / Vnd wanns gleich war ist / wer wais / ob vnser herr Gott mit vns auch also thun wil / wie dieser predigt / oder nicht / er möcht vielleicht mit andern leuten also handeln / vnd mit vns gar nicht.

Solcher zweiffel wird vns alle anfechten inn der zeit der nott / wann wir nicht gewis wüsten / das vnser lieber Herr Ihesus Christus / Diener vnd Ambtleut / die vns sein wort predigen / vnd die heiligen Sacrament raichen / selbs hat eingesetzt / vnnnd ihn befehl geben / was sie vns von seinet wegen sagen / vnd wie sie mit vns handeln solten. Darumb hat er sie beruffen vnnnd aussgesandt / vnd vns darzu ein herrlichs zusagen gethon / Nemlich / Matth. 16. was sie binden auff erden / das sol auch im himel gepunden sein / Vnnnd was sie aufflösen auff erden / das sol auch im himel auff
n ij gelöst

gelöset sein / auff das wir festiglich können glauben / das es war
sey / was sie vns predigen / vnd vns auch also geschehen werd /
wie sie vns aus Gottes befelch zusagen / wann wir nur glauben.

Auff das ihr nun / alles das / das euch Gott durch seine diener
lest zusagen / festiglich könnt glauben / vnd durch den glauben selig
werden / So lernet mit allem fleis / meine liebe kindlein / die wort
vnsern Herrn Ihesu Christi / mit welchen er seinen dienern solchen
befelch geben hat / vnd sprecht mir dieselbigen fein gemacht vnd
haimlich nach / das ihrs mercken / vnd dahaim auch fein nachsa-
gen könnt / dann sie lauten also.

Johan 20.

Der Herr Ihesus blies seine Jünger an / vnd
sprach zu ihu / Nembt hin den heiligen Geist / wel-
chen jr die sund vergebt / den sein sie vergeben / vnd
welchen ihr sie behaltet / den sein sie behalten.

Ihr solt aber auch allen fleis ankeren / meine liebe kindlein /
das ihr diese wort nicht allein sprechen könnt / sonder das ihrs auch
versteht / wie sie vnser lieber Herr Christus gemaint hat / vnd
wann man euch darumb fraget das ihr könnt antwort geben / vnd
zu seiner zeit ewere kindlein auch lehren / wie man ytzo euch lehret.
Dann es ist eine grosse schand vor Gott vnd der welt / wann sich
einer für ein Christen dargibt / vnd wais doch nicht / wo oder wie
Christus ihm den glauben / vnd vergebung der sund hat haissen
predigen / so doch ein Christ nichts glauben sol / er sey dann ge-
wis / das es von Gott her kompt.

Marc. 7.
Luce 6.
Luce 10.

Auff das ihr aber meine liebe kindlein / diese wort Christi /
recht vnd wol verstehn lernet / so solt ihr zum ersten mercken / das
vnser lieber Herr Ihesus Christus / da er anfieng zu predigen /
sein zwölff Apostel erwelet vnd beruffen hat / Darnach sendet er
noch andere sibentzig aus / vnd gab in gewalt das Euangelion zu
predigen / Vnd als er durch sein leiden / von dieser welt wolt schat-
den / hat er Gott den himlischen Vater für sie gebeten / vnd für alle
die / so durch jr wort vnd predig glauben wurden / wie Johannes
am sibendtzehenden capitel schreibet. Nun darffs keins zweiffels /
was Christus vnser Herr gebeten hat / das hat er von seinem him-
lischen vater erlangt / Darumb sein alle die selig worden / die da
glaubt haben / was seine iünger predigten / eben als wol / als bet-
ten sie den Herren Christum selbst hören predigen / vnd ihm ge-
glaubet.

Darnach haben die Apostel / andern frommen heyligen leuten
solchs predig ampt auch mit getailt vnd befohlen / sonderlich an
den orten / da schon Christen warn / vnd prediger bedorfften / vnd
doch die Apostel selbs bey inen nicht bleiben konten / dann sie mu-
sten

sten immer weiter ziehen / vnd an andern orten auch predigen. Wo sie nun fromme heylige leut funden / die zum predig ampt tüglich warn / den selbigen legten sie die hend auff / vnd taileten in den heiligen Gaist mit / wie sie in von Christo zu solchem ampt auch hetten empfangen / die selbigen warn dann auch rechte ordenliche beruffene prediger / gleich so wol als die Apostel selbst / wie das alles der heilig Paulus in den episteln / zum Timotheo klerlich anzeigt / Vnd ist also das predig ampt / das Christus vnser Herr selbs angefangen / eingesetzt / vnd verordnet hat / immer von einem auff den andern komen / durch das aufflegen der hend / vñ mittailen des heiligen Gaists, biss auff dise stund / vnd das ist auch die rechte weyhe / darmit man die priester weyhen sol / vñnd alweg geweyhet hat vnd sol noch also bleiben / dann das / was man sonst für andere Ceremonien darbey hat getrieben / die sein on not von menschen erfunden / vnd hinzu gesetzt worden / Darumb meine liebe kindlein / solt ihr die ordenlichen prediger / vnd kirchen diener / die zu irem ampt also beruffen sein / nicht für schlechte leut halten / so viel ir ampt antrifft / sonder für diener vñnd poten vnser Herr Ihesu Christi / Dann er spricht im Euangelio zu in / *Luce 10s* Wer euch höret / der höret mich / Vnd wer euch veracht / der verachtet mich.

Was euch nun solche diener vnd amptleut aus dem münd / vñ befelh Christi vnser Herr sagen / das solt ihr glauben / vnd was sie mit euch handeln / als wann sie tauffen / sünd vergeben / oder den leib vnd das blut Christi aus tailen / das solt ihr eben an nemen als wann es Christus der Herr selbs saget / vnd thete / dann er hat sie es gehaissen / das sie es in seinem namen thun sollen / vñnd er ist haimlich vnd vn sichtbarlich auch darbey / vñnd würckt durch den heiligen gaist / dz es vns alles zu vnser seel hail krefftiglich dienet.

Dargegen aber solt ir euch hüten vor den falschen winckel predigern / die haimlich vmbher schleichen / vnd predigen / so sie doch das predig ampt nicht empfangen haben / vnd nicht ordenlich dar zu beruffen sein / dann bey den selbigen ist Christus nicht / darumb würckt auch der heilig gaist durch ihr predig nichts / sonder sie bleibet on frucht / ja sie thut nur schaden / dann es kan nicht feelen / wer vnberuffen predigt / der mus irr werden / vñnd irthumb predigen.

Ir solt aber auch darumb nicht gedenccken / meine liebe kindlein / das die beruffnen prediger macht haben zu thun / vnd zu leren was sie wöllen / sonder vnser lieber Herr Jesus Christus hat es in sein befolhen / was sie leren / vnd was sie thun sollen. Vnd was sie anderst predigen / oder anderst thun / dan er in befolhen hat / so hat es kein krafft / vnd wir sollen vns nichts dran keren / Vnd darumb hat er ihn auch den heiligen gaist eingeblasen / dann wo der heilig
n iij Gaist

gaist ist/ da schaffet er / das man thue / was Christus befolhen
hat wo man aber dasselbig nicht thut / da ist auch der heilig gaist
nicht darbey / darumb gilts auch nichts.

Er hat in aber befolhen zu predigen / buss vnd vergebung der
sünden in seinem namen / vnd hat gesprochen / Wer glaubet vnd ge
taufft wirt / der wirt selig werden / wer aber nicht glaubet / der
wirdt verdampt werden / Darumb sol alles was sie predigen vnd
thun / dahin gericht sein / das sie vns vergebung der sünde verkün
digen / wann wir buss thun / vnd an Christum glauben / Wann
wir aber nicht buss thun / vnd von sünden nicht ablassen / oder dem
Euangelio nicht glauben wolten / so sollen sie vns die sünde vorbe
halten / vnd verkündigen / wann wir also verharren / das wir müs
sen verdampt sein / wann sie nun dem also thun / so thun sie recht /
vnnnd weim sie die sünd vergeben / dem sein sie vergeben / vnnnd
weim sie die sünd vor behalten / dem sein sie vorbehalten. Wann sie
es aber wolten vmbkeren / vnnnd den vnbusfertigen oder den vn
glaubigen die sünd vergeben / oder den busfertigen vnd glaubigen
die sünd vorbehalten / so theten sie vnrecht / vnnnd het kein krafft /
sonder sie verführeten sich selbst vnd ander leut mit inen / vnnnd wurd
zu letzt eben gehn / wie Christus saget / Wann ain blinder den an
dern führet / so fallen sie beide in die gruben.

Darumb meine liebe kindlein / solt ihr euch des trösten / vnnnd
erwren glauben damit stercken / das ir sprechen könt / Gott der Herr
der hat mir seiner diener ain geschickt / der mir hat vergebung der
sünd in seinem namen gepredigt / vnd hat mich zur vergebung der
sünd getaufft / darumb bin ich gewiss / das mir meine sünd verge
ben sein / vnd ich ein kindt Gottis bin worden.

Eccle. 4. Vnd also / solt ir meine liebe kindlein / in gemain von dem ampt
der kirchē diener halten / In sonderhait aber solt ihr wissen / das vn
ser lieber Herr Christus mit diesen worten den armen betrübten ge
wissen hat wöllen rhaten vñ helffen / die nach der tauß widerumb
in grosse schwere sünd fallen / dann es ist nicht so ein schlecht ding /
von sünden wieder auffstehn / als die tolle vnd blinde welt maint /
sonder es bedarff / das vns ein beruffner diener der kirchen / mit
Gottis wort zu hilff komme / wie Salomon anzaigt / vnd spricht /
Wehe dem menschen der allain ist / dann wann er felt / so hat er
niemandt der im auff hilfft. Vnnnd darumb hat vnser lieber Herr
Christus die schlüssel zum himelreych so fleysig / vnnnd mit solchen
herlichen worten verhaissen verordnet / vnnnd eingesetzt / das man
wol spürt / das im ernst gewest ist / daraus dann gut abzunemen
ist / das wir ir wol bedörffen / vnnnd vns viel daran gelegen ist.

Dann zum ersten verhaist er sie / das er sie geben wölle / vnnnd
spricht zu Petro / Dir will ich die schlüssel des himelreichs geben /
Alles

Alles was du auff erden binden wirst / sol auch im himel gebun- ^{Matt. 18}
den sein / vnd alles was du auff erden lösen wirst / das sol auch im
himmel lofs sein.

Zum andern leeret er / wie man sie gebrauchen sol / bayde / in
offentlichen vnd haymlichen sünden / In den offentlichen also /
Sündiget dein bruder wieder dich / so gehe hyn / vnd straff in zwis-
schen dir vnd im allain / höret er dich / so hastu dein bruder gewon-
nen / Höret er dich nicht / so nym noch ain oder zween zu dir / auff
das alle sach bestehe auff zwayer oder dreyer zeugen munde / Hö-
ret er dich nicht / so sage es der gemaine / höret er die gemain nicht /
so halt in als ein Dauiden vnd Zölner. Warlich was ihr auff erden
binden werdet / sol auch im himel gebunden sein / Vnd was ir auff
erden lösen werdet / das sol auch im himel lofs sein.

In haymlichen sünden aber / zaigt er vnns mit der that / wie
man sie brauchen sol / Als da er dem gichtbrüchigen / der da hilff ^{Marc. 2}
begeret / also saget / Mein son / dein sund sein dir vergeben. Vnd da ^{Luce 5}
er zu den verstockten Juden sprach / Wert ihr blind / so hettend ihr ^{Johan. 9}
kain sünd / Nun jr aber sprecht / wir sehen / so bleibt ewr sünd / das
ist / sie wirdt euch nicht vergeben.

Zum dritten / so gibet er auch die schlüssel nach seiner auffstie-
hung wie er vor hin zugesagt hat / das er bliess seine jünger an / vnd
sprach / Nempt hin den heyligen gaist / welchen ihr die sünd ver-
gebt / den sein sie vergeben. Die weil dann Christus die schlüssel
zum himel so tröstlich zugesagt / vnd iren brauch so fleissig gelert /
vnd sie zu letzt so trewlich vnd ordenlich geben / befolhen / vnd ein-
gesetzt hat / so sollen wirs in kainen weg verachten / sonder mit al-
ler danckbarkeit annemen / vnd ihr gebrauchen.

Dann das solt ir wissen / meine liebe kindlein / das es gar nicks
tes tang / wann yemand nach der tauff / wieder in grosse vnd schwe-
re sünd fellet / das ers wolt verachten / vnd also dahin gehn / vnd
sich lassen bedüncken / es wer im vergeben / Dann ein solcher loser
dunckel / ist viel zu schwach darzu / das er des teufls anfechtung
inn todts nöten solt widerstand thun / sonder man mus Gottis
wort vnd werck haben / die da anzaigen vnd bezeugen / das vns die
sünd vergeben sey / das ist man sol vergebung der sünd suchen vnd
holen bey den dienern der Kirchen / welchen Christus die schlüssel
geben / vnd zugesagt hat / Wem sie die sünd auff erden vergeben /
dem sollen sie auch im himel vergeben sein.

Des gleichen tang es noch viel weniger / wann yemand inn
offent

offentlichen sünden verharret / gedecht sich nicht zu bessern / vnd
wolt dennoch ein Christ sein / vnd mit den andern / zu gemainen
Sacramenten / Gebeten / vnd Gottis diensten gehen / sonder man
sol ihn vermanen / vnd wann ers nicht höret / sol man in ausschlies-
sen / vnd in Bann thun / so lang bis er sich bessert / lauff das nicht
das öffentlich böse exempel / ergernis bring / vnd viel leut ver-
gift / vnd darnach die Christlich kirch / dardurch veracht / ver-
schmecht / vnd verlestert werde / als seyen es schentliche böse leut /
die ein sündig Gottlos leben führen / dardurch dann auch Gottis
wort / vnd Gott selbs / bey den vngläubigen / veracht vnd verles-
tert wurde.

Wiewol nun solche feine / heilsame / Göttliche ordnung / die
offentlichen / ergerlichen sund zu straffen / gantz vnd gar zerrüt /
verwüst / vnd vnter gedruckt ist / so sollen wir doch darumb den ge-
walt vnd brauch der schlüssel nicht verachten / vnd hinwerffen /
Dann die solche vnordnung angericht haben / vnd noch heuttigs
tags hindern / das es nicht gebessert wirdt / die werden ihren Rich-
ter wol finden / das darff kain zweiffels. Wir aber wollen Gott
bitten / das er vns diese vnd andere gute ordnung / die er selbs ge-
macht hat / wöll wider geben / wie er vns auch sein wort wider ge-
ben hat / so wurd er vns gewislich erhören vnd geweren.

Wann nun yemand nach der tauff schwerlich gesündigt hat /
vnd es sichtet ihn in seinem gewissen an / das er zweiffelt / ob er inn
Gottis gnaden oder vngnaden sey / wie dann gemainlich ge-
schicht / so sol er nicht auff seine blosser gedancken trawen / das er
wolt gedencken / *Es* ich wil mich lassen gedüncken / es sey mir ver-
geben / dann solchs gedüncken ist kein rechter glaube / vnd kan
auch in der anfechtung nicht bestehn / dann der glaub mus alle-
weg Gottis wort vnd werck haben / darauff er gründe. Nun redet
aber Gott nicht mit vns vom himel herab / sonder er hat die schlus-
sel zum himel / vnd den gewalt die sünde zu vergeben / den dienern
der Kirchen gelassen / vnd beuolhen / darumb sol er zu derselben an-
nem gehn / vnd sein sund vnd anligen bekennen vnd klagen / vnd ja
bitten / das er nach dem befelh Christi / ihm vergebung seiner sund
verkündigen wöll.

Wann das geschicht / so soll er frölich vnd tröstlich glauben /
das ihm sein sund warlich / auch im himel vergeben sein. Vnd ein
solcher glaub / kan in aller anfechtung bestehn / dann er hat Got-
tis wort vnd werck allenthalben für sich / Dann er wais ja / das
im der diener sein sund hat vergeben / vnd wais / das er dasselbig zu
thun von Gott befelh hat. Er wais auch / das Gott zugesagt hat /
wem sie die sünde vergeben auff erden / dem sollen sie auch verge-
ben sein im himel.

Dar

Darumb / meine liebe kindlein / folget dieser leer / vnnnd wann
euch ewre sünd anfechten / so sucht vnd holet vergebung der sünd
bey denen / die von Christo befelch haben / das sie den leuten ihre
sünd vergeben sollen / so könt ihr fried vnnnd rhu in ewern gewissen
haben. Wer aber das nicht thun / sonder mutwilliglich verachten
wil / der wirt vergebung der sünd nicht finden an den ortten / da sie
Gott nicht hin gelegt vnd zu gesagt hat / darumb verachtets nicht /
dann es ist Gottis befelch vnd ordnung / vnd der hailig gaist ist dar-
bey / vnd würckt on zweiffel mit / das es vns zur seligkeit dienlich
sey.

Vnd das ist die mainung vnd der ainseltig recht verstand dieser
wort Christi / das wir glauben / was die beruffnen diener Christi
aus seinem Göttlichen befelch mit vns handeln / sonderlich wann
sie die öffentlichen vnbusfertigen sündler / von der Christlichen ge-
main ausschliessen / vnd die / so ihr sünd berewen / vnd sich bessern
wöllen / wieder entbinden / das es alles so krefftig vnd gewiss sey /
auch im himel / als handelte es vnser lieber herr Christus selbst.

Darumb meine liebe kindlein merckts mit fleiss / vnnnd wann
man euch fragt

Wie versteht ir diese wort.

So solt ihr also antworten.

Ich glaub / was die beruffnen diener Christi / aus seinem göt-
lichen befelch mit vns handeln / sonderlich wann sie die öffentlichen
vnbusfertigen sündler / von der Christlichen gemain ausschliessen /
vnd die / so ihr sünd berewen / vnd sich bessern wöllen / wieder ent-
binden / das es alles so krefftig vnd gewiss sey / auch im himel / als
handelte es vnser lieber herr Christus selbst.

Also habt ihr meine liebe kindlein / den grund vnd vrsprung des
gantzen predig ampts / vnnnd der schlüssel des himelreichs / wie sie
vnser lieber herr Christus geordnet / eingesetzt / vnd versichert hat /
auff das wir gewiss seyn könten / das wir vergebung der sünde / vff
alles was das heylig Euangelion mit sich brenget / haben / so off-
wirs bedürffen / Vnnnd also im glauben gegen Gott / fest mögen
stehn / vnd verharren bis ans ende. Wer aber verharret biss ans en-
de / der wirt selig. Das verleyhe vns Gott allen / Amen.

Dom

Vom Abendmal.

Ein ainige Predig.

Johan. 15.

WEine liebe kindlein / Es spricht vnser lieber Herr Christus im Euangelio / Ich bin ein rechter weinstock / vnd mein Vatter ein weingartner / Ein yeglichen reben an mir / der nicht frucht bringt / wirt er abschneiden / vnd ein yeglichen der da frucht bringt / wirt er rainigen / das er mehr frucht bring. Ich bin der weinstock / vnd ihr seid die reben / Wer in mir bleibt / vnd ich in jm / der bringt viel frucht, dann ohn mich könt jr nichts thun. Vnd in diesen Worten leret er vns sein / wie wir sollen from vnd selig werden / dann gleich wie ein rebe nicht frucht tregt sie bleib dann am weinstock / also können wir auch nicht from sein / wir bleiben dann in Christo. Vnd gleich wie die rebe nicht grunet / sonder verdorret / vnd wirt ins feuer geworffen / wann sie vom weinstock abgesehritten ist / Also könten wir auch nicht selig werden / sonder müsten verdampft sein / wann wir von Christo dem Herren abfielen.

Nun habt ihr vor gehört / meine liebe kindlein / wie wir durch die tauffe / in den Herrn Christum eingepflantz vnnd eingeleibt werden / das wir in jm vergebung der sünd haben / vnd sein in ihm wie die reben an einem weinstock. Vnd wie die reben safft vnnd krafft von dem weinstock empfaben / das sie frucht tragen / also empfaben auch wir / die wir in Christum glauben / vnnd getaufft sein / den heiligen gaisst von jm / das wir from werden.

Vnd ob wir durch sünd vnd vnglauben / wieder von Christo abfielen / oder durch offentliche laster von der Christlichen gemain abgesondert / vñ außgeschlossen würden / so habt ihr auch sein gehört / wie man durch den brauch der schlüssel / oder durch die absolution / wieder angenommen vnnd eingeleibt wirdt / Dann sollen wir from sein / vnd selig werden / so müssen wir ye inn den Herrn Christum eingepflantz sein / vnd in ihm bleiben.

Darumb volget nun auch billich die leer / darin wir lernen / wann wir in Christo sein / wie wir vns sollen halten / das wir in ihm bleiben / vnnd zunemen / Vnd das ist die einsetzung vnd der gebrauch

brauch des heyligen Abendmals vnsern Herrn Ihesu Christi/
Dann durch die tauffe werden wir new geboren / Durch die bus
vnd schlüssel/ oder entbindung/ werden wir wieder auffgericht/
wann wir nach der tauff widerumb in sünd sein gefallen / Vnd
durch das heylig Abentmal werden wir erhalten / vnd gesterckt/
wann wir stehn/ vñ wieder die sünde/ vñ des teuffels reich fechten.

Darumb meine liebe kindlein/ dieweil ihr durch die tauffe inn
Christum seit eingepflantz/ auff das ihr in ihm möcht bestendig
bleiben/ so lernet ytzo mit allem fleiss/ die wort / damit der Herr
Christus sein heyliges Abentmal hat eingesetzt / vñnd sprecht mir
die selbigen sein gemacht vnd hämlich nach/ das irs mercken, vnd
dahaim auch sein nachsagen kont.

Dann die wort lauten also.

Der Herr Ihesus / in der nacht / do er verrä
ten ward/ nam er das brot/ dancket vñnd brachs/
vnd gabs seinen jungern/ vnd sprach / Nempt hin
vnd esset / das ist mein leib / der fur euch gegeben
wirt/ solchs thut zu meinem gedechtnus.

Desselben gleichen nam er auch den felch nach
dem Abentmal / vnd dancket vñnd gab ihn den/
vnd sprach / Trincket alle daraus / das ist mein
blut/ des newen testamentis/ welchs fur euch vnd
fur viel vergossen wirdt / zur vergebung der sun
den. Solchs thut/so offft irs trincket / zu meinem
gedechtnus.

Ir solt aber auch allen fleiss ankeren/ meine liebe kindlein/ das
ihr diese wort des Herrn nicht allein sprechen kont / sonder auch
das irs sein versteht/ wie sie der Herr Christus gemaint hat/ vnd
wann man euch darumb fraget/ das ihr kont antwort geben/ vnd
zu seiner zeit ewre kindlein auch leren / wie man yetzo euch leret/
dann es ist ein grosse schand vor Gott vnd der welt/ wann sich ein
mensch für ein Christen dargibt/ vnd bräucht alle Christliche Sa
crament/ vnd waifs doch nicht/ was sie sein/ oder warzu sie auff
gesetzt sein. Dan der heilig Paulus spricht/ Wer vnwürdiglich ^{i. Cor. 11}
isst vnd trincket der ist vnd trincket im das gericht.

Wolan/ meine liebe kindlein/ auff das ihr die wort des abent
o mals

mals ja recht vnd wol verstehen lernet / vnd es nicht vnwürdiglich zum gericht empfabet / so merckt mit fleis / das der recht verstandt / vnd brauch / des Abendmals des Herrn / in zweyen stucken steht / nemlich / das wir thun / was er vns hausst / vnd darnach glauben / was er vns sagt / das solt ihr fein ordentlich hören / vnd mit fleis mercken.

Dann zum ersten / Nimbt der Herr Ihesus das brot inn die hand / danckt / vnd brichts / vnd gibts seinen jungern / vnd spricht Nempt hin vnd esset / Des gleichen auch den kelch / vnd spricht / Trinckt alle daraus etc. Darumb sollen wir diesen worten gehorsam sein / vnd thun was vns der Herr Christus hausst / vnd befihet. Dann wiewol vns Christus der Herr kein zeyt stimpt / wann wir zu seinem heiligē abendmal sollen gehn / auch kein zal setzt / wie oft wir das im jar thun sollē. So ist es doch sein heiliger göttlicher wil / das wirs ettlich mal thun sollen. Es ist auch vnser nutz / das wirs thun / dann sonst het ers vns gewisslich nicht gehaussen / das er wais bas was wir für trost vnd hilff bedorffen / dann wir selbst Darumb wollen wir recht seine jünger sein / so sollen wir thun / wie er seinen jüngern befihet / das ist / wir sollen hinzü gehn / vnd essen vnd trincken / vnd nicht ohn redliche ursach / allzu lang davon bleiben.

Roma. 7.

Zum andern / Spricht er vom brot / das ist mein leib / vnd vom kelch / das ist mein blut / Darumb sollen wir glauben / das es warlich sein leib / vnd sein blut sey / dann Gott ist almechtig / wie jr im glauben gelernet habt / Darumb kan er alles thun / was er wil / vnd er rufft oder nennet ein ding / das nicht ist / auff das es sey / wie Paulus saget / das ist / Wann er ein ding nennet / das vor nicht war / so wirt es also bald / wie ers nennet / Darumb wann er das brot nimbt / vnd spricht es sey sein leib / so ist es gewisslich also bald sein leyb / Vnd wann er den kelch mit dem wein nimbt / vnd spricht Es sey sein blut / so ist es gewisslich also bald sein blut. Das sein wir schuldig zu glauben / wollen wir ander st recht Christen sein.

Vnd ob wol in diesen / gefarlichen zeytē / ettliche irrige leut / hin vnd wieder gefunden werden / die da aus lauter mutwillen nicht bekennen wollen / das es der leib vnd das blut Christi sey / allein darumb das sie mit irer blinden vernunfft nicht begreifen können wie es zu gebe: So solt doch jr euch mit allem fleis hüten / das ihr jnen nicht gleich werd / vnd euch nicht verführen last / Dann solche leut sein gewisslich nicht Christen / vnd haben noch nie gelernet den ersten artickel des glaubens / nemlich / das Gott almechtig sey welchen doch ihr meine liebe kindlein wol wist. Darumb hütet euch vor jrem irthumb / vnd glaubet was der Herr Christus

stus sagt/ obs gleich ewer vernunfft nicht begreiffen kan. Dann wir sollen alle vernunfft gefangen nemen / vnter den gehorsam Christi/ wie es der heylig Paulus leret.

Zum dritten spricht er/ Sein leib sey für vns gegeben/ vnd sein blut zur vergebung der sünden vergossen. Das sollen wir auch glauben vnd bekennen/ das wir alle in sünden empfangen vnd geboren seien / wie wir dann in den zehen gebotten / sonderlich in den letzten zwaien/ sein gelernet haben/ Darumb sein wir auch kinder des zorns von natur / vnd müsten verdampt sein / wann vns Christus durch sein heiliges leyden nicht erlöset hett / Dann er ist für vns mensch worden/ vnd hat alles das gethon für vns das wir zu thun schuldig waren/ vnd kontens nicht/ Das ist / er hat das gesetz für vns erfüllt/ vnd hat alles das für vns gelitten / das wir mit vnsern sünden verdient hetten/ Vnd hat sein blut für vns vergossen auff das vns die sünd vergeben würd. Das alles sollen wir festiglich glauben. Darumb irren sich die menschen greulich / die für ihr sünd selbst wollen genug thun / mit fasten / betten/ almusen/ vnd andern der gleichen guten wercken. Dann wiewol man solche gute werck thun sol/ so seyn sie doch nicht genug vnser sünd zu bezahlen / sonder das leiden vnd blutuergießen Christi hat genug für vnser sünd gethon/ vnd vergebung erlanget / wie Johannes saget/ ^{1. Johan. 2.} Er ist die versöhnung für vnser sünd / vnd nicht allein für die vnsern sonder auch für der gantzen welt.

Zum vierdten/ spricht er/ Solchs thut zu meinem gedechtnus dem sollen wir nun auch gehorsam sein/ vnd sollen thun eben das das er vns zu thun beuolhen hat Darumb meine liebe kindlein/ soltet jr nicht zweiffeln/ es ist warlich der leib / vnd das blut Christi vnser Herr / das wir im Abendmal empfangen / dan er hats selbst gesagt / vnd durch sein wort also gemacht. Darumb die weil er spricht / wir sollen eben solchs auch thun / so oft wirs thun / so ist gewiss / das ers noch alweg macht das es sein leib vnd blut sey wie zum ersten mal/ sonst konten wir nicht eben dasselb thun / das seine junger gethon haben / Er hat vnns aber geboten wir sollen eben solchs thun / das ist / auch sein leib vnd sein blut nemen / wie er selbst gegeben hat Vnd last euch der vnglaubigen / nerrische red nicht anfechten / die da sprechen / wie könt der diener / den leib vnd das blut Christi machen. Dann es machts ja nicht der diener / sonder Christus selbst gibt vns sein flaisch vnd blut / wie sein wort klarlich aufweist.

Jr solt euch auch nicht an die keren / die da sagen / man sol nicht baiderley gestalt empfaben / sonder nur einerley / Dann Christus hat allen seinen jungern baiderley gestalt geben / vnd hat beuolhen wir sollen solchs auch thun / Ja er hat mit besondern worten geboten / wir sollen alle aus dem kelch trincken. Nun sol man ye
o ff Gott

Gott mehr gehorsam seyn / dann den menschen / Darumb sollen wirs auch empfangen in baiderlay gestalt / wie er befolhen hat / Unangesehen / das etlich viel schwatzen / es sey die seligkeit nicht daran gelegen / dann wan gleich nichts vberal daran lege / so ist doch löblich vnd gut / das man thu / was Christus beuolhen hat.

Des gleichen sollen wirs thun / zu seiner gedechtnus / das ist / wie der heylig Paulus sagt / Wir sollen seinen tod verkündigen / so lang bis er kompt / dann er wirdt ja widerkommen / zu richten die lebendigen vnd die todten / wie jr im glauben gehört habt. Mittler zeit sol man immer gedencken vnd predigen von seinem tod / Nämlich das er vns mit seinem tod vnd blutuergiessen / vergebung der sünd erworben habe / auff das mans ya nicht vergesse / vnd vergebung der sünd nicht inn ander weg wölle suchen / dann durch den glauben an Christum.

Wann wir nun seins todts gedencken / vnd verkündigen / das er vns dardurch erlöset hab / so sollen wir auch fleissig bedencken / das er nicht für vns allein gestorben ist / sonder für alle glaubige menschen. Darumb weyl er sie also geliebt / hat / das er für sie gestorben ist / so sollen wir sie auch lieb haben / vmb seinen willen / Dann Christus spricht / darbey wirt yderman erkennen / das jr meine jüngern seyd / wasi ihr euch vnter einander lieb habt / das ist / das Paulus spricht / Wir alle sein ein leyb / vnd ein brot / die wir alle eins brots teilhafftig werden.

So offit jr nun / meine liebe kindlein / zum abendmal des Herrn wolt gehn / wann jr nun verstendig / vñ geschickt darzu werdt / so thut / wie der heilig Paulus leret / der spricht also / Der mensch aber brüfe sich selbs / vnd also esse er von diesem brodt / vnd trinck von diesem kelch / Dann wer vnwürdig isset / vnd drincket / der isset vnd trinck im selbs das gericht / darmit / das er nicht vnderschidet den leyb des Herrn.

Wann ihr euch aber recht brüfet / so werd ihr finden / das ihr sündler seid / vnd wol bedörfft / das Christus sein leyb für euch geben / vnd sein blüt für ewer sünd vergossen hab / das ist dann recht geprüfet. Dann Paulus spricht / Wann wir vns selbst nicht richten / oder vrtailen / so werden wir von dem Herrn gericht / doch allein darumb / das wir nicht verdampt werden / Dann wer sein sünd nicht erkennen wil / den richtet vnd straffet Gott / mit mancherley plagen / so lang / bis ers zu letzt bekennen / vnd berewen mus das sie im werden vergeben.

Ihr solt euch auch prüfen/ ob ihr mögt thun/ was euch Christus haist/ vnd glauben/ was er sagt/ Des gleichen ob ihr ewerm nechsten mögt vergeben/ was er wieder euch gethon hat/ vnd in vmb Christus willen lieb haben/ dann wann ihr das thut/ so empfabet ihrs würdiglich.

Wer es nun also empfabet/ der empfabet es zum ewigen leben dann er empfabet nicht allein den leib/ vnd das blut in seinen munde/ vnd leib/ sonder er glaubt auch dem wort Christi/ das der leib Christi für ihn geben/ vnd sein blut zur vergebung seiner sünden vergossen worden sey/ Wer aber also glaubt/ der isset vnd trinckt den leib/ vnd das blut Christi auch gaisstlich. Vnd darnon hat Christus gesagt/ Wer mein flaisch isset/ vnd mein blut trinckt/ der bleybet in mir/ vnd ich in im. Wann wir nun durch den glauben inn Christo sein/ so mögen wir das abendmal prauchen/ so oft wir wollen/ vnd also für vnd für/ ye lenger ye mer getröst/ vnd gestercket werden/ das Christus vnser sünd bezalt hab/ vnd in vns sey vñ bleib/ vnd wir in im. Johan. 6.

Dann dieweil wir durch die tauff in Christum gepflantzet sein/ vnd in im bleiben/ wachssen/ zu nemen/ vnd im gleich werden sollen/ so tang es nicht/ das wir vns schlecht wolten duncken lassen/ wir stunden fest/ vnd nemen im glauben/ vnd in der lieb zu/ sonder wir sollen da auch Gottis wort vnd werck haben/ darauff wir vertrauen/ vnd darbey mercken/ das wir also zu nemen/ das wirdt vns aber im abendmal fürgetragen. Dann so vns Christus sein flaisch zur speyse/ vnd sein blut zum tranck gibt/ vnd also krefftiglich anzeigt/ das er in vns wil bleiben/ vns stercken/ vnd zum ewigen leben erhalten/ so mögen wir fest darauff glauben vnd trauen es werd frucht in vns würcken/ vnd vns gaisstliche krafft vñ macht geben/ das wir zunemen vnd nicht verschmachten/ noch verdorren/ sonder wie die reben an dem weinstock/ safftig grün vnd fruchtbar bleiben/ das wir nicht in das sewr geworffen werden. Ein solcher glaub/ der kan dann bestehn in allen nöten/ dan er hat Gottis wort vnd werck allenthalben für sich.

Vnd das ist meine liebe kindlein/ der einfeltig gemain vnd recht verstand/ der wort des abendmals Christi/ Darumb merckts mit fleis vnd wann man euch fraget.

Was ist das Sacrament des altars?

So solt ihr also antworten.

Es ist der war leib/ vnd das blut vnsern Herrn Ihesu Christ vnter dem brot vnd wein/ vns Christen zu essen vnd zu trincken/ von Christo selbs eingesetzt.

Vnd wann man weiter fraget.

Wo steht das geschrieben?

So solt ihr also antworten.

Also schreiben die heyligen Euangelisten Matthæus / Marcus / Lucas / vnd Paulus. Der Herr Ihesus in der nacht / da er verraten ward / nam er das brot / dancket vnd prachs / vnd gabs sein jungern / vnd sprach / Nempt hin vnd esset / das ist mein leib / der für euch gegeben wirt / solchs thut zu meinem gedechtnus.

Desselben gleichen / Nam er auch den kelch / nach dem abendmal / vnd dancket / vnd gab in den / vnd sprach Trinckt alle daraus das ist mein blut / des newen Testaments / welches für euch / vnd für viel vergossen wirdt / zur vergebung der sünden / Solchs thut / so offft ihrs trinckt / zu meinem gedechtnus.

Vnd wann man weiter fraget.

Was nützet solchs essen vnd trincken?

So solt jr also antworten.

Das zaigen vns diese wort / für euch gegeben / vnd vergossen / zur vergebung der sünden / Nemlich das vns im Sacrament vergebung der sünden / leben / vnd seligkeit durch solche wort gegeben wirdt / dann wo vergebung der sünden ist / da ist auch leben / vnd seligkeit.

Vnd wann man weiter fraget.

Wie kan leiblich essen vnd trincken / solche grosse ding thun?

Solt ihr also antworten.

Essen vnd trincken thuts freylich nicht / sonder die wort / so da stehn / für euch gegeben / vnd vergossen / zur vergebung der sünden / welche wort sein neben dem leiblichen essen vnd trincken / als das hauptstück im Sacrament. Vnd wer den selbigen worten glaubet / der hat was sie sagen / vnd wie sie lauten / Nemlich vergebung der sünden.

Vnd wann man weiter fraget.

Wer empfalet dann solch Sacrament würdiglich.

So solt ihr also antworten.

Fasten vnd leiblich sich beraytten / ist wol ein feine eufferliche zucht / Aber der ist recht würdig / vnd wol geschickt / der den glauben hat / an diese wort / für euch gegeben / vnd vergossen zur vergebung der sünden.

Wer aber diesen worten nicht glaubt / oder zweyffelt / der ist unwürdig / vnd vngeschickt / dann das wort / für euch / fordert eitel glaubige hertzen.

Also habt jr / meine liebe kindlein / den rechten verstand vnd branch / des heiligen abendmals des Herrn / den solt ihr mit allem fleis mercken / auff das ihrs zu seiner zeit / auch würdiglich empfalet /

pfahet / vnd den Worten Christi / von tag zu tag / ye lenger ye fester
glaubt / vnd also in ihm bleibet / vnd frucht bringt / so wirdt euch
der himelisch vater rainigen / das ihr ye lenger ye mehr frucht bring
get / auff das Gott in euch geehret werd / vnd ewer frucht bleibe /
so werdt ihr entlich selig / vnd mit Christo ewiglich regirn / Das
verleihe vns Gott allen / Amen.

Gedruckt zu Leipzig durch
Wolff Günter.

Anno M. D. LII.

191198

Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.

Faint, illegible text, possibly bleed-through from the reverse side of the page.

Wemshy 25

